


# info biltén

Informativno glasilo Općine Visoko, br. 03, I - XII 2015. g.

VISOKO





Babić (Muhameda) Amra. Diplomirala i magistrirala na Ekonomskom fakultetu Univerziteta u Sarajevu. Samostalni računovođa, ovlašteni revizor i sudski vještak finansijske struke. U toku radnog vijeka radila u privredi, bankarstvu, osiguranju. Bila Općinski vijećnik općine Visoko u dva mandata, 2004. i 2008. godine. Obavljala dužnost Ministricice finansija u Vladi Zeničko-dobojskog kantona. Na dužnosti Načelnice Općine Visoko od 14.11.2012. godine.

### ***Poštovani sugrađani!***

Stabilizirali smo budžet i budžetsku potrošnju. Budžet Općine Visoko uvećali smo za 30,54%. Vratili smo stare nagomilane obaveze i istovremeno investirali 11,5 miliona KM u razvoj infrastrukture na području cijele općine Visoko. Porast zaposlenosti za mandatni period je 7,85%, a broj registrovanih privrednih društava porastao je za 32,06%, kao i broj registrovanih obrta za 19,32%.

Po pokazatelju bruto izvoza po glavi stanovnika Visoko se nalazi na prvom mjestu u Zeničko-dobojskom kantonu. Pokrenuli smo procese lokalnog ekonomskog razvoja. Pokrenuli smo problem rješavanja vodosnabdijevanja ruralnog dijela općine za oko 12.000 stanovnika i na najboljem smo putu da ga riješimo. Izgradnjom Ambulante porodične medicine TIKA u Moštru riješili smo problem zdravstvene zaštite za oko 16.000 stanovnika.

Učinili smo značajne napore za stvaranje preduvjjeta za bolje predškolsko i školsko obrazovanje, kao i za sport i kulturu kroz rekonstrukciju postojećih i izgradnju novih kapaciteta. Pokrenuli smo procese koji garantuju bolji i efikasniji javni sektor, posebno javna preduzeća i ustanove.

Asfaltirali smo desetine kilometara novih cesta i puteva. Počeli smo uređivanje korita rijeka i parkova. Radimo na stvaranju lijepšeg, uređenijeg i čišćeg Visokog. Popravljamo uvjete bezbjednosti građana i imovine. Pomagali smo putem institucija svima kojima je pomoći trebala, prehrambenim paketima, lijekovima, ogrjevom, novčanim prilozima, stalnom brigom i pomoći, dodjelom plastenika i na druge načine.

Radili smo i realizovali projekte sa svim pozitivnim snagama, a u interesu građana. Namjera nam je da ovaj grad i ovu općinu pripremimo što je moguće bolje za ulazak Bosne i Hercegovine u Evropsku uniju. S tim u vezi, raduje nas činjenica da je sve više domaćih institucija, kompanija, ali i inozemnih investitora i predstavnika EU koji u Općini Visoko vide istinskog partnera.

Drage Visočanke i Visočani, uvaženi prijatelji, poštovani sugrađani, svima zahvaljujem za dosadašnju saradnju i nadam se još uspješnijoj u budućnosti. Vratili smo dignitet Visokom. Ovo je tek početak. Visoko je krenulo put razvoja i Visoko na tom putu ne smije i neće stati. Obećavam vam to. Bila sam načelnica svih građana, te će biti i dalje.

**Načelnica Općine Visoko  
Mr.sci. Amra Babić**



## SADRŽAJ:

<b>Općinska administracija</b>	<b>4</b>
<b>Strateške aktivnosti i dokumenti</b>	<b>7</b>
<b>Političko-ekonomiske posjete</b>	<b>18</b>
<b>Najznačajniji datumi</b>	<b>20</b>
<b>Uspjesi</b>	<b>31</b>
<b>Projekti za bolje Visoko</b>	<b>36</b>
<b>Komunalna i putna infrastruktura</b>	<b>43</b>
<b>Ekologija</b>	<b>56</b>
<b>Privreda</b>	<b>58</b>
<b>Socijalni projekti</b>	<b>66</b>
<b>Kultura</b>	<b>69</b>
<b>Prijemi</b>	<b>74</b>
<b>Priznanja, posjete, predavanja...</b>	<b>85</b>



### OPĆINA VISOKO

Ul. Alije Izetbegovića 12A, 71300 Visoko, Zeničko-dobojski kanton, BiH  
 tel. +387 32 732 500; fax. +387 32 738 330; e-mail: info@visoko.gov.ba

**CENTRALA OPĆINE VISOKO: tel. 032/ 732-500**  
**OPĆINSKA INSPEKCIJA: tel. 032/ 732-549**

## KONTAKTI:

**Služba za poslove Općinskog načelnika**

Broj tel. 032/732-501  
 Broj faxa. 032/738-330  
 E-mail: nacelnica@visoko.gov.ba

**Služba za poslove Općinskog vijeća**

Broj tel. 032/732-502  
 Broj faxa. 032/735-711  
 E-mail: vijece@visoko.gov.ba

**Služba za opću upravu i inspekcijske poslove**

Broj tel. 032/732-503  
 Broj faxa. 032/738-386  
 E-mail: opcauprava@visoko.gov.ba

**Služba za društvene djelatnosti i boračko-invalidsku zaštitu**

Broj tel. 032/732-504  
 Broj faxa. 032/738-848  
 E-mail: drustvene@visoko.gov.ba

**Služba za privredu, finansije i lokalni ekonomski razvoj**

Broj tel. 032/732-505  
 Broj faxa. 032/738-401  
 E-mail: privreda@visoko.gov.ba

**Služba za urbanizam, stambeno-komunalne poslove i katastar nekretnina**

Broj tel. 032/732-507  
 Broj faxa. 032/736-571  
 E-mail: urbanizam@visoko.gov.ba

**Služba civilne zaštite**

Broj tel. 032/735-700  
 Broj faxa. 032/735-700  
 E-mail: cz@visoko.gov.ba

**Općinsko pravobranilaštvo**

Broj tel. 032/732-513  
 Broj faxa. 032/738-330  
 E-mail: pravobranilac@visoko.gov.ba



## OPĆINA VISOKO USPJEŠNO RECERTIFICIRALA DVA ISO STANDARDA

U Općini Visoko održan je recertifikacijski audit provjere sistema upravljanja kvalitetom i zaštite okoline, a u skladu sa međunarodnim standardima.

Audit tim iz certifikacijske kuće TUVadria sa Mirsadom Begićem na čelu, auditorom za sisteme upravljanja kvalitetom, zaštitom okoline i zaštitom zdravlja i sigurnosti na radu, utvrdio je da je Općina Visoko uspješno recertificirala dva ISO standarda, i to upravljanja kvalitetom i zaštitom okoline.

## ZNAČAJNE UŠTEDE U PRIVREDNOM SEKTORU SA ELEKTRONSKIM REGISTROM ADMINISTRATIVNIH POSTUPAKA



Predstavnici Odsjeka za privredu Općine Visoko prezentirali su članovima Udruženja građana-privrednika „Visoko XXI“ Elektronski registar i istakli značajne uštede koje će biti ostvarene u privrednom sektoru, što će doprinijeti jednostavnijem radu svih privrednih subjekata, te olakšati investitorima koji namjeravaju doći u Visoko. Elektronski registar administrativnih postupaka je servis Općine Visoko koji omogućava privrednicima da na brz i transparentan način dođu do informacija u vezi administrativnih postupaka koje provodi Općina.



## AKTIVNOSTI KANCELARIJE ZA PRIVREDNIKE OPĆINE VISOKO

**U** cilju poboljšanja poslovnog okruženja na području općine Visoko, a Odlukom Općinske načelnice u 2014. godini formirana je Kancelarija za privrednike u okviru Službe za finansije, privredu i lokalni ekonomski razvoj. Ciljevi Kancelarije su pružanje pomoći privrednim društvima, poduzetnicima, saradnja sa udruženjima privrednika, poljoprivrednika, stvaranje baze podataka, te promovisanje privrednog razvoja općine Visoko.

Kancelarija za privrednike je u 2015. godini poduzela niz aktivnosti među kojima su: aktivnosti vezane za štampanje brošure "Uzgoj maline", prezentacija "Poboljšanje pristupa malih i srednjih preduzeća finansijskim sredstvima" u saradnji sa Fondacijom za održivi razvoj, provođenje ankete o zadovoljstvu privrednika pruženim komunalnim uslugama na području općine Visoko, pozivanje građana općine Visoko da uzmu učešće u javnoj raspravi o nacrtu Prostornog plana, prezentacija Projekta "Centar za upravljanje otpadom", ažuriranje podataka o privrednim društvima na području naše općine, koordiniranje sa drugim Službama po pitanju rješavanja zahtjeva privrednih društava, učešće u aktivnostima koje provodi Agencija za unaprjeđenje stranih investicija u BiH (FIPA), povezivanje privrednih subjekata zbog saradnje sa investitorima iz regiona.



Također, Kancelarija za privrednike je pored navedenih uspješnih aktivnosti pružala usluge pravne pomoći na usmeni zahtjev pravnih i fizičkih lica, te privrednika. U decembru 2015. godine Kancelarija za privrednike je započela aktivnosti na anketiranju privrednika po pitanju organizacije Izložbeno prodajnog sajma „Jesen u Visokom“, manifestacije „Visočko ljeto“ i po pitanju zadovoljstva korisnika web stranicom Općine Visoko. Kancelarija za privrednike će sačiniti izvještaj o rezultatima provedenih anketa i putem oficijelne web stranice učiniti ih dostupnim javnosti.

## 231.000 KM ZA PARTICIPACIJE U PRIJEVOZU ĐAKA I STUDENATA

**P**laćanje troškova prijevoza učenika osnovnih škola je u nadležnosti kantona, dok za troškove prijevoza učenika srednjih škola i studenata ne postoji takva zakonska obaveza. Kako bi se pomoglo ovoj populaciji Općina je preuzeila obavezu da participira u tim troškovima.

Budžetom Općine Visoko za 2015. godinu u stavci Izdaci za prijevoz đaka i studenata planirano je 231.000 KM. Općinska načelnica je 01.08.2015. godine odobrila Kriterije za kategorije učenika srednjih škola i studenata koji imaju pravo korištenja participacije u prijevozu. U skladu sa navedenim Kriterijima, zaključno sa 10.12.2015. godine, pravo korištenja participacije u prijevozu ostvarilo je 556 učenika srednjih škola i 161 student sa područja općine Visoko.





## STVARANJE OLAKŠICA ZA POSLOVANJE PRIVREDNIH SUBJEKATA: USVOJENA NOVA ODLUKA O KOMUNALNIM TAKSAMА

**N**a 34. sjednici Općinskog vijeća Visoko održanoj 26.12.2015. godine usvojena je nova Odluka o općinskim komunalnim taksama.

Obveznici plaćanja komunalne takse su sva pravna i fizička lica registrirana za obavljanje djelatnosti, koja posluju na području općine Visoko i koja koriste predmet, prostor ili pružaju uslugu za čije korištenje je propisano plaćanje komunalne takse.

Za pravna i fizička lica svakako je najznačajnija taksa na isticanje firme. U novoj Odluci o općinskim komunalnim taksama za razliku od prethodne Odluke izmijenjen je kriterij za obračun i naplatu komunalne takse.

U ranijoj Odluci kriterij je bio vrsta djelatnosti koju obavlja pravno ili fizičko lice, a u novoj Odluci visina komunalne takse na istaknutu firmu za pravna lica određuje se množenjem jedinstvene osnovice komunalne takse sa koeficijentom položajne pogodnosti i koeficijentom veličine pravnog lica u smislu kriterija o razvrstavanju pravnih lica na osnovu člana 4. Zakona o računovodstvu i reviziji FBiH. Visina komunalne takse za fizička lica određuju se množenjem jedinstvene osnovice sa koeficijentom položajne pogodnosti. Osnovica komunalne takse na istaknutu firmu je jedinstvena i iznosi 150,00 KM uz primjenu ostalih mjerila.



Primjenom ovih kriterija iznosi komunalnih taksi su umanjeni za 50% u odnosu na raniju Odluku, a naročito kada su u pitanju pravna lica.

Bitno je napomenuti da prihodi koji se realizuju naplatom komunalnih taksi na isticanje firme pripadaju neporeskim budžetskim prihodima koji su u cijelosti vlastiti prihodi Općine. Primjenom nove Odluke prihodi po ovom osnovu će biti manji u odnosu na raniji period. Međutim, pri izradi ove Odluke akcenat je stavljen na takva rješenja kojima će se izvršiti niža fiskalna opterećenja za privredne subjekte i time stimulisati rast i razvoj svih privrednih aktivnosti.

Donošenje ovakve Odluke predstavlja jednu od aktivnosti Općine koje imaju za cilj stvaranje povoljnijeg okruženja na području općine Visoko i stvaranje olakšica za poslovanje privrednih subjekata.

## ZAHVALNICA FEDERALNOG ŠTABA CIVILNE ZAŠTITE OPĆINI VISOKO




**F**ederalni štab civilne zaštite je na svečanosti u Sarajevu, a povodom obilježavanja Međunarodnog dana civilne zaštite, koji je ujedno i Dan civilne zaštite FBiH, dodijelio zahvalnicu Općini Visoko za uspješnu saradnju i doprinos u izgradnji sistema zaštite i spašavanja ljudi i materijalnih dobara.

Općini Visoko je uručeno priznanje zbog toga što je Štab civilne zaštite općine Visoko uspješno odgovorio situaciji u vrijeme velikih poplava koje su Bosnu i Hercegovinu zadesile u maju 2014. godine, kada je stanovništvu pružena adekvatna zaštita, kao i pomoć u saniranju pretrpljene štete.

### GODIŠNJI IZVJEŠTAJ IZ MATIČNE KNJIGE ROĐENIH, UMRLIH I VJENČANIH U 2015. GODINI NA PODRUČJU OPĆINE VISOKO

Prema evidencijama Službe za opću upravu i inspekcijske poslove u 2015. godini upisano je u: Matičnu knjigu rođenih 433 osobe; Matičnu knjigu umrlih 391 osoba; Matičnu knjigu vjenčanih 237 sklopljenih brakova.



## USVOJEN PROSTORNI PLAN OPĆINE VISOKO ZA PERIOD 2014-2034.

**O**pćinsko vijeće Visoko je na 23. sjednici usvojilo Nacrt odluke o usvajanju Prostornog plana općine Visoko za period 2014-2034. godina za koji je otvorena javna rasprava u trajanju od 60 dana.

Nakon usvajanja Nacrta odluke, putem web stranice Općine Visoko i drugih sredstava javnog informisanja objavljen je javni poziv, kojim su pozvani svi građani da uzmu učešće u javnoj raspravi o Nacrtu Prostornog plana općine Visoko za period 2014-2034. godina.

Uvid u grafički i tekstualni dio plana mogao se izvršiti na web stranici Općine, te neposredno u Centru za dozvole Općine Visoko, gdje se moglo dobiti stručno pojašnjenje, te dati primjedbe, prijedloge i sugestije.

Također, upućeni su i pisani pozivi privrednim subjektima, javnim ustanovama i preduzećima, kao i mjesnim zajednicama na području općine Visoko da

uzmu svoje učešće u javnoj raspravi, te na taj način doprinesu što kvalitetnijoj izradi plana.

U periodu od 60 dana održane su četiri javne rasprave za građane i privredne subjekte sa područja općine Visoko, kao i završna javna rasprava.

Služba za urbanizam, stambeno-komunalne poslove i katastar nekretnina, kao nosilac javne rasprave razmotrila je podnesene i pristigle prijedloge, sugestije i primjedbe, te utvrdila Prijedlog odluke o usvajanju Prostornog plana općine Visoko za period 2014-2034. godina, koji je zajedno sa Izvještajem o provedenoj javnoj raspravi dostavljen Općinskom vijeću Visoko.

Navedeni dokumenti razmatrani su na sjednici Općinskog vijeća održanoj 25.07.2015. godine, te je Prostorni plan općine Visoko za period 2014-2034. i usvojen.

# UPRAVA EVROPSKE BANKE ZA OBNOVU I RAZVOJ (EBRD) ODOBRILA OPĆINI VISOKO SREDSTVA ZA PROJEKAT VODOSNABDIJEVANJA

Uprava Evropske banke za obnovu i razvoj (EBRD) dala je inicijalno odobrenje za državni kredit BiH u iznosu od 4,5 miliona eura za finansiranje projekta "Vodosnabdijevanje na području općine Visoko".

**John Brown**, direktor predstavničkog ureda Evropske banke za obnovu i razvoj (EBRD) BiH, istakao je kako je ovo jako važan projekat, te kako bi se njegovom realizacijom omogućilo proširenje sistema vodosnabdijevanja na području općine Visoko za 50%, sa nekih 21.000 na 33.000 stanovnika koje bi dobilo pitku vodu.

Od sredstava odobrenog kredita, 1,5 milion eura će biti odvojeno za rekonstrukciju postojeće mreže, tako da bi realizacijom ovog projekta oni korisnici koji već imaju vodu, imali bolju kvalitetu snabdijevanja.

Za otplate kredita garantirat će država BiH. Rok otplate je 15 godina, i to 3 godine *GRACE* perioda, a kamatna stopa je u iznosu šestomjesečnog EURIBOR-a plus 1% marže godišnje.

"Također, postoji plan da radimo na mobiliziranju investičiske donacije za izgradnju postrojenja za prečišćavanje otpadnih voda i priključivanje postojeće kanalizacione mreže na to postrojenje. Jako sam optimističan po pitanju ovog projekta, te ako uspijemo u realizaciji, Visoko bi bilo u skladu sa svim relevantnim EU direktivama koje se odnose na pitku vodu i otpadne vode", istakao je Brown.

**Načelnica Amra Babić** ovom prilikom istakla je sljedeće: "Zadovoljna sam što je Općini Visoko odobren koncept plana u iznosu od oko 4,5 miliona eura, s tim da su tu planirana i grant sredstva do visine od 50% koja bi bila iskorištena za rješavanje pitanja izgradnje kolektora i izgradnje pročišćivača otpadnih voda.



Problem vodosnabdijevanja može se rješavati samo sistematski, putem javnog preduzeća, putem okrupnjavanja svih lokalnih vodovoda i njihovog postupnog stavljanja u sistem. Općina je u prethodne tri godine izvršila mnogo vodoistražnih radova, ne samo na izvorištu Vrutak nego i na drugim lokalitetima, a već postoje locirana mjesta na kojima će se raditi vodoistražni radovi i u narednoj godini. Napravljena je tehnička dokumentacija koja je spremna za realizaciju." istakla je načelnica Babić.

O aktivnostima koje je preduzeće JKP "Visoko" poduzelo po pitanju ovog projekta, govorio je direktor JKP "Visoko" **Almir Hadžialić**: "Preduzeće se intenzivno strukturalno i organizacijski reformiše, počevši od ljudskih resursa, od onoga čime trenutno raspolaže, a pogotovo u administrativnom smislu, tako da možemo obuhvatiti svu tu tehničku podršku koju smo dužni da damo ovom projektu".

Saradnici Općinske načelnice govorili su o aktivnostima Općine Visoko koje su prethodile inicijalnom odobrenju za kredit EBRD-a.

**Milada Mataradžija**, stručni savjetnik za infrastrukturu prezentovala je aktivnosti koje se izvode na izvorištu „Vrutak“, a to su realizacija ugovora ugradnje opreme, izrada i puštanje u rad softverskih aplikacija potrebnih za realizaciju hidrometrijskih mjerjenja i monitoringa na izvorištu, zatim radovi u vodozaštitnoj zoni u naselju Oštrac, MZ Buci, koji se izvode na kanalizacionoj mreži. Naglasila je da će se u drugoj fazi vršiti ugradnja uređaja za tretman otpadnih voda, te predstavila plan budućih aktivnosti na samom izvorištu.

**Emir Fejzović**, šef Odsjeka za lokalni ekonomski razvoj govorio je o aktivnostima koje slijede u pogledu donošenja potrebnih odluka od strane Općinskog vijeća, Vlade Federacije BiH, Vijeća ministara BiH i Predsjedništva Bosne i Hercegovine.



## PRIVLAČENJE INVESTITORA: OPĆINA VISOKO UVODI BFC CERTIFIKAT

**U** Općini Visoko nastavljene su aktivnosti na certificiranju za dobivanje BFC SEE certifikata.

Riječ je o certificiranju općina s povoljnim poslovnim okruženjem, i to je jedinstven program za poboljšanje kvaliteta usluga i informacija koje općine u regiji jugoistočne Evrope pružaju privrednicima. Program certificiranja pruža općinama jasne smjernice o tome kako da kreiraju dobru

poslovnu klimu i uvedu međunarodno priznate standarde efikasne i transparentne lokalne administracije.

Investitorima koji žele preseliti ili proširiti svoje poslovanje u jugoistočnu Evropu, BFC SEE služi kao standardiziran mehanizam za procjenu lokalnih uvjeta za poslovanje i ukazuje na to koje općine u regiji imaju najpovoljniju klimu za investiranje. U narednom periodu očekuje se druga posjeta evaluacione komisije.

## ELEKTROPRIVREDI BiH I OPĆINI VISOKO ODOBRENA APLIKACIJA ZA EU PROGRAM - HORIZONT 2020

**O**pćinska načelnica Amra Babić sa saradnicima održala je sastanak sa predstavnicima Sektora za strateški razvoj Elektroprivrede BiH koji su predvodili dr. Izet Smajević i dr. Mustafa Musić - šef sektora.

Tema sastanka bila je odobrena aplikacija Elektroprivrede BiH i Općine Visoko, kao fokus općine za razvojni projekat „Modeliranje grijanja manjih gradova obnovljivim izvorima energije i smanjenja problema globalnog zagrijavanja i klimatskih promjena“ u okviru programa Evropske unije - Horizont 2020. Horizont 2020 doprinosi ostvarivanju ciljeva iz ključnih strateških dokumenata Evropske unije vezanih za istraživanje, tehnološki razvoj i inovacije, Evropa 2020 i Unija inovacija, te izgradnji Evropskog istraživačkog prostora.

Pored Elektroprivrede BiH i Općine Visoko iz Bosne i Hercegovine, u projekat su uključene i institucije iz Njemačke, Danske, Austrije, Slovenije i Makedonije, te Grad Šabac iz Srbije, Općina Ljutomer iz Slovenije, Elektrotehnički fakultet Univerziteta u Beogradu i Fakultet strojarstva i brodogradnje u Zagrebu. Elektroprivreda BiH i Općina Visoko su prvi uspješni aplikanti iz Bosne i Hercegovine na EU program - Horizont 2020.

# POTPISANI UGOVORI SA ORGANIZACIJAMA CIVILNOG DRUŠTVA U OKVIRU UNDP-OVOG PROJEKTA „JAČANJE LOKALNE DEMOKRATIJE/DEMOKRACIJE IV - LOD IV

**U 2015. godini, a u okviru projekta „Jačanje lokalne demokratije/demokracije IV-LOD IV“ u Maloj sali Općine Visoko u dva navrata (27.05.2015. i 29.09.2015.) je upriličeno potpisivanje ugovora sa organizacijama civilnog društva (OCD) čiji projekti su odabrani za finansiranje.**

**N**akon javnog poziva za organizacije civilnog društva koji je provela Općina Visoko u sklopu LOD IV projekta, sljedeći projekti su odobreni za finansiranje:

- Udruženje „Damar omladine“ sa projektom „Umjetnost kroz inkluziju“ u iznosu od 18.215,00 KM. Trajanje projekta 6 mjeseci;
- Odred izviđača „Visoko“ Visoko sa projektom „Izviđači to mogu“ u iznosu od 16.066,00 KM. Trajanje projekta 10 mjeseci;
- Udruženje „Mladi volonteri“ Visoko sa projektom „Ti se osnaži posao potraži“ u iznosu od 19.810,00 KM. Trajanje projekta 6 mjeseci;
- NK „Bosna“ Visoko, sa projektom „Svi za sport“ u iznosu od 19.585,00 KM. Trajanje projekta 6 mjeseci;
- Žene za žene International, Sarajevo, sa projektom „Od margine do uspjeha“ u iznosu od 30.352,50 KM. Trajanje projekta 5 mjeseci.

Također, potписан je i Ugovor o raspodjeli troškova između LOD IV projekta i Općine Visoko kojima se reguliše finansiranje odobrenih projekata, a u čijem finansiraju Općina Visoko učestvuje sa 20%.

Općina Visoko je u decembru 2014. godine kompetitivnim putem odabranu da učestvuje kao partnerska jedinica lokalne samouprave (JLS) u okviru LOD IV projekta.



Projekat „Jačanje lokalne demokratije/demokracije IV“ koji provodi UNDP finansira Evropska unija iz sredstava Instrumenta za pretpriistupnu pomoć (IPA) u iznosu od 2 miliona eura, s ciljem da doprinese demokratskoj stabilizaciji, pomirenju i daljem razvoju Bosne i Hercegovine kroz podršku odabranim opštinama u uspostavljanju boljih odnosa između lokalnih vlasti i civilnog društva.

## POTPISAN SPORAZUM O SARADNJI IZMEĐU OPĆINE VISOKO I OPĆINE SJENICA

Delegacija Evropske unije u Bosni i Hercegovini i Republici Srbiji u saradnji sa Kancelarijom za evropske integracije Vlade Republike Srbije i Direkcijom za evropske integracije BiH objavila je poziv za dostavljanje prijedloga projekata u okviru Prekograničnog programa Srbija - Bosna i Hercegovina.

**U** okviru ovog poziva obezbijeden je indikativni iznos od ukupno 3.600.000 € (1.800.000 € za Republiku Srbiju i 1.800.000 € za Bosnu i Hercegovinu) za projekte iz obje partnerske države koji će se baviti prevencijom poplava, obnovom i reagovanjem u slučaju prirodnih nepogoda. Programska teritorija obuhvata 67 lokalnih samouprava iz BiH i 31 lokalnu samoupravu u okviru 4 okruga iz Srbije. Obzirom da je veći dio Programskog područja pretrpio velike štete u poplavama u maju 2014. godine, ovaj poziv ima za cilj ublažavanje posljedica poplava kao i aktivnosti vezane za prevenciju poplava što je u skladu sa ciljevima Općine Visoko koja je odlučila da aplicira na isti.

Obzirom da se radi o prekograničnom programu koji podrazumijeva učešće jedne općine iz BiH, a jedne iz Srbije, Općina Visoko će u saradnji sa Općinom Sjenica zajedno aplicirati na javni poziv. S tim u vezi, Općinska načelnica sa saradnicima u Maloj sali općine Visoko upriličila je prijem za predsjednika Općine Sjenica i njegove saradnike, te se pristupilo potpisivanju zajedničkog Sporazuma o saradnji kojim će se regulisati prava i obaveze učesnika u projektu prekogranične saradnje.



## ODRŽAN SASTANAK AKTIVA DIREKTORA OSNOVNIH I SREDNJIH ŠKOLA

**U** Franjevačkom samostanu sv. Bonaventure u Visokom održan je sastanak Aktiva direktora osnovnih i srednjih škola sa područja općine Visoko. Sastanku je prisustvovala načelnica Općine Amra Babić.

Razgovaralo se o završetku školske godine, postignutim uspjesima ali i postojećim problemima čije rješenje i jeste krajnji cilj sastanaka Aktiva. Nakon što su predstavnici škola iznijeli svoje prijedloge, načelnica Babić je naglasila da treba sistemski rješavati stvari, zajedno odrediti prioritete, te sarađujući nalaziti rješenja. Istaknuto je da će Općinske službe stajati na raspolaganju za sve što je u njihovoј nadležnosti. Zaključeno je da je neophodno utvrđivanje problema, određivanje prioriteta i stvaranje boljih prilika, kako za djecu tako i za nastavno osoblje.





## ODRŽANO PREDAVANJE ZA PREDSJEDNIKE SAVJETA MJESENHIH ZAJEDNICA I PREDSJEDNIKE ODBORA ZA ODRŽAVANJE LOKALNIH VODOVODA



**U** Velikoj sali Općine Visoko za predsjednike Savjeta mjesnih zajednica i predsjednike odbora za održavanje lokalnih vodovoda održano je predavanje na temu "Značaj kontrole vode za piće". Predavači su bili: prof.dr. Smajil Durmišević, spec.higijene i zdravstvene ekologije, Safet Kubat, mr.zdravstvene njegi i Melita Lelić, dipl. med.sestra.

U skladu sa zaključcima Općinskog vijeća predavanje je održano u saradnji sa Zavodom za javno zdravstvo Zeničko-dobojskog kantona i Higijensko-epidemiološkom službom „Doma zdravlja“ Visoko. Cilj predavanja je bio upoznavanje korisnika lokalnih vodovoda o značaju kontrole vode i posljedicama korištenja zdravstveno neispravne vode za piće.

Po prezentiranim podacima o ispravnosti vode lokalnih vodovoda za općinu Visoko preporuka Zavoda je da se kontrola vode svih objekata vrši minimalno četiri puta godišnje, a edukacije korisnika lokalnih vodovoda nastave u saradnji sa Higijensko-epidemiološkom službom „Doma zdravlja“ Visoko.

## OPĆINA VISOKO OMOGUĆILA STRUČNO OSPOSOBLJAVANJE ZA 11 ZDRAVSTVENIH RADNIKA U JU „DOM ZDRAVLJA“ VISOKO

**N**akon raspisanog Javnog poziva za prijem volontera u JU „Dom zdravlja“ Visoko, u Velikoj sali Općine Visoko je održan PRESS povodom okončanja istog. Edina Ferizović pomoćnik načelnika za društvene djelatnosti istakla je da su Zaključkom Općinske načelnice odobrena sredstva iz Budžeta Općine Visoko za stručno osposobljavanje 11 zdravstvenih radnika za samostalan rad (volonterski rad) u JU „Dom zdravlja“ Visoko. Nakon provedenog postupka odabira sačinjena je rang lista.

Općina Visoko je obezbijedila sredstva namijenjena za ostvarivanje prava primljenih volontera po osnovu osiguranja za slučaj povrede na radu i profesionalnog oboljenja, a u skladu sa važećim zakonskim propisima.





# NAČELNICA BABIĆ O SAMOVOLJI DIREKTORA I UPRAVNIH ODBORA JAVNIH USTANOVA I JAVNIH PREDUZEĆA

**O**pćinska načelnica Amra Babić, 05.11.2015. godine, poslala je Uputstvo svim Javnim ustanovama i Javnim preduzećima na području općine Visoko, u kojem se navodi:

- Na osnovu člana 33. tačka 5. Statuta općine Visoko, koji glasi: „Općinski načelnik kao nosilac izvršne vlasti u okviru samoupravnog djelokruga Općine, u okviru svoje nadležnosti obavlja upravljački nadzor nad zakonitošću rada javnih ustanova i javnih preduzeća kojim je Osnivač Općina, te im daje upute za rad“ („Službeni glasnik općine Visoko“, broj: 1/11 i 8/13), dostavljamo Vam Uputstvo da u skladu sa odredbama člana 27. Zakona o javnim ustanovama u roku od 15 dana, Pravila ustanove uskladite tako da se prijem zaposlenika u radni odnos vrši transparentno, putem Javnog poziva koji je obavezno objaviti pored ostalih medija i na web stranici Općine Visoko.

Odluku o prijemu zaposlenika u radni odnos donosi Upravni odbor uz prethodnu saglasnost Osnivača. Uz Odluku o prijemu u radni odnos Upravni odbor je dužan dostaviti i prijedlog Komisije koja će provesti konkursni postupak, uz napomenu da jedan član Komisije mora biti ispred Osnivača.

Usklađena Pravila ustanove sa Pravilnikom o sistematizaciji radnih mjesta potrebno je ODMAH dostaviti Službi za društvene djelatnosti i boračko-invalidsku zaštitu općine Visoko.

Iz Javne ustanove „Dom zdravlja“ Visoko, 26.11.2015. godine, došao je odgovor koji glasi:

- Vezano za Vaš akt / Uputstvo broj 01/2-02-1229/14 od 05.11.2015. godine, koji nam je dostavljen na Protokol dana 09.11.2015. godine, u kojem tražite da se u roku od 15 dana izvrši usklađivanje Statuta i Pravilnika o radu JU „Dom zdravlja“ Visoko, na način da se prijem radnika vrši putem Upravnog odbora uz prethodnu saglasnost Općine Visoko, kroz postupak koji će provoditi Komisija čiji jedan član mora biti iz reda Osnivača, nakon obavljenog javnog poziva u sredstvima javnog informisanja i na web stranici Općine Visoko, obzirom da se ovim Uputstvom direktno zadire u djelokrug rada Upravnog odbora isto je prezentirano članovima Upravnog odbora na 47. Sjednici održanoj 17.11.2015. godine. Upravni odbor je razmatrajući ovo Uputstvo donio zaključak kojim se isti ne može prihvati jer nije u skladu sa važećim zakonskim propisima koji se odnose na rad Ustanove.

U prilogu ovog dopisa dostavljen je Zaključak Upravnog odbora broj 01-2605/15. od 17.11.2015. godine.

*Općinska načelnica je ovim povodom izjavila da je samovoljno ponašanje direktora i upravnih odbora Javnih ustanova i Javnih preduzeća, koje za cilj ima netransparentno upošljavanje – isključiva odgovornost istih koji očito zaboravljaju da upravljaju javnim resursima sa ciljem pružanja javnih usluga i pri tom troše javni novac.*

## SISTEMATSKA DERATIZACIJA NA PODRUČJU OPĆINE VISOKO

**N**a osnovu Zakona o zaštiti stanovništva od zaraznih bolesti, Naredbe Ministarstva zdravstva ZE-DO kantona, te Člana 33. Statuta općine Visoko, načelnica općine je donijela naredbu o provođenju preventivne sistematske deratizacije na području općine Visoko. Akciju deratizacije je organizovao i proveo Kantonalni zavod za javno zdravstvo Zenica. Higijensko-epidemiološka služba „Doma zdravlja“ Visoko je vršila nadzor nad poslovima deratizacije.

U toku izvođenja deratizacije nije bilo žalbi građana niti zdravstvenih posljedica po stanovništvo, tako da je akcija provedena uspješno i po planu.





## NAČELNICA BABIĆ SA SARADNICIMA POSJETILA JKP „GRADSKA GROBLJA“ VISOKO

Općinska načelnica Amra Babić sa saradnicima, 14.10.2015. godine, bila je u prvoj zvaničnoj posjeti Javnom komunalnom preduzeću (JKP) "Gradska groblja" d.o.o. Visoko (u stečaju).

Na sastanku sa stečajnim upraviteljem i menadžmentom Gradskih grobalja, općinska delegacija razgovarala je o rezultatima stečajnog postupka i njegovim posljedicama, kao i o planovima za naredni period.

"Razgovarali smo o dalnjim planovima i aktivnostima firme, a u kontekstu činjenice da će vrlo brzo biti okončan stečajni postupak. Kao stečajni upravitelj želim da se zahvalim općinskim strukturama i općinskoj načelnici na velikoj podršci koju su pružali Gradskim grobljima za vrijeme trajanja stečajnog postupka", kazao je tom prilikom Mehmed Vranac, stečajni upravitelj.

Načelnica Amra Babić je izrazila zadovoljstvo onim što je do sada urađeno, budući da su Gradska groblja u stečaju već godinu i pol, a građani to ni na jedan način nisu osjetili. Djelatnost preduzeća odvija se normalno i u skladu sa planovima, kao i ostale pomoćne djelatnosti, kao što je održavanje gradskog zelenila itd.

"Ono što je jako bitno istaći jeste da je preduzeće kad je ušlo u stečajni postupak imalo 15,5 miliona registriranih obaveza. To je danas preduzeće koje redovno isplaćuje obaveze prema uposlenim, doprinose, poreze i neto plate, mjesec za mjesec. Uposlenici ovog preduzeća imaju ovjerene zdravstvene knjižice i svakako idemo u jednom pravcu ozdravljenja preduzeća. Naši ciljevi bili su mnogo veći, i dokumentom reforme javnog sektora mi smo zacrtali da će ovo javno preduzeće u narednom periodu proširiti svoje djelatnosti.



Uvođenjem brige o parkinzima, mi smo na jedan način već počeli da širimo djelatnost Gradskih grobalja. U konačnici, cilj nam je da Gradska groblja postanu respektabilno preduzeće.", istakla je općinska načelnica Amra Babić.

Načelnica Babić je podsjetila i na činjenicu da je u momentu uvođenja stečaja, u ovom preduzeću kompletna imovina bila pod hipotekama, pod teretima i prijetila je opasnost od realizacije tih hipoteka.

Na sastanku je razgovarano i o planu i prijedlogu aktivnosti za 2016. godinu, o održavanju novih površina koje smo u međuvremenu dobili u našem gradu.

„Mislim da je ovo javno preduzeće zaista na dobrom putu da ponovo postane ono što smo željeli da uvijek bude, a to je jak oslonac lokalnoj zajednici", kazala je nakon sastanka načelnica Babić.



# ODRŽANA PRESS KONFERENCIJA POVODOM NARUŠENE BEZBJEDNOSNE SITUACIJE

U zgradi Općine Visoko Načelnica Amra Babić sa saradnicima, 17.03.2015. godine, je održala press konferenciju u vezi sa bezbjednosnom situacijom na području općine Visoko.

**N**ačelnica Općine Visoko pročinila je zahtjev koji je uputila MUP-u Ze-do kantona u kojem je informirala ministra Hajrudina Žilića i Policijskog komesara Semira Šuta o dešavanjima na području općine Visoko. U zahtjevu je navedeno da se već duže vrijeme na području općine Visoko bilježi porast kriminaliteta, narušavanje javnog reda i mira, ugrožavanje života ljudi i imovine, te što je posebno alarmantno, upotrebe vatrene oružja.

„U kratkom vremenskom periodu desilo se nekoliko oružanih pljački, paljevina vozila i pokušaja ubistva vatrenim oružjem. Bezbjednosna situacija po živote ljudi i sigurnost imovine u velikoj mjeri je ugrožena, te stoga upućujemo poziv svim nadležnim policijskim strukturama da hitno poduzmu aktivnosti pojačanog nadzora. Smatramo da je nužno Policijskoj upravi Visoko obezbijediti veći broj kvalifikovanih kadrova kao i bolju materijalno-tehničku podršku, te Vas pozivamo da isto učinite u što skorijem roku.

Također, pozivamo Vas da odmah pokrenemo zajedničke aktivnosti implementacije projekta gradskog video nadzora, kako bi na taj način povećali stepen bezbjednosti na području općine Visoko.

Uvažavajući učestalosti i intenzitet nemilih događaja, posebno na dan 16.03.2015. kada je zabilježena jedna oružana pljačka i dvije pucnjave u strogom centru grada, smatramo ovaj zahtjev lokalne zajednice opravdanim i hitnim.“, stoji u zahtjevu.



Administrator IS-a Općine Visoko, Almin Halilović rekao je na press konferenciji da je u cilju povećanja sigurnosti građana i materijalnih dobara Općina Visoko u saradnji sa MUP-om Ze-do kantona poduzela niz aktivnosti u realizaciji projekta „Gradskog video nadzora“.

„Trenutno se radi na analizi sistema, definisanju broja kontrolnih tački, kao i specificiranju tehničke dokumentacije koja je potrebna za pokretanje procedure javnih nabavki. Ovaj projekt podrazumijeva i to da se uz kamere mogu integrisati čitači registarskih oznaka automobila.“, istakao je Halilović.

Sekretar Općinskog vijeća Visoko, Zekija Omerbegović je kazala da je Općinsko vijeće na 25. sjednici, održanoj 28.02.2015. godine uputilo urgenciju i zahtjev Vladimiroviću, ministru unutrašnjih poslova, da poduzmu sve potrebne mjere iz svoje nadležnosti, a vezano za kontrolu radnog vremena ugostiteljskih objekata u kojima se pušta glasna muzika i toči alkohol, što je najčešći uzrok narušavanja javnog reda i mira.

komesaru, za konačno rješenje pitanja kadrovske popunjenoosti PS Visoko, te da se tokom 2015. godine izvrši popunjavanje Policijske stanice potrebnim kadrom.

OV Visoko je uputilo i zahtjev za obezbjeđivanje sredstava za postavljanje neophodne horizontalne i vertikalne signalizacije na regionalnim i lokalnim putevima na području naše općine, kao i za realizaciju postavljanja stacionarnih kamera na ulazu u grad iz pravca Kaknja, Ilijaša i Kiseljaka, odnosno iznalaženja finansijskih i tehničkih mogućnosti za ugradnju sistema videonadzora na saobraćajnicama.

Također, na istoj sjednici, Općinsko vijeće Visoko je sugeriralo nadležnim općinskim službama da poduzmu sve potrebne mjere iz svoje nadležnosti, a vezano za kontrolu radnog vremena ugostiteljskih objekata u kojima se pušta glasna muzika i toči alkohol, što je najčešći uzrok narušavanja javnog reda i mira.



## ODRŽAN SASTANAK POVODOM NARUŠENE BEZBJEDNOSNE SITUACIJE U VISOKOM

U cilju poboljšanja bezbjednosne situacije u Visokom, općinska načelnica je 19.06.2015. godine upriličila sastanak kojem su prisustvovali ministar MUP-a ZDK Hajrudin Žilić, načelnik PU II Visoko Mirsad Pehadžić, načelnik Sektora uniformisane policije Esnaf Buza, pomoćnik komandira za kriminalitet Elvedin Fišek i predsjedavajuća Skupštine Zeničko-dobojskog kantona Draženka Subašić.

Sastanak je upriličen povodom narušene bezbjednosne situacije i događaja nakon kojih je Načelnica uputila hitni dopis na adresu Ministarstva unutrašnjih poslova Ze-do kantona, te na ruke ministra i Policijskog komesara u vezi sa bezbjednošću građana i imovine na području općine Visoko.

Na osnovu vođenih razgovora zaključeno je slijedeće:

1. Odmah pristupiti realizaciji projekta "Gradski video nadzor", formiranjem tima za realizaciju. Nositelj aktivnosti: Općina Visoko, PU Visoko, MUP ZDK.
2. Kontinuirano nastaviti pojačan nadzor i aktivnosti policijskih snaga na suzbijanju kriminaliteta na području općine Visoko. Nositelj aktivnosti: MUP ZDK i PU Visoko.
3. Pojačati inspekcijski nadzor nad radom ugostiteljskih objekata, kladionica i slično (radno vrijeme, odo-

brenja za rad, ljetne bašte itd.). Nositelj aktivnosti: Kantonalne inspekcije, općinske inspekcije i nadležne općinske službe.

4. Kadrovski pojačati Policijsku stanicu u Visokom. Nositelj aktivnosti: MUP ZDK.

5. Revidirati sistematizaciju radnih mjesta PS Visoko sa aspekta stvarnih potreba i relevantnih kriterija. Nositelj aktivnosti: MUP ZDK.

Načelnica Babić je istakla da su ovi zaključci konkretni, te će u narednom periodu i kratkoročno i dugoročno dati svoje efekte i rezultate na poboljšanju bezbjednosne situacije na području općine Visoko.

Realizaciji ovih zaključaka pristupilo se odmah. Kroz sinergiju između građana i nadležnih policijskih snaga i struktura, izvršnih i zakonodavnih vlasti Općine i Kantona, pokušava se ovaj problem riješiti i bezbjednosnu situaciju podići na zadovoljavajući nivo.



## OSUDA NAPADA NA PRAVOSLAVNU CRKVU SV. PROKOPIJA

Predstavnici Međureligijskog vijeća BiH i načelnica Općine Visoko sa saradnicima, kao i glavni imam Medžlisa IZ Visoko, posjetili crkvu Svetog velikomučenika Prokopija u Visokom kako bi zajednički osudili vandalski čin kojim su maloljetni počiniovi na zidovima pomoćnih objekata crkve ispisali vulgarne i uvredljive grafite, razbili prozor, a inventar uništili i razbacali. Načelnica Općine Visoko Amra Babić je izrazila žaljenje zbog ovog događaja naglasivši da su počiniovi u roku od 24 sata otkriveni, a grafiti uklonjeni. "Uloga svih nas je da gajimo lijepe odnose, da živimo u skladu, u multietničkoj zajednici, što je i poruka naših vjera", zajednički je stav Međureligijskog vijeća BiH.

## AKTIVNOSTI SLUŽBE CIVILNE ZAŠTITE OPĆINE VISOKO NA UKLANJANJU NUS-a I MES-a

Služba civilne zaštite je u periodu od 01.01. do 10.12.2015. godine zaprimila 24 prijave o pronađasku NUS-a i MES-a i različitih kalibara sitne municije. Služba je u koordinaciji i saradnji sa Kantonalnim operativnim centrom, Timom za uništenje NUS-a i MES-a pri Federalnoj upravi civilne zaštite provela sve uspostavljene procedure iz njene nadležnosti oko prijave, obilježavanja, dislociranja.

Sva prijavljena sredstva, njih ukupno 552 komada, su izmještena i predata na uništenje, i to: Ručna bomba (30 kom.), Minobacačka mina 120 mm (2 kom.), Minobacačka mina 82 mm (2 kom.), Minobacačka mina 60 mm (2 kom.), Projektil 152 mm (1 kom.), Projektil 100 mm (1 kom.), Projektil TF 87 mm (1 kom.), Tromblonska trenutna mina (2 kom.), Tromblonska kumulativna mina (1 kom.), Eksplozivno sredstvo (1 kom.), Protivtenkovska mina RPM-6 (1 kom.), Metak 20 mm (2 kom.); Sitna municija (506 kom.).





## AMBASADOR REPUBLIKE FINSKE PEKKI METSO POSJETIO VISOKO

Rezidencijalni ambasador Republike Finske, Pekka Metso posjetio je Općinu Visoko, gdje se susreo sa načelnicom Amrom Babić i njenim saradnicima. Cilj ove posjete je bio upoznavanje sa našom općinom, privrednim potencijalima, te mogućnostima lokalnog ekonomskog razvoja.

Načelnica Babić je ambasadora Pekka Metsa upoznala sa stanjem u privredi, sigurnosnoj situaciji, a razgovarano je i o budućnosti BiH i proceduri njenog ulaska u EU.

Općinska načelnica je istakla da je ova posjeta još jedna u nizu priznanja za Općinu Visoko kada je u pitanju saradanja sa ambasadama, sa nevladnim i međunarodnim organizacijama.

Zadovoljstvo srdačnim prijemom u našoj Općini izrazio je ambasador Pekka Metso naglasivši da je prvi put u posjeti Općini Visoko, te da je Općina Visoko prepoznata kao ozbiljan partner u razvojnim projektima međunarodnih organizacija.

## DELEGACIJA TURSKЕ AGENCIJE ZA MEĐUNARODNU SARADNJU I RAZVOJ (TIKA) BORAVILA U VISOKOM

Delegacija Turske agencije za međunarodnu saradnju i razvoj (TIKA), boravila je u radnoj posjeti Općini Visoko kako bi razgovarali sa načelnicom Babić i saradnicima o ostvarenim projektima i budućoj saradnji.

Nakon sastanka, delegacija je obišla Kulturni centar Altindag-Visoko u Prijekom kao i ambulantu porodične medicine „TIKA“ u Moštru čija je sredstva za izgradnju finansirala upravo ova agencija, a čije je svečano otvorenje bilo 16.01.2014.





## DELEGACIJA AMBASADE ŠVICARSKE POSJETILA OPĆINU VISOKO

U posjeti Općini Visoko boravila je delegacija Ambasade Švicarske koju su činili NJ.E. Heinrich Maurer, ambasador Švicarske u BiH, ambasador i direktor SDC-a Manuel Sager i njihovi saradnici. Edina Ferizović, pomoćnica načelnice je objasnila da je povod ove posjete uspješna provedba Projekta besplatnog finansijskog savjetovanja za prezadužene građane, koji se implementira uz podršku Vlade Švicarske.

## AMBASADOR REPUBLIKE SLOVENIJE U BIH IZTOK GRMEK POSJETIO OPĆINU VISOKO



Ambasador Republike Slovenije u BiH Iztok Grmek i ekonomski savjetnik pri Ministarstvu vanjskih poslova Slovenije Gregor Presker, boravili su u radnoj posjeti Općini Visoko.

Poslije obilaska Centra za pružanje usluga građanima, sastanak je nastavljen u kabinetu Općinske načelnice.

Načelnica Babić ovom prilikom je istakla: "Cilj nam je predstaviti razvojne kapacitete općine Visoko i uspostaviti bližu saradnju sa nekom od sličnih općina u Republici Sloveniji, kako bismo razmijenili dobre poslovne prakse i iskustva te ostvarili mogućnost lakšeg pristupa fondovima EU."



## OBILJEŽEN 1. MART - DAN NEZAVISNOSTI BOSNE i HERCEGOVINE

Program obilježavanja Dana nezavisnosti BiH započeo je polaganjem cvijeća na Spomen kosturnicu poginulim borcima iz NOAR-a i na Spomen obilježju šehidima i poginulim borcima iz proteklog rata.

Na svečanoj sjednici načelnica Amra Babić je čestitala gostima, vijećnicima Općinskog vijeća i sugrađanima Dan nezavisnosti BiH, te u prigodnom govoru istakla historijske činjenice i važnost obilježavanja ovog datuma.

Svečanost su svojim nastupom obogatili i učenici Gimnazije "Visoko" Amila Alibegović i Adnan Mešinović.



## OBILJEŽEN 7. APRIL - DAN OSLOBOĐENJA VISOKOG

U okviru obilježavanja 7. aprila - Dana oslobođenja Visokog, načelnica Amra Babić i predsjedavajuća Općinskog vijeća Mirela Mateša Bukva, upriličile su prijem za predstavnike Udruženja antifašista i boraca NOR-a Visoko, Društva „Josip Broz Tito“ Visoko i Koordinacionog odbora boračkih udruženja i organizacija općine Visoko.

Nakon prijema, uslijedilo je polaganje cvijeća na Spomen kosturnicu borcima NOAR-a i Spomen obilježe šehidima i poginulim borcima.



## OBILJEŽEN 15. APRIL - DAN ARMIJE REPUBLIKE BIH

Na centralnom Spomen obilježju šehidima i poginulim borcima općine Visoko obilježen je 15. april - Dan Armije Republike Bosne i Hercegovine.

Predstavnici Općine Visoko i Koordinacionog odbora boračkih udruženja položili su cvijeće na spomen obilježje, a obilježavanju Dana Armije Republike BiH u Visokom doprinijeli su Sabahudin ef. Čehajić učenjem Kur'ana, kao i učenica Gimnazije "Visoko" Amina Mihaljević koja je pročitala svoj literarni rad "Priča moga oca".

Prisutnima su se ovom prilikom obratili načelnica Amra Babić, Mugdim Vranac, bivši načelnik SJB Visoko i Hasib Mušinbegović, penzionisani major Armije R BiH.

Visoko je tokom agresije na BiH izgubilo 297 boraca, 600 njih su postali invalidi, dok je poginulo nekoliko stotina civila.





## OBILJEŽEN 3. MAJ - DAN OTPORA AGRESIJI



Povodom 3. maja, Dana otpora agresiji na području općine Visoko, organizovan je prigodan program obilježavanja koji je započeo okupljanjem učesnika na Spomen obilježju šehidima i poginulim borcima općine Visoko, gdje je održan kraći historijski čas o dešavanjima u Visokom 3. maja 1992. godine.

Maršem „Putevima transporta naoružanja opkoljenom Sarajevu“, polaganjem cvijeća ispred Spomen obilježja šehidima u MZ Goduša, na Spomen kosturnicu borcima NOARA-a i Spomen obilježje šehidima i poginulim borcima općine Visoko, nastavljeno je obilježavanje ovog značajnog datuma.

U okviru obilježavanja Dana otpora agresiji upriličen je i Marš „Linijama odbrane grada“, te brojne sportske manifestacije - Turnir u stonom tenisu, revije borilačkih vještina i ritmičke gimnastike, fudbalske utakmice, a Odred izviđača „Visoko“ organizovao je druženje uz logorsku vatru.

Prijemom Kolegija Općinskog vijeća za predstavnike boračkih udruženja i organizacija, te Svečanom sjednicom Općinskog vijeća završeno je obilježavanje Dana otpora agresiji na području općine Visoko.



## OBILJEŽENA 23. GODIŠNJICA POGIBIJE KOMANDANTA TEUFIKA TUFE BUZE I SUBORACA AMIRA BAJRAKTAREVIĆA I SAFETA SUBAŠE



**O**obilježavanje 23. godišnjice pogibije ova tri visočka heroja, 16. juna započelo je okupljanjem i odavanjem počasti na Spomen obilježju šehidima i poginulim borcima općine Visoko, a nastavljeno je obilaskom mjesa pogibije rahmetli Safeta Subaše u Kralupima i mjesa pogibije rahmetli Teufika Tufe Buza i Amira Bajraktarevića u mjestu Vrela - Krčevine.

Prigodan čas historije održan je ispred kasarne "Teufik Tufo Buza" kojem su prisustvovali predstavnici Općine,

članovi boračkih udruženja, saborci i brojni građani općine Visoko, a prisutnim se obratila načelnica Amra Babić koja je u svom govoru istakla kako ne smijemo nikada zaboraviti heroje ovog grada koji su, kada je bilo najpotrebnije, stali u odbranu ne samo vlastitih života i porodica, nego svih građana naše općine.

Naša obaveza je sačuvati od zaborava svijetle likove i događaje iz najtežeg perioda bliske BH prošlosti, kako se zlo i zločini više nikada ne bi ponovili.

## ODRŽANA MANIFESTACIJA „SJEĆANJE NA 20. JUNI '92.”

**M**anifestacija „Sjećanje na 20. juni '92.” organizirana je povodom obilježavanja ovog značajnog datuma koji je ujedno i Dan mjesnih zajednica Moštare, Kološići, Orašac i Zimča. U 2015. godini Manifestacija je bila bogatija za nekoliko novih sadržaja. Pored standardnih sportskih aktivnosti takmičarskog karaktera (takmičenje u streljaštvu, krosu na 5.200 m, malom nogometu i šahu) upriličeni su i promotivni splet karate-vježbi, te promocija konjičko-jahačkog sporta. Kulturno-umjetnički program je obogaćen novim sadržajima: Izložbama promotivno - prodajnog karaktera, promocijom knjige autora Džemala Softića, izložbama rukotvorina, proizvoda od drveta, te grnčarije.





## IZ VISOKOG U POTOČARE ISPRAĆENA KOLONA S TABUTIMA 136 SREBRENIČKIH ŽRTAVA GENOCIDA

z Visokog je dostojanstveno, ali uz suze i duboko poštovanje, petnaesti put po redu ispraćena tužna kolona s tabutima posmrtnih ostataka 136 Srebreničana koji su ukopani 11. jula 2015. godine u Memorijalnom centru Potočari. Među ispraćenim žrtvama je bilo 18 maloljetnika, a najstarija žrtva na ovogodišnjem ukopu bio je 75-godišnjak.

Prisutnim se obratila načelnica općine Visoko Amra Babić: "Ovi tabuti, bijeli šehidski nišani diljem BiH i Memorijalni centar Potočari su naši dokazi i naša historija, naša Rezolucija o Srebrenici, naša obaveza da ne odustanemo od širenja istine, traženja pravde i kažnjavanja zločinaca". Broj do sada ukopanih žrtava Genocida u Srebrenici je 6377.





## OBILJEŽEN DAN ŠEHIDA U VISOKOM

Predstavnici Općine Visoko, koordinacioni odbor i građani su 18.07.2015. godine polaganjem cvijeća, učenjem Fatihe i prigodnim programom na centralnom Spomen obilježju šehidima i poginulim borcima općine Visoko obilježili Dan šehida, koji se inače obilježava drugog dana Ramazanskog bajrama i predstavlja priliku da se sjetimo najboljih i najhrabrijih sinova domovine koji su dali živote za odbranu Bosne i Hercegovine.

Prisutnim se obratila i načelnica Babić riječima: „Bijeli nišani koje ćemo danas obići nisu samo podsjetnik ovozemaljske prolaznosti nego i putokaz kako živjeti zajedno i dokaz da bez truda i žrtvovanja nema uspjeha.

Danas se sjećamo i zla fašizma, nacizma, zla uništavanja drugog i drugačijeg, zla etničkog čišćenja, zla genocida. I nije to puko sjećanje radi sjećanja, nego sjećanje radi pouke i poruke da budemo oprezni i svjesni da to zlo još uvijek postoji i da će biti jako onoliko koliko mi budemo slabi. Stoga vas pozivam da se na Dan šehida obavežemo da ćemo raditi na stalnoj

promociji i unapređivanju univerzalnih ljudskih vrijednosti, posebno uvažavanju i toleranciji, ali i čuvanju i izgradnji vlastitog identiteta kroz vjeru i tradiciju.“

Općina Visoko u saradnji sa Organizacijom porodica šehida i poginulih boraca „Visoko 92“ dugi niz godina povodom Dana šehida raspisuje konkurs za izbor najuspješnijih literarnih i likovnih radova pod nazivom „Sjećanje na šehide“ za učenike osnovnih i srednjih škola.

Ovim povodom u Maloj sali Općine Visoko pročitani su najuspješniji literarni radovi. Nagrađenim učenicima načelnica Babić je čestitala i naglasila da je vrijednost njihovih radova tim veća jer su oni mlađa generacija koja nije doživjela rat, ali su kroz priče svojih roditelja i porodica svjesni značenja riječi agresija, genocid i šehid, te kroz svoje likovne i literarne radove njeguju sjećanje na njih.

Obilaskom Šehidskog mezarja na Gradskim grobljima Visoko, te polaganjem cvijeća i učenjem Jasina i Fatihe završeno je obilježavanje Dana šehida.





## SVEČANO OBILJEŽEN DAN OPĆINE VISOKO



Manifestacija obilježavanja 29. augusta - Dana općine Visoko započela je otvorenjem međunarodnog rukometnog turnira „BE THE CHAMPION 2015 VISOKO“, dok su se stranice historije čitale u prelijepom ambijentu na lokalitetu Mila. Omladinski hor iz Zenice izveo je sjajan koncert na mjestu na kojem je 1377. godine krunisan prvi bosanski kralj Tvrtko I Kotromanić, za vrijeme čije vladavine je Bosna bila najmoćnija država zapadnog Balkana.

Brojni gosti pratili su izuzetno bogat kulturno-umjetnički program. Dodatni sjaj ovom lokalitetu dala je i izložba Adina Sirće na temu „Od Kulina bana do današnjih dana“.

Načelnica Amra Babić, u obraćanju prisutnim, podsjetila je na bogatu historiju BiH, koja je kroz bosanske kraljeve utkana u Visoko i okolinu, kao i važne dokumente poput Povelje Kulina bana, koju nazivaju rodnim listom bosanske državnosti, pisane 29. augusta 1189. godine - datuma koji se danas obilježava kao Dan općine Visoko.

Polaganjem cvijeća na Spomen kosturnicu borcima NOAR-a i Spomen obilježju šehidima i poginulim borcima, nastavljeno je obilježavanje Dana općine Visoko.

Na Svečanoj sjednici Općinskog vijeća Visoko, dodijeljena su javna priznanja općine Visoko za 2015. godinu.

„Povelja općine Visoko za životno djelo“ uručena je Senadu Hodoviću za postignute rezultate i značajan doprinos u oblasti kulture, naučnom i obrazovnom području rada i djelovanja, te afirmaciji općine Visoko.





Dobitnik „Povelje počasnog građanina“ je Vejsel Tiryaki, načelnik općine Altındağ, i to za značajne rezultate u razvoju i afirmaciji općine Visoko.

Javno priznanje „Povelja općine Visoko u 2015. godini“ dodijeljena je Edinu Kajeviću za postignute rezultate, značajan doprinos u oblasti sporta i afirmaciji općine Visoko.

Općinska načelnica Babić na Svečanoj sjednici obratila se prisutnim: „Ovo je prilika da se sa dužnim poštovanjem sjetimo svih pojedinaca, institucija, privrednih kolektiva, organizacija i udruženja koji su svojim radom i zalaganjem dali doprinos razvoju općine Visoko, ističući kako svi subjekti javnog života prepoznaju trud, namjere i nastojanja da općinu Visoko vratimo na nivo prepoznatljivih, uspješnih i razvijenih općina“.

Svečanosti obilježavanja Dana općine Visoko prisustvovao je velik broj gostiju iz kulturnog, javnog i političkog života, kao i ambasadori i drugi strani gosti. Ovom prilikom, načelnica Babić je gostima predstavila i projekat Trga žrtava genocida u Srebrenici sa šetnicom.

Svečani dio postavljanja kamena temeljca za izgradnju nove zgrade Obdaništa u Prijekom obradovao je kako odrasle tako i mališane, koji su svojim izvedbama uljepšali ovaj događaj. Kamen temeljac su položili donator i prijatelj Visokog Ahmed Alabras i načelnica općine Visoko Amra Babić. Nakon toga pristupilo se potpisivanju Ugovora o finansiranju izgradnje obdaništa.

U okviru obilježavanja Dana općine Visoko upriličena je i izložba kaligrafских radova akademskог slikara Mirze Mameledžije, te svečani koktel za prisutne goste.





## U VISOKOM OBILJEŽENA NOVA 1437. HIDŽRETSKA GODINA

U Visokom je, po prvi put na otvorenom, na Trgu žrtava genocida u Srebrenici, 15. oktobra obilježena Nova 1437. hidžretska godina. Brojni posjetioci su uživali u bogatom programu koji su pripremili BZK „Preporod“ Visoko, Medžlis IZ Visoko, Općina Visoko, KUD „Visoko“, Gimnazija „Visoko“, OU „Bedem“ Donje Moštare i „Aktiv žena“ Donje Moštare.



**P**risutnim se obratila i Općinska načelnica Amra Babić: „Imamo priliku da na ovom mjestu slavimo život i sve ono što život znači. Da kroz nauku, kulturu i sport čuvamo našu državnost, nacionalnost i ono što nas čini Bošnjacima u srcu Evrope. Poruka koju treba svi da prenesemo je poruka mira, ljubavi, tolerancije i suživota, ali da ne zaboravimo da imamo svoju tradiciju, vjeru i identitet, i da je naša obaveza da sve čuvamo i gradimo, jer samo tako možemo biti aktivni sudionici vremena u kojem živimo“.

Nakon prigodnog programa na Trgu, obilježavanje Nove hidžretske godine je nastavljeno u ugodnom ambijentu bašte Jagoda, uz miris i ukus halve, te bosanske kahve, a prisutni su izrazili želju da ovakvi događaji prerastu u tradiciju.



## U VISOKOM OBILJEŽENA 638. GODIŠNICA KRUNISANJA KRALJA TVRTKA I KOTROMANIĆA



**B**ošnjačka zajednica kulture „Preporod“ Visoko je u saradnji sa Zavičajnim muzejom Visoko, Gimnazijom „Visoko“, Franjevačkom klasičnom gimnazijom „Visoko“, Galerijom „Fuad Šećerović MMXIV“ i KUD „Visoko“ organizovala obilježavanje 638. godišnjice krunisanja Tvrtka I Kotromanića (1377-1391.), prvog bosanskog kralja.

Program obilježavanja je započeo otvaranjem izložbe pod nazivom „Bosansko kraljevstvo“ u Galeriji „Fuad Šećerović MMXIV“ Visoko, gdje je profesor Šećerović održao kratko predavanje o postanku Galerije čiji artefakti svjedoče o dugogodišnjoj kulturi i historiji Bosne.

Prof. Dubravko Lovrenović je u Gradskom kinu održao predavanje „Proglašenje Bosne kraljevstvom 1377.“ povodom 30. godišnjice smrti dr. Pave Anđelića i njegovog doprinosa bosanskohercegovačkoj medijevalistici.

Učenici Gimnazije „Visoko“ i Franjevačke klasične gimnazije „Visoko“, te Kulturno-umjetničko društvo „Visoko“ upriličili su prigodan program u Gradskom kinu, dok je u visočkom Zavičajnom muzeju otvorena izložba pod nazivom „Srednjovjekovna Bosna“.





## ODRŽANA MANIFESTACIJA "DA SE NE ZABORAVI - KONDŽILO 2015"

**M**jesna zajednica Radovlje i Savjet MZ Radovlje organizovali su jedanaestu po redu manifestaciju povodom sjećanja na šehide ove mjesne zajednice, pod nazivom „Da se ne zaboravi - Kondžilo 2015“. U okviru ove manifestacije održana su brojna sportska takmičenja: mini maraton na dionici od spomen česme u Radovlu do Kondžila, takmičenje u streljaštvu u organizaciji Udruženja strijelaca „20. juni '92.“ iz Donjeg Moštra, takmičenje u trčanju na 100 i 200 metara, skok u dalj, te nogometni turnir u kojem je učestvovalo 20 ekipa. Zahvaljujući donatorima, za one sa najboljim rezultatima osigurane su i prigodne nagrade.



## U VISOKOM OBILJEŽEN 25 NOVEMBAR - DAN DRŽAVNOSTI BIH



**O**obilježavanje 25.novembra - Dana državnosti BiH, započelo je polaganjem cvijeća na Spomen-kosturnicu poginulim borcima iz NOAR-a i na Spomen-obilježju šehidima i poginulim borcima iz proteklog rata.

U Velikoj sali Općine Visoko je održana Svečana sjednica Općinskog vijeća, na kojoj se prisutnim obratila Općinska načelnica Amra Babić prigodnim govorom i podsjetila na važnost ovog historijskog datuma. Svečanost su svojim nastupom obogatili učenici OŠ "Mula Mustafa Bašeskija" Donje Moštare i učenica Muzičke škole "Avdo Smajlović" Visoko-Emina Ferzan.



## U OPĆINI VISOKO INVESTIRANO PREKO 7 MILIONA KM U OBLASTI OBRAZOVANJA, KULTURE I SPORTA U PROTEKLE TRI GODINE

U općini Visoko je u posljednje tri godine u oblasti obrazovanja, kulture i sporta investirano 2.061.906 KM, i to bez donatorskih sredstava koja iznose oko 5 miliona KM, čime ovaj iznos premašuje 7 miliona KM.

Općina Visoko redovno izdvaja novčana sredstva za školska takmičenja učenika osnovnih škola, daje finansijsku podršku za Dan škola sa područja općine Visoko, kao i nagrade učenicima koji se plasiraju na međunarodna takmičenja. Za pomoć kod nabavke udžbenika od 2012. godine je izdvojeno 242.250 KM.

Povodom Dana šehida, Općina u saradnji sa osnovnim i srednjim školama i Udruženjem porodica šehida i poginulih boraca „Visoko 92“ svake godine provede nagradni Konkurs za najbolje tematske likovne i literarne radove učenika.

Na studentske stipendije je u navedenom periodu iz Ministarstva za obrazovanje, kulturu i sport Ze-do kantona izdvojeno 361.480 KM, dok je Ministarstvo za boračka pitanja osiguralo 453.200 KM.

Za školsku 2012/2013. godinu su putem Javnog poziva dodijeljene stipendije za nadarene studente. Odobreno je 12 stipendija u ukupnom iznosu od 13.200 KM, a u narednoj godini 26 studenata je dobilo stipendije u ukupnom iznosu od 28.600 KM.

U 2015. godini Općina je finansirala odlazak IX razreda svih osnovnih škola sa područja općine Visoko u posjetu Memorijalnom centru Potočari, Srebrenica.

Za sport je u protekle tri godine uloženo 865.480 KM na području općine Visoko. U 2013. godini je izvršena sanacija nogometnih igrališta „Gračanica“ i „Porječani“.

U okviru sportskog kompleksa „Luke“ izvedeni su radovi na izgradnji pomoćnog stadiona, gdje je postavljena umjetna trava, prateća infrastruktura, ograda, klupe, nove sjedalice na tribinama, osvjetljavanje pomoćnog stadiona LED rasvjetom, te su završeni radovi na renoviranju svlačionica. Košarkaško igralište je sanirano, a na rukometnom terenu je postavljena nova asfaltna podloga i tribine.

Za opremanje Gradske biblioteke „Visoko“ u Kulturnom Centru Altindağ-Visoko, Općina je izdvojila 21.100 KM.

Započet je projekat iluminacije nacionalnog spomenika Srednjovjekovni kraljevski grad Visoki izgradnjom javne rasvjete, vrijednosti 10.000 KM.

U dosadašnjim aktivnostima općinske administracije na projektu iluminacije i obilježavanju arheološkog lokaliteta „Mili“ utrošeno je 29.596 KM, a na osnovu Javnog poziva Ministarstva kulture i sporta Federacije BiH, Općina Visoko uspješno je dobiti sredstva u iznosu 23.000 KM kako bi se izmještanjem lokalne saobraćajnice trajno riješilo pitanje zaštite i očuvanja ovog iznimno važnog arheološkog nalazišta.

Općina Visoko je u proteklom periodu izdvojila značajna finansijska sredstva za kulturne manifestacije „Visočko ljeto“, „Dani Avde Smilovića“, i „Dani Zaima Muzaferije“.

U okviru donatorskih sredstava posebno treba izdvojiti finansiranje izgradnje Kulturnog centra Altindağ-Visoko, u vrijednosti od oko 5 miliona KM koje je građanima Visokog donirala turska Općina Altındağ. Riječ je o modernom objektu na 3.200 m<sup>2</sup> površine, sa kongresnom dvoranom, bibliotekom, dvije dvorane za multipleks kino, nekoliko kabinetova za razne vidove edukacije, izložbenim prostorima, te drugim sadržajima.



## OPĆINA VISOKO VIŠE NIKOME NE DUGUJE

„Općina Visoko u potpunosti je sanirala dugovanja i konsolidovala budžet. Javna sredstava Općine i javni interes u potpunosti su stavljeni u službu građana i usmjereni da u okviru zakonitosti kreiraju ambijent za razvoj općine i podižu razinu kvaliteta života u njoj“, istakla je načelnica Općine Visoko mr. Amra Babić povodom podnošenja godišnjeg izještaja o radu u 2015. godini.

**N**ačelnica Babić preuzeila je dužnost 14. novembra 2012. godine. Naslijedjeni akumulirani deficit na dan 31.12.2012.godine iznosio je 2.113.547,79 KM. Nizom mjera koje su poduzete, nova općinska administracija je uspjela povećati prihode i istodobno smanjiti rashode, te tako u potpunosti sanirati dugovanja.

“Jedan od četiri strateška cilja programa sa kojim sam dobila povjerenje građana Visokog bila je stabilizacija budžeta i budžetske potrošnje – uvođenje trezorskog načina rada, pokriće deficit-a, obezbjeđenje efikasnosti, transparentnosti i zakonitosti. Mimo trendova deficit-a koje bilježe viši nivoi vlasti, Općina Visoko je prije svega domaćinskim odnosom uspjela sanirati sva dugovanja iz prethodnog perioda. Nije bilo jednostavno, jer smo uporedo izmirivali stare obaveze, a nismo pravili nove. Promijenili smo navike, te Općinu koja je do tada grcala u dugovima uspjeli za kratko vrijeme uvesti u društvo prosperitetnih Općina. Dokazali smo da su promjene moguće, i što je najvažnije, to su prepoznale domaće institucije, kompanije, ali i međunarodne instance. Uspjeli smo istovremeno vratiti dugove i investirati preko 11,3 miliona KM u nove projekte za dobrobit svih stanovnika Visokog.”, izjavila je načelnica Babić.

Suficit iz poslovanja za 2013. godinu iznosio je 723.598,72 KM. Suficit iz poslovanja za 2014. godinu iznosio je 875.439,97 KM. Suficit iz poslovanja za 2015. godinu iznosio je 433.232,00 KM. Iz ovoga se može zaključiti da je budžet u potpunosti konsolidovan, likvidan i solventan, te da je akumulirani gubitak iz prethodnih godina skoro u cijelosti saniran do 31.12.2015. godine.

Budžetom Općine Visoko za 2015. godinu planirani su prihodi u iznosu od 13.724.900,00 KM, a izvršeni su u iznosu 13.055.484,81 KM ili 95,12 % od plana.

“U periodu koji je pred nama mogu obećati nastavak potpune budžetske transparentnosti i zakonitosti, tj. osigurat će zakonito trošenje javnih sredstava uz puno učešće javnosti u svakom koraku budžetiranja. Nastaviti ćemo sa dosljednim poštivanjem Zakona o budžetima i Zakona o trezorskom poslovanju. Istrajat ćemo na efikasnom trošenju budžetskih sredstava u skladu sa utvrđenim prioritetima, vodeći računa o indirektnim efektima budžetske potrošnje. I dalje ćemo nastojati proaktivnim pristupom planiranju i realizaciji budžetskih prihoda rješavati probleme građana, ali i nastaviti sa daljim poboljšanjem ambijenta za razvoj Visokog kao jedne od vodećih općina u BiH”, završava Babić.



## U VISOKOM U PROTEKLIH PET GODINA BROJ ZAPOSLENIH POVEĆAN ZA 10%

**Općina Visoko bilježi u posljednjih pet godina porast broja zaposlenih. 2015. godine broj zaposlenih je iznosio ukupno 9.923, dok je 2011. broj zaposlenih na području ove općine Visoko bio 9.019, što je porast od 10%.**

**O**vo su podaci JU „Služba za zapošljavanje ZDK - Biro Visoko“, a koji se baziraju na podacima o broju prijavljenih lica na zdravstveno osiguranje kod Zavoda za zdravstveno osiguranje po osnovu radnog odnosa.

„Porast broja zaposlenih na području općine Visoko rezultat je novih investicija, otvaranja novih proizvodnih objekata i rezultat aktivnosti Općine Visoko na poboljšanju poslovnog okruženja. Naš plan razvoja općine koji smo donijeli i počeli provoditi krajem 2012. godine urođio je plodom. zajedno sa privrednicima i građanima Visokog u protekle tri godine uspjeli smo napraviti preokret u rješavanju ovog, za Općinu ali i cijelu državu, trenutno najvećeg problema – otvaranje novih radnih mesta. Visoko je oduvijek bilo privredni, odnosno industrijski i trgovачki centar. Želimo Visokom vratiti stari sjaj, te vjerujem da smo u tom smislu na dobrom putu.“, izjavila je načelnica Općine Visoko mr. sci Amra Babić.

Najveći porast broja zaposlenih općina Visoko bilježi u

protekle tri godine, kada je zaključno sa 2015. godinom u odnosu na 2012. broj zaposlenih povećan za 723, što je povećanje od 7,85%. U ovom periodu, od 2013. godine do 2015. godine najveći nosioci novih investicija na području općine Visoko, a koje su rezultirale povećanjem broja radnih mjesta, su privredna društva iz oblasti kožarske i tekstilne industrije i to: „Alma Ras“, „Company D&U“, „Koteks“ i „Sinerga“.

„U 2014. i 2015. godini smo imali nekoliko strateški usmjerjenih aktivnosti koje su direktno uticale na ovakav rezultat. Uključili smo se u GOLD projekat USAID-a, proveli projekat provođenja Regulatorne reforme i pojednostavljenja administrativnih postupaka, kao i niz projekata usmjerjenih na unaprjeđenje poljoprivredne proizvodnje, posebno proizvodnje malina i jagoda. Sve to je imalo direktnog uticaja na rast broja zaposlenih lica u ovom periodu. Dalju šansu za razvoj i povećanje broja radnih mesta vidimo u kožarskoj, tekstilnoj, prehrambenoj industriji i proizvodnji hrane, ali i u sektoru turizma i razvoju trgovine.“, riječi su načelnice Babić.

Godina	2011.	2012.	2013.	2014.	2015.
Broj zaposlenih	9.019	9.200	9.300	9.500	9.923



## OPĆINA VISOKO PROGRAMOM KAPITALNIH ULAGANJA U 2016. GODINI INVESTIRA 1,5 MILION KM

**Općina Visoko u 2016. godini prema programu kapitalnih ulaganja planira uložiti 1.500.000 KM u projekte vezane za cestovnu i kanalizacionu infrastrukturu, te javnu rasvjetu. U proteklom periodu realiziran je veliki broj infrastrukturnih projekata višemilionske vrijednosti, u koje su uložena sredstva iz budžeta Općine Visoko, ali i drugih nivoa vlasti, te iz donatorskih fondova.**

**U** 2016. godini nastavlja se trend investiranja, te pozicioniranja Visokog u jednu od najprosperitetnijih i najuspješnijih općina u Bosni i Hercegovini.

„U Općini Visoko nastavljamo trend investiranja s ciljem rješavanja problema sa kojima se građani susreću. Fokus je na daljoj izgradnji cestovne i kanalizacione infrastrukture koja će omogućiti viši kvalitet života i rada u Visokom. Uz ove investicije koje su dobine podršku većine u Općinskom vijeću, pokretanjem procedura na putu smo da trajno riješimo i probleme vodosnabdijevanja na teritoriji cijele općine, što će značiti i okončanje jednog od naših strateških ciljeva kreiranja infrastrukturnih preduvjeta za razvoj općine Visoko“, izjavila je načelnica Amra Babić.

Za cestovnu infrastrukturu će biti izdvojeno 1.410.000,00 KM, i to: projekat izgradnje pješačkog mosta na rijeci Bosni (Luke-Ozrakovići), asfaltiranje saobraćajnice i parkingu u naselju Prijeko, rekonstrukcija lokalnog puta u naselju Slatina – Kalići, rekonstrukcija lokalnog puta Šošnje – Dolovi, rekonstrukcija mosta na Lješevačkom potoku u naselju Monjare, rekonstrukcija lokalnog puta u naselju Kula Banjer,

rekonstrukcija lokalnog puta Gornja – Donja Seoča – nastavak, rekonstrukcija lokalnog puta u naselju Kovačići, rekonstrukcija lokalnog puta Veruša, rekonstrukcija lokalnog puta Čifluk - Slatina, asfaltiranje lokalnog puta - zaseok Grab, asfaltiranje lokalnog puta u naselju Bulčići, rekonstrukcija lokalnog puta u naselju Oštrac, rekonstrukcija lokalnog puta Donji – Gornji Stuparići, asfaltiranje puta u naselju Prhovo, rekonstrukcija lokalnog puta Mulići – Porječani, rekonstrukcija trga Džemala Bijedića, rekonstrukcija lokalnog puta Upovac – Dolovi, rekonstrukcija lokalnog puta u naselju Čekrekčije, rekonstrukcija lokalnog puta Krč – Bradve, rekonstrukcija lokalnog puta Goruša – Podvinci, rekonstrukcija lokalnog puta Tramošnjik – Ulukovac.

Ostali projekti: izgradnja kanalizacione mreže u naselju Vratnica, izgradnja kanalizacione mreže u naselju Zimča, nastavak radova na izgradnji javne rasvjete u naselju Čekrekčije – RP 445 – ŽCP, izgradnja rasvjete u MZ Topuzovo Polje, izgradnja javne rasvjete u naselju Smršnica.

Nosilac aktivnosti na realizaciji ovog Programa kapitalnih ulaganja u infrastrukturu je Općina Visoko, Služba za finansije, privredu i lokalni ekonomski razvoj.



## USPJEŠNO OKONČANA PROBLEMATIKA RADNIKA „VELEPROMET-MALOPRODAJA“ d.o.o. VISOKO

**N**ačelnica Amra Babić je obavijestila javnost da se Općini Visoko „Velepromet-Maloprodaja“ d.o.o. Visoko obratilo dopisom u kojem je navedeno da je robna kuća „Vema“ prodata u sudskom izvršnom postupku kupcu „Suša Commerce“ d.o.o. Visoko po cijeni od 1.900.000,00 KM, te da na navedenoj nekretnini postoji založno pravo Porezne uprave Zenica u visini od oko 1.750.000,00 KM od kojih je samo oko 500.000,00 KM predviđeno za doprinose PIO/MIO radnika „Velepromet-Maloprodaja“.

Općinska načelnica je u skladu sa mogućnostima i ovlaštenjima pokrenula postupak kod svih relevantnih institucija s ciljem da se cjelokupan iznos od prodaje robne kuće „Vema“ usmjeri na doprinose PIO/MIO, te je poduzela niz aktivnosti u vezi navedenog.

U saradnji sa Općinskim pravobranilaštvom, načelnica se obratila Vladi FBiH, Ministarstvu finansija FBiH, Federalnom zavodu PIO/MIO - Kantonalnoj administrativnoj službi PIO/MIO Zenica, sa prijedlogom da isti u skladu sa važećim zakonskim propisima i ovlaštenjima pokrenu postupak u cilju donošenja Odluke o usmjeravanju ukupnog naplaćenog iznosa od prodaje „Veme“ na doprinose PIO/MIO radnika „Velepromet-Maloprodaja“, kako bi većina radnika ostvarila uslove prava na penziju. U tom pravcu održani su i sastanci sa predstvincima Porezne uprave Zenica.

Na račun Ministarstva finansija Vlade ZDK i Općine Visoko uplaćen je iznos sredstava - cca 910.000 KM od

prodaje objekta „Vema“, a sa računa Općinskog suda u Visokom, te je isti raspoređen na prihode prema Kantonu i Općini Visoko. Menadžment „Veleprometa-Maloprodaje“ i direktor prethodno su obavili razgovore sa Vladom ZDK, gdje je dogovorenko da se interventno, do 31.12. 2015. godine, dio sredstava na ime plaćanja doprinosa za PIO uplati za uposlenike „Velepromet-Maloprodaje“, a posebno za one koji su stekli uvjete za penzionisanje (imajući u vidu najave novog Zakona o PIU koji je trebao stupiti na snagu 01.01.2016.godine), te dogovorili da iznos od oko 240.000 KM usmjere za uplatu PIO za 33 radnika.

“Općinsko vijeće Visoko donijelo je Odluku o usvajanju rebalansa Budžeta za 2015. godinu. Do 31.12.2015. godine prebacivanjem sredstava na račun PIO, osigurana je linearna uplata za sve radnike „Velepromet-Maloprodaje“ po godinama nastanka te obaveze. Skupština ZDK je rebalansom budžeta ZDK za 2015. godinu preusmjerila 240.000 KM koje su iskorištene interventno za 33 uposlenika koji su stekli uvjete za penziju. Ostatak sredstava početkom 2016. godine Vlada ZDK treba preusmjeriti na plaćanje obaveza PIO za radnike „Veleprometa-Maloprodaje“. Na ovaj način dobio se efekat penzionisanja svih onih koji su stekli uvjete za penzionisanje, a istovremeno stekli su se uvjeti da se ostalim uposlenicima uveže staž“, istakla je ovim povodom načelnica Općine Visoko, Amra Babić.



## ZVANIČNO OTVOREN „TRG ŽRTAVA GENOCIDA U SREBRENICI“

**„Trg žrtava genocida u Srebrenici“ otvoren je 5. oktobra 2015. godine u Visokom s ciljem predstavljanja jedinstvenog obilježja u Bosni i Hercegovini, te vječnog podsjetnika na Srebrenicu, mjesto najvećeg genocida nakon II svjetskog rata.**

**S**pomen obilježje čine amfiteatar, fontana i spomen-ploča. Sa trotoara Ulice Alije Izetbegovića projektiran je kaskadni silazak na šetnicu u obliku amfiteatra, koji se može koristiti za sjedenje, te je orijentiran prema rijeci Fojnici i fontani sa platoom. Voda koja teče ispod kamene replike Ilijana, simbola bosanske državnosti još od srednjeg vijeka, simbolizira krv i ugašene živote. Na trenutak ponire u dnu amfiteatra da bi ponovo izvirala u fontani kao simbol novog života koji se rađa.

Veliki broj zvanica iz političkog, kulturnog i javnog života prisustvovao je otvorenju, među kojima su bili: Munira Subašić, predsjednica Udruženja "Majke enklava Srebrenica i Žepa", prof.dr. John Clark, glavni forenzički patolog za ICTY, Mersed Smajlović, direktor Memorijalnog centra Potočari, NJ.E. Jurian Kraak, Ambasador Kraljevine Holandije, Miralem Galijašević, Premier ZDK, Amir Zukić, Federalni ministar razvoja, poduzetništva i obrta, Nurđehan Šahinović, Ministar za rad, socijalnu politiku i izbjeglice ZDK, Amir Zukić, generalni sekretar Stranke demokratske akcije BiH, Draženka Subašić, predsjedavajuća Skupštine ZDK, Semir Šut, Komesar MUP-a ZDK, Alma Džaferović, tužiteljica Kantonalnog tužilaštva Tuzlanskog kantona,

Vesna Travlanjin, direktorka Saveza Općina i Gradova FBiH, predstavnici turskog LOT-a u BiH, zastupnici kantonalnog i federalnog nivoa vlasti, Akif Fazlić, načelnik Općine Ilijaš, Muhamed Ramović, načelnik Općine Goražde, Miralem Klisura, načelnik Općine Fojnica, Damir Filipović, predsjedavajući Općinskog vijeća Ilijaš, dr. Džemaludin Latić, profesor na Fakultetu islamskih nauka u Sarajevu i autor „Srebreničkog inferna“, prof.dr. Lamija Hadžiosmanović, predstavnici kulturnih i vjerskih zajednica, te mnogobrojni građani Visokog i drugih bh. gradova.

Nakon dodjele zahvalnica upriličena je projekcija kratkog filma „Visoko-Srebrenica“ koji opisuje neraskidivu vezu između ova dva grada. Članovi Omladinskog hora iz Zenice izveli su integralnu verziju „Srebreničkog inferna“ autora prof.dr. Džemaludina Latića. Činom otkrivanja spomen ploče, Načelnica Babić i predsjednica Udruženja „Majke enklava Srebrenica i Žepa“ Munira Subašić zvanično su otvorile „Trg žrtava genocida u Srebrenici“.

Na kraju je uslijedio obilazak novoizgrađene šetnice koja se nalazi uz Trg, a na čijim zidovima je Umjetnički kolektiv „HAD“ specijalnom tehnikom urezao motive koji obilježavaju uspomenu na žrtve genocida u Srebrenici.



## GOVOR GLAVNOG FORENZIČKOG PATOLOGA ZA ICTY - prof.dr. JOHN CLARK-a



"Na posljednjem događaju vezanom za dešavanja u Srebrenici, prisustvovao sam u julu 2015. godine, na dan obilježavanja godišnjice, ne u Potočarima već u mom rodnom gradu, Edinburgu u Škotskoj, u jednoj katedrali staroj 600 godina. Bila nam je tada čast ugostiti četiri majke Srebrenice, baš kao i večeras. Najupečatljiviji u sjećanju ostao mi je gajdaš koji je upriličio solo izvedbu poznate škotske tužne pjesme (žalopijke) pod nazivom „Poljsko cvijeće“. To je jedna tužna i žalosna melodija koja sjeća na bitku između Škotske i Engleske prije 500 godina, u kojoj je poginulo više od 10 000 Škota.

U to vrijeme, pričalo se da ne postoji ni jedna porodica koja nije izgubila bar jednog člana. Stoga smatram da je na tom događaju, prikladno odabrana i posvećena Bosni, gdje su se desila stradanja čak i većih razmjera, bilo da je riječ o Srebrenici, Prijedoru, Višegradu, Bihaću... Sa priče o katedrali staroj 600 godina i tužnoj melodiji, prelazimo na nešto sasvim novo u Visokom, nešto što će stoljećima služiti kao spomen na događaje iz prošlosti. Gradonačelnica Amra i gradonačelnik Camilo, majke Srebrenice i Žepe, i ostali večerašnji zvaničnici i gosti... velika je čast biti pozvan na ovu komemorativnu svečanost, a još veća čast reći par riječi.

Ja sam 1998. godine došao u Visoko na dvije sedmice, gdje sam radio kao patolog i član tima ICTY-a na Gradskim grobljima. Tada smo radili na slučajevima sekundarnih grobnica uz puteve Čančari i Hadici. Naredne tri godine, moje posjete bile su duže, a ja sam bio zadužen za aktivnosti u mrtvačnici. Tad sam dobio priliku upoznati ljudе i sam grad, u svjetlu prije nego je postao poznat po piramidama.

U periodu od 4 godine, po mojoj procjeni, bilo nas je 100-200, iz bar 33 različite države svijeta – svi smo mi spavali, jeli, pili, kupovali u ovom gradu. Svi mi gajimo vlastita sjećanja na Visoko i na posao koji smo radili, ali ono u čemu će se svi složiti jeste ljudska toplina i gostoprимstvo koje smo uživali dok smo ovdje boravili, te mnogobrojna prijateljstva koja i danas traju. Večeras se osjećam kao predstavnik svih nas.

Kao glavni patolog za ICTY moj zadatak, i privilegija, jeste da predstavim pronalaske haškom sudu, na suđenjima za ubijene čiji je broj svima nama poznat. U svakom izvještaju, baziranom na hiljadama izvještaja o pojedinačnim autopsijama, Visoko je istaknuto kao lokacija gdje je urađen sav posao. Razlog zašto je Visoko izabранo u tu svrhu, je angažman ljudi koji su osmislili i ponudili nam prostor za rad. Konkretno mislim na Asmira Hodžića koji je izgradio objekat na Gradskim grobljima, koji nam je idealno odgovarao.

Tokom ovog perioda mnogo je toga urađeno, i na kraju ja sam osmislio prepoznatljivi simbol koji je sad okačen na mom zidu kao divan podsjetnik na taj period. Nakon našeg odlaska rad nije prekinut, nastavili su ga bosanski stručnjaci, a jedan od njih je i moj prijatelj, Nermin Sarajlić, koji je večeras s nama. Naravno, Visoko nije samo lokacija gdje su se vršile istrage, Visoko je značajno za svaku godišnjicu u Potočarima i za nastajanje spomenika velike ljepote i tihog poštovanja. Bio sam tamo prošle godine i sjetio sam se kako je 2001. godine bila postavljena samo jedna bijela ploča, prva od svih postavljenih narednih godina, a sve su napravljene u Visokom.

Gradonačelnice Amra, Vaš grad treba biti ponosan zbog bitne uloge u istraživanju ratnih zločina koji su se desili u ovoj državi, i zbog nesebične brige o mnogobrojnim žrtvama. Divno je što tome svjedoči i ovaj spomenik, koji će zasigurno biti razlog više da moje kolege i ja nastavimo održavati svoje veze sa ovim gradom. Svjestan sam, naravno, da su sjećanja i spomenici jedno; postoje i sadašnjost i budućnost i potreba da se ostvari nešto dobro i za one koji tu žive – nada, posao, zdravstveno osiguranje itd. Zato bih, ukoliko je to moguće, želio razgovarati s Vama, gradonačelnice, kako mi, čije su karijere definisane onim što smo radili ovdje prije 15 godina, možemo to najbolje praktično pokazati stanovnicima Visokog i Bosne i Hercegovine.“.



## GOVOR NAČELNICE OPĆINE VISOKO mr.sci. AMRE BABIĆ



„Čast mi je što večeras mogu s Vama podijeliti sreću i zadovoljstvo zbog realizacije prve faze izgradnje „Trga žrtava genocida u Srebrenici sa šetnicom“. Neću govoriti o tome čija je ideja ovaj projekat. Neću govoriti ni imena institucija, niti zaslužnih pojedinaca za realizaciju. Svi oni će se prepoznati na današnjoj komemorativnoj svečanosti. Reći ću svima veliko, ljudsko, HVALA. Svi mi koji smo na bilo koji način sudionici i stradalnici genocida i agresije na BiH, imamo trajnu obavezu da podsjećamo i opominjemo sa samo jednim ciljem - da se zlo nikada i nikome više ne ponovi.

Svi mi koji bolujemo 8372 majčinska uzdaha, moramo imati hrabrosti da o Srebrenici - simbolu stradanja bošnjačkog naroda, javno govorimo i djelujemo. Ovaj projekat, kao trajni infrastrukturni objekat, ali i historijski spomenik, postat će, nadam se, mjesto gdje će se slaviti život.

Mjesto gdje će mladi ljudi kroz kulturu, sport i nauku, učeći o prošlosti, na temeljima svoje države, sanjajući vječiti san o Bosni, tražiti načine da izgrade bolju budućnost za sebe i generacije koje će doći. Voda koja teče ispod Ilijana, simbola bosanske državnosti još od srednjeg vijeka, simbolizira krv i ugašene živote. Na trenutak se gubi da bi ponovo izvirala u fontani kao simbol novog života koji se rađa, koji opstaje. Visoko je jedan od rijetkih gradova koje je na trajan način obilježilo uspomenu na žrtve genocida u Srebrenici 1995. godine. Visoko je imalo obavezu da to uradi. Zadužilo nas je na to 6377 do sad ukopanih žrtava koje su u Visokom identifikovane, opremljene i ispraćene na posljednje putovanje, mjesto gdje su pronašli konačni mir -Memorijalni centar Potočari. Zbog toga smo tužni, ali i ponosni.

Hvala svima Vama koji ste večeras došli da se zajedno poklonimo uspomeni na Srebrenicu i žrtve genocida u Srebrenici, te pružimo podršku svima onima koji zadnjih 20 godina, otkrivajući masovne grobnice, identificirajući i sahranjujući nastradale, prikupljajući dokaze i svjedočeći o genocidu, traže, ne osvetu, nego pravdu. Da pružimo podršku srebreničkim majkama čija suza je molitva da se nikad i nikome ne ponovi Srebrenica. Da zajedno večeras kroz tugu gradimo nadu.“

**Za uspješnu saradnju i doprinos u realizaciji projekta, uručene su zahvalnice institucijama, kolektivima i pojedincima:**

- JKP „Gradska groblja“ Visoko
- Asmir Hodžić
- Općina Visoko
- Općinska načelnica mr.sci. Amra Babić
- Federalno ministarstvo prometa i komunikacija
- mr. Enver Bijedić
- mr. Amir Zukić
- dipl.ing.arh. Mugdim Čosović
- prof.dr. John Clark
- Umjetnički kolektiv „HAD“
- Adin Sirčo





## POLOŽEN KAMEN TEMELJAC ZA IZGRADNJU DJEČJEG OBDANIŠTA

**U okviru obilježavanja Dana općine Visoko, 29.08.2015. godine, u naselju Prijeko svečano je postavljen kamen temeljac za izgradnju nove zgrade obdaništa u Visokom.**



Općina Visoko je ranije donijela Odluku o davanju saglasnosti firmi „Abras Company“ za izgradnju odgojno-obrazovnog objekta u naselju Prijeko. Navedenom Odlukom Općinsko vijeće Visoko dalo je saglasnost za izgradnju ovog izuzetno korisnog i vrijednog objekta.

„Abras Company“ će u cijelosti finansirati izgradnju objekta po principu „ključ u ruke“, snositi sve troškove izrade projektne dokumentacije i troškove vanjskog uređenja, dok će sve troškove vezane za izdavanje potrebnih dozvola, saglasnosti, troškove zaključenja Ugovora, nadzora i slično snositi Općina Visoko.



Kamen temeljac za novu zgradu obdaništa u Visokom položili su donator i prijatelj Visokog Ahmed Alabras i načelnica Općine Visoko Amra Babić.

Polaznici JU „Predškolski odgoj i obrazovanje“ Visoko izveli su prigodan program, te ujedno donatoru Ahmedu Alabrasu i načelnici Babić uručili zahvalnice.

Nakon polaganja kamenog temeljca, u prostorijama Kulturnog centra Altındağ-Visoko upriličeno je potpisivanje Ugovora o finansiranju izgradnje obdaništa u Prijekom.

## SVEČANO OTVOREN ODJEL NOVOIZGRAĐENE ŠALTER SALE ZA IZDAVANJE LIČNIH DOKUMENATA U PU II / PS VISOKO



**O**tvorenu nove šalter sale u zgradi Policijske stanice Visoko je prisustvovao veliki broj zvanica iz političkog, kulturnog i društvenog života. Općinska načelnica Amra Babić je tom prilikom istakla da će ovaj Projekat olakšati svim građanima općine Visoko izdavanje ličnih dokumenata, te da je ovo primjer dobre saradnje između lokalne zajednice i viših nivoa vlasti.

O značaju ovog Projekta za cijelokupno Ministarstvo govorio je Ministar unutrašnjih poslova ZDK, Hajrudin Žilić, te istakao da je MUP prije 7 godina uz podršku Vlade ZDK, odlučio da se administrativni odjeli, zbog finansijskih razloga, prave u prostorijama koje su vlasništvo MUP-a ZDK, a ne u prostorijama poštanskih operatera. Može se reći da smo jedini Kanton u FBiH koji je uspio ispuniti postavljene ciljeve, te da svih 12 organizacionih jedinica Ministarstva na području ZDK usluge ove vrste, građanima pružaju u vlastitim, novim i funkcionalno opremljenim salama.

Premijer Vlade ZDK, Miralem Galijašević je istakao: „Izražavam zadovoljstvo da sam danas u Visokom povodom otvaranja ove šalter sale. Naša odluka da se opredijelimo za vlastite prostore se pokazala dobro, te

smo iz sredstava prikupljenih radom šalter sale pronašli način da ih rekonstruišemo. Ovo je još jedan pokušaj da budemo što bolja administracija i da budemo štedljivi, da se ponašamo racionalno sa budžetskim sredstvima. Zahvaljujem se svima koji su sa nama ovdje, koji nam pružaju podršku u radu, kao i svima onima koji su pomogli u idejnim i izvedbenim radovima na ovom projektu šalter sale, koju danas svečano otvaramo. Završen je jedan značajan Projekat za Visoko. Savremena šalter sala znatno će unaprijediti efikasnost službenika, a samim tim i kvalitet usluga.“.

Dogradnjom i rekonstrukcijom administrativnog odjela PS Visoko povećao se kapacitet sa dosadašnjih 5 šaltera na 9, a izgradnjom pristupa za osobe sa invaliditetom i uvođenjem „sistema brojeva“, građanima će se olakšati pristup šalterima. Vrijednost projekta je 230.000 KM, a proveden je od Ministarstva unutrašnjih poslova ZDK u saradnji sa Vladom ZDK i Općinom Visoko.

Svečanim presijecanjem vrpce načelnica Općine Amra Babić, Premijer ZDK Miralem Galijašević i Ministar unutrašnjih poslova ZDK Hajrudin Žilić – lokaciju za izdavanje ličnih dokumenata proglašili su otvorenom.



## SVEČANO OTVORENA PODRUČNA ŠKOLA U PORJEČANIMA



Prije 7 godina započela je izgradnja područne škole u Porječanima novcem kojeg su osigurali Federalno ministarstvo obrazovanja i Ministarstvo za obrazovanje, nauku, kulturu i sport Zeničko-dobojskog kantona. U septembru 2014. godine finansiranje radova preuzeila je Fondacija "Mi za djecu", na čelu sa Refikom Kugrašom. Nakon tačno godinu dana škola je i svečano otvorena. Pred mnogobrojnim gostima iz javnog, političkog i kulturnog života, škola je konačno predata pravom vlasniku – Osnovnoj školi "Mula

Mustafa Bašeskija" Donje Moštare. Primopredaju su svečano potpisali Refik Kurgaš, ispred Fonadacije "Mi za djecu" i Jasmina Uzunalić, direktorica Osnovne škole "Mula Mustafa Bašeskija" Donje Moštare.

Ovo je trenutno najopremljenija škola u BiH, i dosta je entuzijazma privrednika koji su izdvojili svoja sredstva za njenu izgradnju, kao i radosti učenika koji će u novoj školi imati sve uslove za sticanje znanja po najsavremenijim standardima.

## NOVO ŠKOLSKO DVORIŠTE O.Š. „KULIN BAN“ VISOKO

U okviru projekta uređenja školskog igrališta Osnovne škole „Kulin Ban“ Visoko, Općina Visoko je u saradnji sa menadžmentom škole uspješno završila poduzete aktivnosti na uređenju školskog igrališta, sanaciji tribina, te izgradnji potpornog armiranog zida u ulici Izeta Kurtalića.

Izvođači radova su „Bucomerc“ Kiseljak i „Ners“ Visoko. Radove je u cijelosti finansirala Općina Visoko iz sredstava Budžeta za 2015. godinu. Sanacija asfaltne podloge je koštala 5.000 KM, sanacija tribina 10.000 KM, a izgradnja armiranog betonskog zida je rađena u okviru rekonstrukcije ulice Izeta Kurtalića, za koju su obezbijeđena sredstva iz Budžeta Općine Visoko i Ministarstva za ljudska prava i izbjeglice.



## Sastanak predstavnika MZ Čekrekčije sa Općinskom načelnicom

Naćelnica Amra Babić sa saradnicima održala je sastanak kojemu su prisustvovali članovi Savjeta MZ Čekrekčije, predstavnici investitora i izvođača radova postojećih privrednih i turističkih kapaciteta, kao i onih koji namjeravaju graditi na području ove MZ.

Na sastanku je razgovarano o infrastrukturnim problemima i njihovom rješavanju u narednom periodu.

Dogovoreno je da će u svim problemima biti rješavani sporazumno i u koordinaciji sa Općinom Visoko, te je uspostavljen okvir buduće saradnje u cilju poboljšanja infrastrukturnih uvjeta u MZ Čekrekčije.



## Sastanak predstavnika MZ Zimča sa Općinskom načelnicom

Naćelnica Amra Babić je sa saradnicima održala sastanak kojemu su prisustvovali članovi Savjeta MZ, predstavnici investitora i izvođača radova privrednih i turističkih kapaciteta koji planiraju graditi na području ove MZ.

Na sastanku je razgovarano o dugogodišnjim nagomilanim infrastrukturnim problemima i njihovom prioritrenom rješavanju u narednom periodu.

Dogovoreno je da će svim problemima biti rješavani isključivo sporazumno i u koordinaciji sa Općinom Visoko, te je uspostavljen i okvir buduće saradnje, a u cilju poboljšanja infrastrukturnih uvjeta u MZ Zimča.



## Izgrađen novi most preko rijeke Gorušice u naselju Uvorići

Naćelnica Amra Babić sa saradnicima i mještani naselja Uvorići upriličili su otvorenje novoizgrađenog mosta preko rijeke Gorušice koji je bio urušen u poplavama 2014. godine. Most je betonske konstrukcije raspona 14 m. sa srednjom AB kулом nosačem raspona 7 m. Njegovim otvaranjem ponovo je uspostavljena putna komunikacija za veći broj stanovnika sa lijeve strane rijeke sa ostatkom naselja.

Svi radovi izvedeni su stručno, kvalitetno i uz poštovanje tehničkih normi. Radovi su izvedeni na osnovu ugovora zaključenog između Općine Visoko, fondacije „Hastor“ i UNDP-a, kao investitora radova i „TB INŽENJERING“ d.o.o. Breza, kao izvođača radova.



## Označavanje ulica i numeracija objekata



**U** sklopu aktivnosti na realizaciji odobrenih sredstava iz Programa utroška sredstava tekućeg održavanja za 2015. godinu, Općina Visoko je započela sa projektom označavanja ulica i numeracijom objekata.

Planirana su sredstva u iznosu od 12.000 KM, a nakon provedenog tendera najpovoljniji ponuđač je bila firma „Buljan ceste“ d.o.o. Kreševo sa kojom je sklopljen ugovor, te su uspješno realizovane dvije faze projekta.

## Služba civilne zaštite sanirala odron u naselju Dvor



**S**lužba civilne zaštite Općine Visoko kontinuirano je radila na sanacijama u MZ Kralupi. U naselju Dvor saniran je odron nastao uslijed padavina. Civilna zaštita je obezbijedila neophodna sredstava, a vlasnik firme „Pili“ je isporučio potrebnii materijal. Iskop i ugradnju betonskih gabinjona je izvršila firma „Nesko-prom“.

U proteklom periodu bilo je upitno odvijanje autobuskog saobraćaja na relaciji Dvor-Plandište zbog loše putne komunikacije koja je u potpunosti sanirana.

## Načelnica obišla započete rade na rekonstrukciji vodovoda Šošnje

**N**a osnovu zahtjeva i aplikacije Općine Visoko, u Program vodnih naknada za 2014. godinu uvršten je projekat rekonstrukcija sa proširenjem vodovoda „Šošnje“. Ugovor je sklopljen između investitora: Kantonalnog ministarstva za poljoprivredu, šumarstvo i vodoprivredu i Općine Visoko, sa jedne strane i izvođača rada „Ado-trans“ Visoko. Radovima je obuhvaćena rekonstrukcija vodovodne mreže glavnog voda ukupne dužine 1.636,50 metara kao i rekonstrukcija rezervoara i kaptiranje novih količina vode. Vrijednost ugovora je 79.693 KM, a sredstva su obezbijeđena iz Programa utroška sredstava vodnih naknada za 2014.godinu.

Načelnica Babić je istakla da je Općina Visoko prepoznala ovaj problem MZ Šošnje, te da će se potruditi da u sinergiji MZ i Općine dovedu projekat do kraja. Ovo je novi pristup rješavanju problema, gdje Općina Visoko sufinansira rade. Realizacijom ovog projekta 52 domaćinstva će biti kvalitetno i redovno snabdjevena vodom.



## U naselju Han-Plaholje asfaltiran put u dužini od 1.430 metara



**P**rogramom kapitalnih ulaganja u infrastrukturu iz budžeta Općine Visoko za 2015. godinu (cestovna infrastruktura) osigurana su sredstva za realizaciju projekta „Rekonstrukcija i asfaltiranje puta u naselju Han-Plaholje“ u MZ Goduša. Radovi su se sastojali od sanacije donjeg stroja i pripreme za asfaltiranje dionice u dužini od 1430 m, širine 2,5 m i debljine asfaltnog sloja 6 cm. Ugovorenim radovima predviđena je i sanacija postojećih propusta i ulaznih građevina.

Nakon provedenog postupka javne nabavke kao najpovoljniji ponuđač izabrana je firma „Nahonal-gas“. Ugovorena vrijednost radova je 77.078,72 KM. Nadzor nad izvođenjem radova vršila je firma „Ibis“, a radeve je pratio općinski koordinator za kapitalna ulaganja.

Planirani radovi su uspješno završeni, a Općinska načelnica je svečano otvorila put. Mještani ovog naselja nisu krili radost i sreću zbog uspješne realizacije projekta.

## Novi asfalt za stanovnike Monjara i Liješeve



**P**rogramom kapitalnih ulaganja u infrastrukturu iz budžeta Općine Visoko za 2015. godinu (cestovna infrastruktura) osigurana su sredstva za realizaciju projekta rekonstrukcije i asfaltiranja puta u MZ Liješeva, a dio sredstava su finansirali i mještani ove visočke mjesne zajednice.

Izvođač radova bila je firma „Mušinbegović gradnja“ koja je nakon provedenog postupka javne nabavke

izabrana kao najpovoljniji ponuđač za izvođenje radova na navedenoj dionici. Nadzor nad izvođenjem radova vršila je firma „Ibis“. Ukupna dužina ove dionice je 252 metra, a širina 5 metara.

Ugovorenim radovima izvršena je predviđena sanacija navedenog lokalnog puta i zamjena donjeg stroja saobraćajnice, kontrolisana je odvodnja oborinskih voda sa saobraćajnice, te urađeno asfaltiranje gornjeg stroja.

## Rekonstruisan lokalni put Donja-Gornja Seoča



**P**rogramom kapitalnih ulaganja u infrastrukturu iz budžeta Općine Visoko za 2015 godinu (cestovna infrastruktura) osigurana su sredstva za realizaciju projekta „Rekonstrukcija lokalnog puta Donja-Gornja Seoča“ u MZ Dobrinje. Nakon provedenog postupka javne nabavke, kao najpovoljniji ponuđač za izvođenje radova na navedenoj dionici izabrana je firma „Mušinbegović gradnja“ sa kojom je potpisani Ugovor o izvođenju navedenih radova.

Nadzor nad izvođenjem radova povjeren je firmi „Ibis“. Radovi na ovoj dionici su uspješno završeni, a ukupna vrijednost izvedenih radova iznosi 44.149,84 KM. Ukupna dužina navedene dionice je 330 metara, širina 3 metra, a debljina asfalta 7 centimetara.

Općinska načelnica Amra Babić sa saradnicima obišla je navedeni lokalni put, ističući kako je zadovoljna izvedenim radovima i realizacijom ovog projekta.

## Završeno asfaltiranje lokalnog puta Gornja-Donja Zimča



**P**ovodom završetka radova na rekonstrukciji lokalnog puta Donja-Gornja Zimča, dužine 400 metara i širine 4 metra, Općinska načelnica Amra Babić je sa saradnicima prisustvovala svečanom otvorenju. Radove na ovoj dionici puta izvodilo je preduzeće „Sarajevoputevi“, a nadzor je vršila firma „Ibis“.

Urađena je sanacija lokalnog puta, zamjena donjeg i gornjeg stroja saobraćajnice, kao i kontorlisana odvodnja

sa saobraćajnice i asfaltiranje gornjeg stroja. Ugovorna vrijednost radova je 51.017,85 KM.

Svi radovi predviđeni ovim projektom urađeni su u skladu sa projektno-tehničkom dokumentacijom.

Realizaciju rekonstrukcije lokalnog puta na području MZ Zimča finansirala su preduzeća „ALRAYAN“, „AQAR“, „TALHA“, „ABRAS COMPANY“, te donator Mazen Abdović.

## Svečano otvoren „Most tri šehida“ u Radovlju



**U**Mjesnoj zajednici Radovlje, Općinska načelnica prisustvovala je svečanom otvorenju „Mosta Tri šehida“. U obraćanju, Općinska načelnica je istakla: „Sretna sam što otvaramo ovaj most iz više razloga. Most je simbol spajanja ljudi. Ti mostovi su nam neophodni, mostovi između ljudi i obala, i moramo

ih graditi. Ono što još moramo graditi jeste uzajamno povjerenje i saradnja lokalnog stanovništva i općinskih struktura. Ovaj most je još jedan primjer zajedništva, akcije i uspješne saradnje, te stalne aktivnosti.“. U realizaciji projekta učestvovali su: Općina Visoko, mještani MZ Radovlje, te donator iz MZ Radovlje.

## Rekonstruisana priključna saobraćajnica na regionalnu cestu R 443

**U**spješno su izvedene aktivnosti na sanaciji betonskog mosta na regionalnoj cesti R 443 Visoko-Kiseljak. Izvođač radova bio je konzorcij „Trgošped“ d.o.o. Kakanj i „Mušinbegović gradnja“ d.o.o. Visoko.

## Završena rekonstrukcija lokalnog puta Podvinci-Bogošići



**O**pćina Visoko je Programom kapitalnih ulaganja u infrastrukturu općine Visoko za 2015. godinu realizovala projekt rekonstrukcije lokalnog puta Podvinci-Bogošići. Izvođač radova sa kojim je potpisana Ugovor je privredno društvo „Mušinbegović gradnja“. Sredstva za realizaciju navedenog projekta su u potpu-

nosti obezbijeđena iz budžeta Općine Visoko za 2015. godinu. Vrijednost ugovorenog projekta je 77.870,43 KM. Radovi su završeni, a uključivali su sanaciju lokalnog puta, zamjenu donjeg sloja saobraćajnice kao i kontrolisanu odvodnju sa saobraćajnice, te asfaltiranje gornjeg sloja dužine 420 metara i širine 5 metara.

## Završena rekonstrukcija lokalnog puta u Buzić Mahali



**P**rogramom kapitalnih ulaganja u infrastrukturu iz budžeta Općine Visoko za 2015. godinu osigurana su sredstva za realizaciju projekta rekonstrukcije lokalnog puta u B. Mahali, a ugovorna vrijednost radova je 59.827 KM.

U okviru ovog projekta izvršeni su radovi na skidanju donjeg stroja i izrade gornjeg sloja saobraćajnice u dužini od 330 metara. Izvođač radova je „Mušinbegović gradnja“, a nadzor nad istim je vršilo preduzeće „Ibis“.

## Postavljeni ležeći policajci u ulici Mule Hodžića

**O**pćina Visoko se obratila kantonalnoj direkciji Zenica zbog narušene bezbjednosti pješaka i povećanog broja saobraćajnih nezgoda u ulici Mule Hodžića na regionalnoj cesti R443, Visoko-Kiseljak. Direkcija je dala suglasnost, te su radi smanjenja brzine kretanja vozila na tri lokacije urađeni pješački prelazi sa vertikalnom signalizacijom, kao i dva „ležeća policajca“, a u skladu sa utvrđenim saobraćajnim rješenjem.

## Uvorići u novom ruhu - završeno asfaltiranje putne dionice



**U** visočkom naselju Uvorići završeni su radovi na asfaltiranju dionice puta dužine 500 metara. Ukupna vrijednost radova je 90.000 KM, od čega je iz budžeta Općine Visoko izdvojeno 55.000 KM, dok sufinansiranje od strane mještana iznosi 35.000 KM. Izvođač radova je bilo preduzeće „Sarajevoputevi“,

nadzor nad izvođenjem radova vršila je firma „Ibis“, a kvalitet asfalta kontrolisalo je preduzeće „Putna Laboratorija“.

Načelnica Babić je istakla kako je zadovoljna realizacijom ovog projekta, te da je ovo primjer dobre saradnje Općine sa mjesnom zajednicom, koja daje pozitivne rezultate.

## Sanirana putna infrastruktura u naselju Zbilje

**S**lužba za finansije, privredu i lokalni ekonomski razvoj, te Služba za civilnu zaštitu Općine Visoko je u saradnji sa mještanima podružnice Zbilje izvršila sanaciju putne infrastrukture koja je oštećena uslijed obilnih padavina i nekontrolisane odvodnje.

Mještani naselja Zbilje, MZ Buci, izvršili su čišćenje rastinja, ugradnju cijevi i tamponskog materijala kako bi osigurali putnu infrastrukturu od izljevanja oborinskih voda i proširili gabarit saobraćajnice.

Načelnica Općine Amra Babić sa saradnicima obišla je navedenu podružnicu, naglašavajući da je ovo novi pristup koji pokušava razviti, a to je saradnja između Općine i građana tj. mjesnih zajednica. "Ovo je najefikasniji način trošenja budžetskih sredstava jer se sredstva multipliciraju. Građani određuju one lokacije i poslove koji su najprioritetniji, a koje treba završiti u toj MZ, te se uz podršku Općine i Službe za lokalni i ekonomski razvoj vrše intervencije. Načelnica Babić je pozvala i ostale mjesne zajednice da na ovaj način rade i uljepšavaju svoju okolinu."



## Realizovan projekat ucijevljenja potoka i sanacije puta u MZ Porječani

**I**za objekta područne škole u Porječanima izvršeno je ucijevljenje potoka, te sanacija putne infrastrukture oštećene padavinama, a u cilju zaštite od poplava za koje je Općina Visoko putem službe Civilne zaštite do sada izdvojila oko 15.000 KM.

Osim navedenih radova, u prethodnom periodu iz sredstava budžeta Općine Visoko obezbijedeno je 58.149,34 KM za krovnu konstrukciju područne škole u Porječanima, a radove je izvela firma „Progradnja“.



## Završeni radovi na potpornom zidu i rekonstrukciji vodovodne mreže u ulici Izeta Kurtalića

**K**roz program kapitalnih ulaganja za 2015. godinu izdvojen je dio sredstava za temeljnju rekonstrukciju ulice Izeta Kurtalića koja podrazumijeva rekonstrukciju asfaltne podloge, zamjenu vodovodne kanalizacione mreže i izgradnju potpornog zida. Sredstva su obezbijedena saradnjom Općine Visoko sa Ministarstvom za ljudska prava i izbjeglice.



## Završena rekonstrukcija lokalnog vodovoda „Kučetine“ u MZ Goduša



**U**MZ Goduša zvanično je završena rekonstrukcija lokalnog vodovoda „Kučetine“, kao i proširenje zone vodosnabdijevanja u ovoj mjesnoj zajednici.

Faze radova su obuhvatile: izgradnju rezervoara kapaciteta 50 m<sup>3</sup>, izgradnju potisnog i sekundarnog cjevovoda ukupne dužine 5.160 m, te izgradnju rasteretne komore kapaciteta 50 m<sup>3</sup>.

Svečanosti upriličenoj povodom otvorenja ovog vodovoda prisustvovali su pored mještana i predstavnici društveno-političkog života visočke općine, te

resorni ministar u Vladi ZDK. Načelnica Amra Babić, ministar Himzo Smajić i predsjednik MZ Goduša Eniz Babić su pustili u rad lokalni vodovod.

Ovaj projekat je finansiran općinskim i kantonalnim sredstvima iz Programa vodnih naknada, dok je za održavanje i upravljanje ovim vodovodnim sistemom zaduženo JKP "Visoko".

Ukupna vrijednost Projekta je 254.606,41 KM. a u funkciju je stavljen i novoizgrađena javna rasvjeta u dužini od 1.500 metara, sa ukupno 24 rasvjetna tijela.

## Vodoistražni radovi u MZ Porječani



**O**pćinskim Programom kapitalnih ulaganja u vodnu infrastrukturu za 2015. godinu, planirana su finansijska sredstva za vodoistražne radove u MZ Porječani, u iznosu od 35.000 KM. Vodosnabdijevanje ove MZ nije riješeno i dodatnim vodoistražnim radovima se pokušava utvrditi koliki kapaciteti vode su na raspolaganju. Općinska načelnica Amra Babić naglasila je da će realizacijom ovog projekta biti riješeno pitanje vodosnabdijevanja novih 400 domaćinstava.

Općina Visoko u sklopu svojih aktivnosti oko реализациje projekta vodosnabdijevanja i obezbjeđenja sredstava za proširenje gradskog vodovodnog sistema, aplicirala je zahtjev prema Evropskoj banci za obnovu i razvoj, te na taj način, ovaj vodovodni sistem ulazi u sistem Javnog preduzeća „Visoko“, koje bi u narednom periodu i upravljalo ovim sistemom. Uvezivanje malih lokalnih vodovoda u jedan sistem predstavlja dugoročno i kvalitetno rješenje.

## Proširenje vodovodne mreže u Bogošićima i Lužnici



**U** okviru strateškog rješavanja vodosnabdijevanja općine Visoko, vode se intenzivne aktivnosti na rješavanju problema vodosnabdijevanja vršnih dijelova općine.


Nakon završenih radova u Podvincima za 200 domaćinstava nastavljeno je proširenje distributivne mreže za naselja Bogošići i Lužnica za ukupno 100 domaćinstava. Projekat se izvodi u saradnji sa JKP „Vareš“.

Općinska načelnica je sa saradnicima obišla izvođenje navedenih radova u MZ Gračanica, te tom prilikom po-

hvalila uspješnu saradnju između građana i Općine Visoko, koji zajedničkim naporima dolaze do rješenja problema koji do sada nisu bili uspješno riješeni. Ovakvim sistematskim pristupom rastereće se projekat proširenja gradske vodovodne mreže.

Načelnica Babić je ujedno posjetila džamiju u Bogošićima, gdje mještani provode aktivnosti na vanjskom uređenju džamije i izgradnji munare, te planiraju uraditi i dječje igralište. Izražena je spremnost Općine da podrži ove projekte u sljedećoj budžetskoj godini.

## Obnovljena javna česma u ulici Branilaca



**J** KP „Visoko“ u saradnji sa Odsjekom za stambeno-komunalne poslove Općine Visoko je izvršilo rekonstrukciju vodovodne mreže, te opravku fontane-javne česme u ulici Branilaca. Česma je u maju 2015. godine ponovo puštena u funkciju, tako da je pitka voda dostupna svim prolaznicima u toplim ljetnim danima.

## Otkrivena Spomen česma u Poklećićima



**P**ovodom Dana šehida 2015. godine upriličeno je otkrivanje Spomen česme šehidima i poginulim borcima u naselju Poklečići – MZ Porječani. Otvorenju je uz načelnicu Amru Babić i glavnog imama Medžlisa Islamske zajednice Gračanica Midhata ef. Čakalovića prisustvovao veliki broj mještana.

## Vilajetovići, Tuk i Čajengradska: 33 visočka domaćinstva dobila vodu



Općinska načelnica Amra Babić sa saradnicima prisustvovala je svečanosti povodom realizacije projekta proširenja gradske vodovodne mreže u naseljima Vilajetovići i Tuk, te u ulici Čajengradska.

Ovom prilikom načelnica Babić je istakla: "Danas sam sretna što rješavamo problem vodosnabdijevanja još jednog naselja i što gradski vodovodni sistem dobiva 33 nova korisnika. Realizacija ovog projekta je očit primjer kako se radi u javnom sektoru. Rezultat reforme javnog sektora koji provodimo je upravo realizacija ovog projekta. Voda je egzistencijalna ljudska potreba i mi imamo obavezu da sistemskim načinom rješavamo ta pitanja i uvodimo nove korake."

Sistemski način jeste taj da se sve stavi pod upravljanje Javnog preduzeća, a to je ujedno i garancija da će korisnici imati zdravu, čistu i pitku vodu. Mi sa ovim nećemo stati. Već radimo na rješavanju problema vodosnabdijevanja u Ramadanovcima, ne zaboravljamo problem ni naselja Čekrekčije i Banjer, a nadamo se da ćemo ubrzo krenuti u realizaciju projekta vodosnabdijevanja naselja Gračanica i Moštare."

Predsjednik građevinskog odbora Zijad Breščić ovom prilikom obratio se prisutnima: "Želim da kažem da smo mi danas veoma sretni. Konačno je ispravljena velika nepravda koja je trajala više od 35 godina. Uvijek su nalazili razloge zbog kojih nismo imali vodu (prolaz ispod pruge, nedovoljan pritisak, prsten itd.)."

Šleperi svakodnevno prolaze ispod pruge a vodovodna cijev nije mogla proći. A voda je davno prošla za Kovinu i do Uvorića, samo ovi mještani nisu imali pravo na vodu. Uvijek sam govorio da je sve do ljudi. Sada su pravi ljudi na pravom mjestu i to je to.

Želim da se zahvalim Općini Visoko na čelu sa našom načelnicom Amrom Babić i njenim saradnicima. Oduševili su nas i ovo im nikada ne smijemo zaboraviti. JKP „Visoko“ na čelu sa direktorom Almirom Hadžialićem i njegov dolazak na čelo ovog JKP je ključan. U dva-tri kratka sastanka je sve dogovorenog, a realizovano profesionalno i na visokom nivou bez i najmanjeg problema, te u vrlo kratkom periodu.

I ranije smo imali podršku Općine ali i snažan otpor menadžmenta JKP. Naravno, zahvalni smo i našem predsjedniku Dini Muzaferiji koji je bar deset godina sa nama radio na rješavanju vodosnabdijevanja, a sad nam je bio na usluzi i iz bolesničke postelje.

Zahvalnost pripada i svim korisnicima ovog vodovoda koji su podržali ovaj Projekat i dali maksimalan doprinos, a rezultat svega je ovaj mubarek".

Jedan od brojnih mještana koji nisu krili svoju sreću zbog uspješne realizacije ovog projekta je i Emin Salihspahić koji se prisutnima obratio uz mudru izreku: „Ako učiniš kome kakvo dobro, što prije to zaboravi, ali ako tebi neko učini dobro, nemoj mu nikad zaboraviti“.

## Potpisan Sporazum o ustupanju lokalnog vodovoda "Smršnica" u izgradnji na upravljanje JKP „Visoko“



**U**Kabinetu općinske načelnice upriličeno je potpisivanje Sporazuma o ustupanju lokalnog vodovoda „Smršnica“ u izgradnji na upravljanje JKP „Visoko“. Sporazum u ime MZ Gračanica potpisao je predsjednik savjeta MZ Gračanica Emir Uzunalić, a u ime JKP „Visoko“ direktor Almir Hadžialić, u prisustvu članova građevinskog odbora.

Predsjednik savjeta MZ Gračanica Emir Uzunalić istakao je da je ovo važan dan za stanovnike MZ Gračanica, te da saradnjom mještana, Općine Visoko i JKP „Visoko“, Smršnica ulazi u siguran sistem vodosnabdijevanja.

Direktor JKP „Visoko“ Almir Hadžialić kazao je da je kroz usvojeni dokument Reforme javnog sektora, a nakon provedenih aktivnosti na lokalnom vodovodu „Kućetine“, ovo drugi korak koji će građanima dati najbolje rješenje po pitanju vodosnabdijevanja i kvaliteta vode.

Općinska načelnica Amra Babić ovom prilikom istakla je slijedeće: „Danas je veoma važan dan za sve stanovnike općine Visoko. Danas dokazujemo našu spremnost da radimo zajednički i realizujemo projekte isključivo u korist građana. te da je jedan interes iznad svih, a to je dobrobit i interes svih stanovnika općine Visoko.“

Općina Visoko je kao jedan od prioritetnih zadataka definisala rješavanje problema vodosnabdijevanja. Javnost je upoznata o svim aktivnostima i napretku koji postizemo na terenu. Idemo korak po korak i rješavamo jedan po jedan problem. Svaki dan sve više građana općine Visoko postaju korisnici gradskog vodovodnog sistema koji u sebe, osim gradskog vodovoda sa izvorišta „Vrutak“, uključuje i lokalne vodovode.

Garancija je to urednog i sigurnog vodosnabdijevanja, organizacije odvoza smeća, održavanja lokalnih puteva, jednom riječju urbanizacije i humanijih uslova za život svih građana na što širem području općine.

Ovaj događaj otvara vrata jednog novog perioda u razvoju općine Visoko. Iza nas ostaju lični interesi pojedinaca i grupa, iza nas ostaju oni koji podjelama osiguravaju svoje pozicije, a ispred nas stoje naši ciljevi: bolja infrastruktura, veći životni standard i urbano područje na što većoj teritoriji općine Visoko.

Potvrda je ovo i naših strateških opredjeljenja koje je usvojilo Općinsko vijeće, a tiču se uspostave jedinstvenog sistema vodosnabdijevanja na području cijele općine pod kontrolom JKP „Visoko“, te samo kadrovsko i materijalno jačanje preduzeća i uopće jačanje javnog sektora, iskazano kroz usvojeni dokument Reforme javnog sektora.

Ovo je i prvi lokalni vodovod koji je većinom izgrađen privatnim sredstvima, a ušao je u jedinstveni sistem.

Svim onima koji su učestvovali u realizaciji projekta izgradnje lokalnog vodovoda Smršnica želim izraziti zahvalnost u svoje ime i u ime građana. Na ogromnom doprinosu zahvaljujem se svim pojedincima, institucijama, organima uprave, preduzećima, mjesnoj zajednici. Posebno želim čestitati i zahvaliti se stanovništvu Smršnice koje je pokazalo ozbiljnost i anketom iskazalo spremnost da lokalni vodovod u izgradnji ustupi na upravljanje JKP „Visoko“, te na taj način postanu svjetli primjer drugima.“, poručila je načelnica Babić.

## Završena izgradnja javne rasvjete u naselju Kula Banjer

**U** naselju Kula Banjer uspješno je realizovana izgradnja javne rasvjete u dužini od 500 m, do ulaza u naselje Kula Banjer. Sredstva za izgradnju u cijelosti su obezbjeđena iz budžeta Općine Visoko u iznosu od 3.000 KM, a sam projekat je realizovan u saradnji sa Elektroistribucijom Visoko koja je obezbjedila stubove za javnu rasvjetu. Na ovaj način, uz prošlogodišnju realizaciju projekta izgradnje javne rasvjete u ulici Sarajevski put, podignut je nivo sigurnosti pješaka i učenika koji gravitiraju ovom naselju.



## Izgrađena javna rasvjeta na dionici Liješeva - Orašac

**Z**avršen je projekat izgradnje javne rasvjete na dionici puta u MZ Liješeva, prema naselju Orašac. Projekat je urađen u saradnji sa Savjetom MZ, koji su sufinansirali izgradnju javne rasvjete. Ugrađeno je ukupno 25 rasvjetnih tijela, na dužini od oko 1 kilometar, te je ova komunikacija prema naselju Liješeva i Orašac kvalitetno osvijetljena. Vrijednost investicije je 5.000 KM, a Općina Visoko je finansirala oko 80% od tog iznosa. Ovo je još jedan od primjera uspješne saradnje.



## Izgrađena javna rasvjeta na dionici Gradska groblja - Zbilje

**Z**avršeni su radovi na izgradnji javne rasvjete u ulici Podvisoki, dionica Gradska groblja Visoko - Zbilje. Vrijednost ugovorenih radova iznosi 29.131,83 KM. Sredstva su u potpunosti obezbijedena iz budžeta Općine Visoko, a planirana po Programu kapitalnih ulaganja Općine Visoko za 2015. godinu. Izvođač radova je firma „Elvik“. U okviru izvođenja radova na ovoj dionici ugrađena su 22 LED rasvjetna tijela i izvršeno je pjeskarenje i čišćenje postojećih stubova.



## Naselje Bulčići dobilo javnu rasvjetu

**N**akon realizacije projekata koji se odnose na izgradnju javnih rasvjeta na području općine Visoko, planiranih po Programu kapitalnih ulaganja Općine Visoko za 2015. godinu, uspješno je završena izgradnja javne rasvjete i u visočkom naselju Bulčići. Tom prilikom ugrađeno je 14 komada svjetiljki i izgrađena je rasvjeta u dužini cca 800 metara. Sredstva su u cijelosti obezbijeđena iz budžeta Općine Visoko.



## Radovi na vanjskom uređenju Kulturnog centra Altindağ-Visoko



**U** sklopu vanjskog uređenja Kulturnog centra Altindağ-Visoko poduzete su aktivnosti na izgradnji saobraćajnice i parkinga. Radovi su obuhvatili izgradnju donjeg stroja kao i polaganje kanalizacionih cijevi za prikupljanje i odvodnju drenažnih i oborinskih voda.

Izvođač radova je privredno društvo „Geo put“ koje je izabrano nakon provedenog postupka javne nabavke. Vrijednost ugovorenih radova iznosi 151.768,54 KM. Poslove stručno-tehničkog nadzora nad realizovanim radovima vršila je projektantska kuća „BauArt“.

## Sanirane štete od poplava na dionici puta Moštre-Kondžilo

**S**lužba Civilne zaštite u saradnji sa Odsjekom za lokalno ekonomski razvoj Općine Visoko izvršila je sanaciju škarpe kao i čišćenje jaraka i propusta za kontrolisanu odvodnju na dionici puta Moštre-Kondžilo u naselju Krč. Radove na sanaciji je izvodilo JKP „Visoko“.



## Postavljene zaštitne rampe ispred Vatrogasnog doma

**S**lužba civilne zaštite Općine Visoko je ispred Vatrogasnog doma postavila dvije rampe s ciljem zaštite integriteta samog objekta, te sprječavanja nepropisnog parkiranja vozila, a radi bržeg i bezbjednijeg izlaska vatrogasnih vozila pri intervencijama.



## DVD „Vratnik“ iz Sarajeva poklonilo DVD-u „Visoko“ navalno vatrogasno vozilo

**U**Vatrogasnom domu u Visokom Dobrovoljno vatrogasno društvo „Vratnik“ iz Sarajeva poklonilo je DVD-u „Visoko“ navalno vatrogasno vozilo. Načelnica općine Visoko Amra Babić tom prilikom je istakla da je poklon rezultat dugo-godišnje saradnje ova dva Vatrogasna društva, te da će vozilo doprinijeti poboljšanju sigurnosti na području naše općine.



## AKTIVNOSTI ODSJEKA ZA INSPEKCIJSKE POSLOVE OPĆINE VISOKO

Pitanje divljih deponija i zaštite okoliša nikada ne gubi na aktualnosti i obavezi da se na zaštiti okoliša u smislu zaštite tla, voda i zraka radi kontinuirano. Općina Visoko ulaže ogromne napore i sredstva da bi prostor našeg svakodnevnog življenja bio ugodniji i zdravstveno sigurniji. Veliki problem, finansijski najzahtjevниji, su divlje deponije i njihova sanacija.

Služba za urbanizam stambeno-komunalne poslove i zaštitu okoline priprema Program evidentiranja i sanacije divljih deponija na području općine Visoko i do sada je evidentirano 29 divljih deponija na području 10 mjesnih zajednica i to: MZ Arnautovići, MZ Buci, MZ Radovlje, MZ Kula Banjer, MZ Stari Grad, MZ Rosulje, MZ Topuzovo Polje, MZ Tušnjići, MZ Vratnica i MZ Kralupi.

U toku 2015. godine po osnovu sačinjenih izvještaja sa prijedlogom mjera za sanaciju divljih deponija na području općine Visoko, Služba za urbanizam stambeno-komunalne poslove i zaštitu okoline izvršila je sanaciju 10 divljih deponija. U prethodnom periodu se pokazalo da saniranje deponija, bez prethodno procesuiranih počinilaca, odnosno nepostojanje organizovanog odvoza otpada na područjima na kojima se formiraju divlje deponije, rezultira ponovnim formiranjem deponija.

Potrebno je probuditi svijest građana da shvate da odlaganje otpada na mjestima koja nisu predviđena za odlaganje, jeste potencijalni uzročnik raznih zaraznih i drugih oboljenja. Nepropisno odlaganje otpada predstavlja narušavanje javnog reda i mira i komunalnog reda.

## Uspješno realizovana akcija „Let's Do It“ - očistimo zemlju za 1 dan



Općina Visoko i Udruženje žena „Mozaik“ Visoko, u saradnji sa Udruženjem građana „Ruke“ Sarajevo organizovali su akciju „Let's Do It“ - očistimo zemlju za 1 dan. Akcija je provedena na području cijele općine Visoko, a u akciju se uključilo 19 mjesnih zajednica, 4 udruženja, te Medžlisi IZ Visoko i Gračanica. Akciju je podržalo i JKP „Visoko“ koje je vršilo odvoz prikupljenog otpada. U akciji je očišćeno 9 divljih deponija i ukupno odvezeno 18 kontejnera otpada sa sljedećih lokaliteta: Porječani-Mulići, Kaljuni, RP Visoko-Kiseljak, RP Visoko-Illjaš, Liješeva, Ginje, Taukčići, Bijele vode i Livade.

## Sanirana deponija na lokalitetu Klisa-Visočica



**N**a osnovu ranije pripremljenog Izvještaja sa prijedlogom mjera za sanaciju divlje deponije na području MZ Stari Grad – lokalitet Klisa/Visočica, pristupilo se čišćenju navedene deponije sa koje je JKP „VISOKO“ odvezlo 2 kontejnera otpada.

U saradnji sa predstavnikom MZ Stari Grad izvršeno je i postavljanje klupa na mjestu očišćene deponije, a u svrhu zaštite od stvaranja nove deponije na istoj lokaciji.

## Sanirana divlja deponija na području Zbilja - MZ Buci



**N**a osnovu zahtjeva od strane MZ Buci - podružničke Zbilje, za uklanjanje deponije smeća na lokalitetu dječjeg igrališta, pristupilo se čišćenju i odvozu otpada. JKP „Visoko“ je sa navedenog lokaliteta izvršilo odvoz ukupno 7 kontejnera smeća, te je izvršeno ogradijanje lokaliteta i uređenje sportskog terena.

## Ekološke akcije čišćenja izletišta Ravne



**N**a osnovu Sporazuma o čišćenju lokaliteta Ravne - izletište Ravne, zaključenog između Općine Visoko i Udruženja Škola fudbala "Visport" Visoko, članovi navedenog udruženja su u više navrata vršili čišćenje izletišta Ravne, na kojem nesavjesni građani nakon boravka otpad ne odlažu na za to predviđena mjesta. Sredstva za realizaciju obezbijeđena su na osnovu Programa ulaganja sredstava iz Fonda za zaštitu okoline ZDK na području općine Visoko za 2015. godinu.

## Sanirane divlje deponije na području MZ Topuzovo Polje



**N**a osnovu Izvještaja sa prijedlogom mjera za sanaciju divljih deponija na području MZ Topuzovo Polje – lokalitet Bijele vode i pored kompleksa "Vitex", u saradnji sa predstavnicima MZ Topuzovo Polje, pristupilo se čišćenju nelegalnog odlagališta sa kojeg je JKP „Visoko“ izvršilo odvoz 5 kontejnera otpada.



## BOLJI PRISTUP PODUZETNIŠTVU, MALOM I SREDNJEM BIZNISU

Prezentacija o mogućnosti podrške poduzetništvu, malom i srednjem biznisu kroz program „Poboljšanje pristupa malih i srednjih preduzeća finansijskim sredstvima“ održana je u Općini Visoko u organizaciji Službe za finansije, privredu i lokalni ekonomski razvoj u saradnji sa Fondacijom za održivi razvoj Od-Raz.

Na prezentaciji je pomoćnik direktora Fondacije za održivi razvoj, Safet Daut predstavio projekt EAF SME koji je kreiran u saradnji sa Vijećem ministara, entitetskim vladama i Svjetskom bankom radi poboljšanja pristupa malih i srednjih preduzeća finansijskim sredstvima. Prezentaciji je prisustvovalo 37 privrednika s područja općine Visoko.

Radi velikog interesovanja privrednih subjekata za ovim načinom kreditiranja, EBRD i Svjetska banka su 17. maja 2012. godine odobrili dodatno finansiranje ovog projekta u iznosu od 55 miliona eura. Sredstva su

namijenjena, u prvom redu, privrednim subjektima, za očuvanje i jačanje njihove tržišne pozicije u uvjetima krize, te za povećanje ekonomske mogućnosti kroz stimulaciju bržeg kreditnog finansiranja iz ovog projekta.

Cilj je da se poboljša dostupnost finansijskim sredstvima poduzetnicima, malim i srednjim preduzećima u BiH, kao i da pomogne bankarskom sektoru da izdrži globalni ekonomski pad, čime se postiže veoma važna uloga održavanja stabilnosti i povoljne poslovne klime u Bosni i Hercegovini. Na prezentaciji su dati odgovori na pitanja u vezi aplikacije i uvjeta korištenja sredstava.





## NOVA RADNA MJESTA U PROIZVODNJI JAGODIČASTOG VOĆA

**U cilju stvaranja boljeg poslovnog ambijenta, novih investicija i otvaranja radnih mjesta, te podsticanja samozapošljavanja, Općina Visoko je prepoznala prednosti razvoja proizvodnje jagodičastog voća na području općine Visoko.**

**S**tim u vezi Općina Visoko je zaključila Sporazum o poslovno-tehničkoj saradnji sa privrednim društvom „Frutti-Funghi“ kao nosiocem projekta „Razvoj savremene proizvodnje jagodičastog voća“.

Projekat je osmišljen tako da se razvoj proizvodnje maline, kupine, borovnice i jagode na području općine Visoko bazira na lokalnoj produkciji sadnog materijala u okviru privrednog društva „Frutti-Funghi“, a Općina Visoko kao partner/sufinansijer projekta se obavezuje da će u naredne četiri godine planirati sredstva za realizaciju projekta i izvršiti odabir korisnika na osnovu javnog poziva. Privredno društvo „Frutti-Funghi“ se obavezalo da će finansirati troškove podizanja zasada koji uključuju sadnice, prehranu, zaštitu zasada, sistem za navodnjavanje i stručnu pomoć.

Odabrani korisnici će po prispjeću roda, odnosno nakon isteka perioda od 12 ili 24 mjeseca od zasnivanja zasada (ovisno o vrsti odabrane kulture) izvršiti povrat beskamatnih kreditnih sredstava nosiocu projekta.

Putem Javnog poziva za odabir korisnika koji je raspisala Općina Visoko odabранo je 27 korisnika u 2015. godini, te su poticajna sredstva u iznosu od 8.100 KM uplaćena nosiocu projekta - privrednom društvu „Frutti-Funghi“.

Korisnici su dobili zasade odabrane kulture maline i jagode, sistem za navodnjavanje, prehranu i zaštitu zasada i stručnu pomoć. Bitno je napomenuti da je osiguran otkup i plasman proizvoda korisnika po prispjeću roda, a po važećoj tržišnoj cijeni od strane nosioca projekta.

***Poslovna saradnja Općine Visoko sa privrednim društvom „Frutti-Funghi“ će u konačnici rezultirati zasadom jagodičastog voća na 500 duluma zemlje na području općine Visoko u naredne tri godine.***

## Održano stručno predavanje o uzgoju malina

**U** organizaciji Općine Visoko i firme „Frutti-Funghi“, održano je stručno predavanje na temu „Uzgoj i zaštita maline i jagode“. Predavanje je održao Adnan Maličević sa Poljoprivrednog fakulteta Sarajevo koji je pred mnogobrojnim poljoprivrednicima i ostalim zainteresiranim, govorio o mogućnostima i pravilnom uzgoju ove dvije poljoprivredne kulture. Zainteresovanost za ovo predavanje je bila izuzetno velika.





## POKRENUTE AKTIVNOSTI ZA ZAŠITU BRENDU „VISOČKA PEČENICA“

Općina Visoko je u saradnji sa Poljoprivredno-prehrambenim fakultetom Univerziteta u Sarajevu organizirala prezentaciju naučno-istraživačkog projekta pod nazivom „Provođenje procedure za zaštitu brenda i dobijanje oznake geografskog porijekla - Visočka pečenica“. Prezentacija je održana u Velikoj sali Općine Visoko, a projekat je prezentirao doc.dr. Amir Ganić.

Prezentaciji je prisustvovala načelnica općine Amra Babić koja je istakla da bi ovim projektom trebalo afirmisati Visoko po onom po čemu je već poznato, a

jedan od tih brendova je svakako i Visočka pečenica. Općina Visoko podržat će ovaj projekat u saradnji sa visočkim proizvođačima suhomesnatih proizvoda.

Cilj projekta je da se tradicija, prepoznatljivost i kvalitet u proizvodnji visočke pečenice napiše, verifikuje i zaštići.

U toku su aktivnosti na organizovanju udruženja proizvođača suhog mesa sa područja općine Visoko, koje će uz finansijsku i tehničku pomoć Općine Visoko pokrenuti ovaj proces kod Agencije za zaštitu hrane.

## OPĆINA VISOKO PODRŽALA PROJEKAT KOOPERANTSKEGA UZGOJA KORNIŠONA



Općina Visoko je u saradnji sa Opštom poljoprivredno-proizvodno prometnom i uslužnom zadrugom „BIOS“ Visoko, te sa partnerima projekta: „Agrona“, „Brams“ i „Voćarpromet“, organizirala prezentaciju projekta kooperantskog uzgoja kornišona koja se održala pred velikim brojem potencijalnih kooperanata.

Općina Visoko strateški podržava poljoprivrednu proizvodnju koja se intenzivirala posljednjih godina sa razvojem zadrugarskih projekata u Visokom.



## FONDACIJA BIGMEV I OPĆINA VISOKO POVEZUJU VISOČKE I TURSKE PRIVREDNIKE

**U** Kulturnom centru „Altındağ-Visoko“ održana je prezentacija aktivnosti Fondacije BIGMEV - Centra za razvoj odnosa sa Turskom. Fondacija BIGMEV od 2010. godine vodi uspješne aktivnosti povezivanja poslovnih krugova u Bosni i Hercegovini sa prilikama koje nudi tursko tržište, a sve s ciljem jačanja ekonomske saradnje između BiH i Republike Turske.

Prezentaciji su prisustvovali predstavnici visočkih privrednih društava iz kožarskog, tekstilnog, metaloprerađivačkog, drvoprerađivačkog i prehrambenog sektora.

Dr. Selmo Cikotić, direktor Fondacije BIGMEV, upoznao je prisutne sa mogućnostima uspostavljanja

poslovne saradnje sa privrednicima iz Republike Turske i ponudio privrednicima svaku vrstu podrške (logističku, organizacijsku i tehničku) kod ostvarivanja kontakata sa potencijalnim partnerima.

Sastanak visočkih privrednika sa predstavnicima Fondacije BIGMEV je rezultat aktivnosti Privrednog savjeta Općine Visoko, a cilj je uspostavljanje i jačanje poslovne saradnje sa privrednicima iz Republike Turske.

BIGMEV redovno izvještava Kancelariju za privrednike Općine Visoko o održavanju Sajmova iz različitih privrednih grana, a Kancelarija informacije proslijeđuje visočkim privrednicima po pojedinim sektorima.

## OPĆINA VISOKO PODRŽALA PROJEKAT ZAPOŠLJAVANJA ŠIVAČA ZA POTREBE KOMPANIJE „ALMA RAS“

**U** svrhu educiranja i zapošljavanja nezaposlenih lica, a prema pozivu kompanije „Alma Ras“ koja je u sklopu svojih razvojnih planova i povećanja proizvodnih kapaciteta iskazala potrebu za 151 radnikom, potpisani je Sporazum o partnerstvu kao okvir za sistematičnu saradnju između više zainteresiranih strana, među kojima je i Općina Visoko.

Navedeni projekat stručnog osposobljavanja i zapošljavanja šivača za potrebe kompanije „Alma Ras“, Općina Visoko je podržala iznosom od 15.000 KM.



## OPĆINA VISOKO SUFINANSIRALA RAZVOJ PODUZETNIŠTVA I OBRTA U 2015. GODINI

**U** cilju poticanja razvoja poduzetništva i obrta na području općine Visoko, Općinska načelnica je u prethodnoj godini raspisala Javni poziv za sufinansiranje sredstava razvoju poduzetništva i obrta.

Po navedenom Javnom pozivu zahtjev za sufinansiranje sredstava razvoju poduzetništva i obrta u 2015. godini mogla su podnijeti fizička i pravna lica - obrti i privredna društva iz oblasti proizvodnje obuće, tekstila, kožne konfekcije i galanterije, proizvodnje prerađevina od mesa, proizvodnje čokolade i drugih konditorskih proizvoda, prerade čaja i kafe, proizvodnje začina i drugih dodataka hrani.

Sredstva su namijenjena za sufinansiranje nabavke novih i polovnih mašina i opreme, te stalnih sredstava u iznosu do 30% od vrijednosti nabavke, s tim da je maksimalan iznos sufinansiranja 5.000 KM, uz uslov da su stalna sredstva, maštine i oprema nabavljeni u 2015. godini.



Okončanjem postupka po ovom Javnom pozivu utvrđeno je da se prijavilo šest privrednika koji su ispunjavali uslove tražene u Javnom pozivu, te su ovu vrstu poticaja dobili korisnici: IM „SEMIĆ“ d.o.o. Visoko, „VITA LIFE“ d.o.o. Visoko, „SINERGA“ d.o.o. Visoko, „MAKSI“ d.o.o. Visoko, „KOTEKS“ d.o.o. Tešanj - Podružnica Visoko, OBRT „TOMTEX“ vl. Tomićić M. Visoko.

## OPĆINA VISOKO ISPLATILA POTICAJE VLASNICIMA PČELINJIH ZAJEDNICA

**U** cilju poticanja razvoja poljoprivredne proizvodnje i pomoći vlasnicima pčelinjih zajednica na području općine Visoko, Općinska načelnica je raspisala Javni poziv za fizička lica koja imaju registrovanu poljoprivrednu djelatnost kao osnovno zanimanje, kao i za lica koja se bave poljoprivrednom proizvodnjom i upisana su u Registar poljoprivrednih gazdinstava (RPG) da mogu podnijeti zahtjev za poticaj za držanje pčelinjih zajednica.

Pravo na poticaj imali su uzbudjivači pčela koji su vlasnici minimalno 10 a maksimalno 20 aktivnih pčelinjih zajednica, i koji su članovi nekog od aktivnih udruženja pčelara, uz uslov da su izmirili obaveze prema udruženju u zadnje tri godine. Iznos premije je 7 KM po pčelinjoj zajednici.

Na ovaj Javni poziv prijavilo se 55 vlasnika pčelinjih zajednica sa područja općine Visoko. Obzirom da su ispunjavali uslove tražene Javnim pozivom svi pčelari su dobili poticaj, te su im isplaćena sredstva u iznosu od 7.336 KM.





## SVEČANO PUŠTEN U RAD NOVI PROIZVODNI POGON KOMPANIJE „ALMA RAS“ U VISOKOM

**U** industrijskoj zoni Ozrakovići - Visoko svečano je pušten u rad novi proizvodni pogon kompanije „Alma Ras“. Tom prilikom prisutnima su se obratili izvršni direktor kompanije „Alma Ras“ Rasim Memagić, vođa projekta „Piramida Visoko“ Kemal Hadžić, načelnica Općine Visoko Amra Babić, direktorica REZ agencije Maja Kišić, a u ime Federalnog zavoda za zapošljavanje govorio je v.d. direktora Omer Korjenić. Općinska načelnica obratila se prisutnima riječima hvale i podrške: „Danas smo svi posebno obradovani činjenicom da ovo respektabilno preduzeće zvanično otvara proizvodni pogon u Visokom i na taj način direktno osigurava 240, a do kraja godine 300 novih

radnih mesta. To je sigurno veliki doprinos lokalnom ekonomskom razvoju, tržištu rada kao i ukupnom poslovnom ambijentu. Visoko je u prošlosti uživalo ugled i imidž grada tekstila, što ovom, ali i nekim drugim sličnim investicijama ponovo postaje. Posebno smo sretni što mali dio zasluge možemo pripisati i Općini Visoko koja je kroz saradnju sa USAID Sida Gold projektom učestvovala u programu stručnog osposobljavanja za rad nezaposlenih lica – šivača u ovom preduzeću, te tako podržala ovu proizvodnu investiciju. Menadžmentu, vlasnicima i uposlenicima želim uspješan rad, puno posla i brzo širenje kapaciteta na području općine Visoko.“ istakla je načelnica Babić.

## SUFINANSIRANJE NABAVKE POLJOPRIVREDNE MEHANIZACIJE

**U** cilju poticanja razvoja poljoprivredne proizvodnje na području općine Visoko, Općinska načelnica raspisala Javni poziv za fizička lica koja se bave poljoprivrednom proizvodnjom i upisana su u Registar poljoprivrednih gazdinstava, da mogu podnijeti zahtjev za sufinansiranje troškova nabavke nove poljoprivredne mehanizacije u iznosu od 30% vrijednosti mehanizacije, s tim da je maksimalan iznos podrške do 2.000 KM i odnosi se na nabavku u 2015. godini. Na ovaj Javni poziv prijavilo se 6 poljoprivrednih proizvođača i svi su ispunjavali uslove, te su isplaćena sredstva u iznosu od 4.836 KM sljedećim proizvođačima: Sudžuka Edin, Mašetić Azem, Halilović Avdo, Softić Samir, PD „Džera“ vl. Džerizović Naza, Ferzan Mustafa.





## IZLOŽBENO-PRODAJNI SAJAM „DANI ORGANSKE PROIZVODNJE 2015“ PRIVUKAO BROJNE POSJETITELJE

**U** organizaciji Saveza udruženja organskih proizvođača Federacije Bosne i Hercegovine, a pod pokroviteljstvom Općine Visoko, održan je izložbeno prodajni sajam „Dani organske proizvodnje 2015“.

Učesnici u sajmu su bili proizvođači organske hrane, a sudeći po broju posjetilaca i kupaca, građani općine Visoko su podržali organsku proizvodnju. Manifestaciju su otvorili pomoćnica načelnice Edina Ferizović i Sejad Herceg, predsjednik Saveza “Organsko FBiH”. Zahvalnica za uspješnost u razvoju poljoprivrede pripala je firmi „Frutti Funghi“, a „Zlatna korpa organskih proizvoda“ uručena je načelnici Općine Visoko Amri Babić.





## NA IZLOŽBENO-PRODAJNOM SAJMU „JESEN U VISOKOM 2015“ UČESTVOVALA 53 IZLAGAČA IZ CIJELE BIH

U dvorani KSC „Mladost“ Visoko, održan je 11 po redu Izložbeno-prodajni sajam poljoprivredno-prehrambenih proizvoda "Jesen u Visokom 2015". Pokrovitelj ove manifestacije bilo je Ministarstvo za poljoprivredu, šumarstvo i vodoprivredu Zeničko-dobojskog kantona, a organizator manifestacije Općina Visoko.

**O**ve godine na Sajmu je učešće uzelo 53 izlagača, kako iz Visokog tako i iz drugih gradova BiH.

Sponzori Izložbeno-prodajnog sajma „Jesen u Visokom 2015“ bila su preduzeća: „Bios“, „Frutti Funghi“, „Voćar-Piramida“ i „Ideal“. Posjetitelji su mogli izabratи domaće, zdrave i kvalitetne proizvode, a izlagači su kao i prethodnih godina ponudili proizvode od mlijeka, voća i povrća, meda, te ljekovitog bilja i naravno, poznate visočke suhomesnate delicije.

U okviru programa održavanja sajma predstavljena je i radionica „Dekupaž tehnika“ u organizaciji Merime Hadžić, te radionica „Priprema zimnice“ koju je organizovalo udruženje „Aktiv žena Donje moštare“.

Održana su i tri izuzetno korisna edukativna predavanja iz poljoprivredne oblasti: „Kontrola mašina i uređaja za aplikaciju fitofarmaceutskih sredstava“ - predavač prof. dr. Selim Škaljić, „Organska proizvodnja maline, prehrana, zaštita i plasman“ - predavač Sead Herceg mr. poljoprivrede, te „Bolesti, štetnici i zaštita maline“ - predavač dipl.agr. Asad Jelešković.





## ZAHVALNICA DONATORIMA ZA USPJEŠNU REALIZACIJU PROJEKATA ZA POMOĆ SOCIJALNO UGROŽENOM STANOVNIŠTVU

**U**kabinetu općinske načelnice, direktor JU „Centar za socijalni rad“ Visoko, Šaćir Čelebić, uručio je zahvalnicu predstavnicima Humanitarne organizacije „Muslim Educational Society“ za doprinos u poboljšanju socijalnog položaja stanovništva Općine Visoko.

Nakon što je potpisani sporazum o implementaciji projekta za pomoć najugroženijem stanovništvu Općine Visoko, a između Kemala Bakovića, direktora kompanije „Abras Company“ i ujedno ispred Humanitarne

organizacije „Muslim Educational Society“, te direktora JU Centra za socijalni rad Visoko, Šaćira Čelebića, pristupilo se realizaciji projekata. Donacijom od 34.000 eura realizirana su tri projekta koji su uključivali nabavku ogrijeva, humanitarnu pomoć i zaštitu zdravlja socijalno najugroženijeg stanovništva Općine Visoko.

Načelnica Babić i direktor JU „Centar za socijalni rad“, Šaćir Čelebić su izrazili zahvalnost prijateljima iz Bahreina, uz želju da ovo bude početak dugogodišnje saradnje.

## Projekat samozapošljavanja pripadnika branilačke populacije

**N**akon provedene procedure po Javnom pozivu za podizanje zasada maline koji sufinansira Ministarstvo za boračka pitanja Zeničko-dobojskog kantona kroz projekt samozapošljavanja pripadnika branilačke populacije, Općini Visoko je odobreno 24.000 KM za 9 korisnika, a u svrhu podizanja zasada maline.

Ministarstvo za boračka pitanja je sa odabranih 9 korisnika i Općinom Visoko zaključilo Ugovore o podizanju zasada maline, te je izvršena uplata sredstava za 4 korisnika u iznosu od po 3.000 KM i za 5 korisnika po 2.400,00 KM. Sredstva su uplaćena krajnjim korisnicima na tekuće račune uz obavezu dostavljanja dokaza o kupovini sadnica maline od proizvođača koji posjeduje certifikat o zdravstvenoj ispravnosti sadnog materijala.

## 17 plastenika za socijalno ugrožene porodice

**N**akon više uspješno realizovanih projekata u partnerstvu sa humanitarnom organizacijom World Vision i ove godine je pokrenut „Projekat podrške plasteničke proizvodnje na području općine Visoko“.

Implementacijom ovog projekta dodijeljeno je 17 plastenika, te se na taj način finansijski pomoglo 17 socijalno ugroženih porodica. Prioritet prilikom odabira korisnika su imale porodice čiji su članovi nezaposleni ili imaju veoma niska primanja, kao i porodice sa djecom ili članovima sa posebnim potrebama.

S ciljem upoznavanja korisnika sa načinom plasteničke proizvodnje, u Općini Visoko održana je teorijska edukacija, a praktični dio edukacije održan je u preduzeću „Bios“.



## 300 PREHRAMBENIH PAKETA ZA VISOČKE PENZIONERE

Povodom mjeseca Ramazana, a u organizaciji Regionalnog ureda Lige muslimanskog svijeta u BiH, Kulturnog centra princeze Dževhere u Bugojnu i Općine Visoko podijeljeno je 300 paketa prehrambenih proizvoda penzionerima sa područja općine Visoko.

Rahmatallah Qari, generalni direktor Regionalnog ureda Lige muslimanskog svijeta u BiH i nadzornik Kulturnog centra princeze Dževhere Bugojno, rekao je

tom prilikom da im je čast da su gosti Općine Visoko, te da su upriličili podjelu ramazanskih paketa kao svojevrstan poklon narodu i vlade Kraljevine Saudijske Arabije narodu Bosne i Hercegovine.

Akcija je realizovana posredstvom dva udruženja penzionera koja egzistiraju na području općine Visoko. Paketi su sadržavali osnovne životne namirnice, a podjela je upriličena u fiskulturnoj sali „Partizan“.

## Općini Visoko odobrena sredstva od strane Ministarstva za ljudska prava i izbjeglice

Odsjek za lokalni ekonomski razvoj Općine Visoko je na osnovu Javnog poziva objavljenog od strane Ministarstva za ljudska prava i izbjeglice Bosne i Hercegovine za prikupljanje projektnih prijedloga za rješavanje problema Roma u oblasti stambenog zbrinjavanja za 2015. godinu, aplicirao projektima izgradnje i unapređenja prateće infrastrukture u romskim naseljima na području općine Visoko.

Na osnovu Odluke o dodjeli sredstava broj: 01/39-1-3190/15, Općini Visoko su odobrena sredstva u iznosu od 70.000 KM za izgradnju infrastrukture za projekat „Rješavanje odvodnje otpadnih voda u naselju Malo Čajno Visoko“ za romske porodice na teritoriji općine Visoko, a sve u cilju stvaranja boljih infrastrukturnih uslova za socijalno ugrožene romske porodice.

## Potpisani ugovori za pomoć u stambenom zbrinjavanju branilačke populacije

Ministarstvo za boračka pitanja ZDK je dostavilo Zaključke Vlade ZDK, broj: 02-14-18452/15 i 02-14-18454/15 od 09.10.2015. godine, kojima su odobrena sredstva za pomoć u stambenom zbrinjavanju u skladu sa Uredbom o pomoći u rješavanju stambenog pitanja branilaca i članova njihovih porodica za 13 korisnika, u ukupnom iznosu od 50.500,00 KM.

Na osnovu tih zaključaka urađeni su Ugovori o dodjeli finansijskih sredstava u svrhu stambenog zbrinjavanja. U Odsjek za boračko invalidsku zaštitu su se odazvale stranke kojima su odobrena sredstva na potpisivanje Ugovora. 12 korisnika je potpisalo ugovore, a jedna stranka je odbila potpisati i uložila prigovor jer je bila nezadovoljna odobrenim iznosom. Potpisani Ugovori su dostavljeni nadležnom Ministarstvu na dalju realizaciju.



## USPJEŠNO REALIZOVANA HUMANITARNA AKCIJA POMOĆI STARIM I IZNEMOGLIM OSOBAMA

Općinska načelnica Amra Babić bila je pokrovitelj humanitarne akcije u kojoj je posjećeno više od 40 porodica na području naše općine, a u organizaciji sa Omladinskim krugom Medžlisa Islamske zajednice Visoko, na čelu sa koordinatorom hfz Edin-ef Bukva, te u saradnji sa JU „Centar sa socijalni rad“ Visoko.

Ova humanitarna akcija podrazumijevala je snabdijevanje starih i iznemoglih osoba paketima prehrabnenih artikala i sredstvima za ličnu higijenu. O važnosti ovog projekta i njegovom cilju, Šaćir Čelebić, direktor

Centra za socijalni rad Visoko, istakao je sljedeće: „Bitno je posjetiti najugroženiju populaciju. Tim ljudima znači mnogo naš obilazak, i sam razgovor je dobro došao. Načelnica Amra Babić je prepoznala važnost ovakvog Projekta i odobrila sredstva za njegovu realizaciju, tako da se zahvaljujem u ime Centra za socijalni rad i u svoje ime. Cilj je da ovi ljudi znaju da nisu zaboravljeni. Također, ima dosta ljudi koji ispunjavaju prava u nekim sferama socijalne zaštite a ne koriste ih, pa se radi na njihovoj edukaciji.“

## VANREDNI PROJEKTI JU „CENTAR ZA SOCIJALNI RAD“ VISOKO U TOKU 2015. GODINE

Osim redovnih poslova i projekata realizovanih posredstvom JU „Centar za socijalni rad“ Visoko, bitno je izdvojiti još neke od aktivnosti ove Javne ustanove koje su provedene u toku 2015. godine.

U saradnji sa nevladinom organizacijom „Human-apel International“ Sarajevo, za 150 porodica, korisnika stalne novčane pomoći, i porodica koje žive u lošoj materijalnoj situaciji, realizovan je projekat podjele 150 prehrabnenih paketa za Ramazanski bajram, kao i podjele kurbanskog mesa poslije Kurban bajrama.

Tokom 2015. godine nastavljena je realizacija projekta

pružanja besplatne pravne pomoći koju vrši Kantonalni zavod za besplatnu pravnu pomoć Zenica kako bi se pomoglo licima koja nisu u mogućnosti da plaćaju pravne usluge, uz finansijsku podršku Općine Visoko.

Uz podršku Općinske načelnice tokom 2015. godine organizovana je posjeta porodicama slijepih i slabovidnih lica, uz dodjelu paketa sa prehrabbenim artiklima.

U oktobru 2015. godine realizovan je humanitarni projekat ugradnje stolarije za opremanje porodične kuće u Radovljici. Stolarija je donirana od strane firme „Ugarak produkt“ Visoko, koja je izvršila i ugradnju iste.



## OPĆINA VISOKO GENERALNI POKROVITELJ MUZIČKOG FESTIVALA „DANI AVDE SMAILOVIĆA“

**U** Kulturnom centru Altındağ-Visoko, od 01.do 05. juna 2015. godine, održan je muzički festival „Dani Avde Smailovića“, na kojem je učestvovalo više od 70 učesnika iz nekoliko zemalja. Smailović je poznati bh. kompozitor rođen u Visokom (1917-1984.).

Za vrijeme trajanja festivala, publika je imala priliku uživati u koncertu „Metamorfoze“ u interpretacijama vrhunskih mladih muzičara iz Bosne i Hercegovine, Hrvatske, Albanije i SAD-a. Posebnu draž koncertu dao je poznati bh. operni pjevač Denis Isaković, koji je otpjevao ariju iz bh. opere Hasanaginica s mezzosopraničkinjom Larisom Buro. Svojim prisustvom svečani koncert su uveličali i bh. kompozitori Samir Fejzić i Asim Horozić, čija su djela također bila na programu.

Održana je i promocija knjige "Sevdalinka - alhemija duše", autora prof.dr. Esada Bajtala, kojom je skrenuta pozornost na izvornu interpretaciju sevdalinke kao jedinstvenog bh. kulturnog blaga.

Nakon muzičke tribine o ulozi umjetničke muzike u odnosu na današnje trendove, festival je završen svečanim koncertom pod nazivom „Ko je bio Avdo Smailović“ na kojem je publika uživala u priči o životu i djelu profesora Smailovića, a umjetnicima su se pridružili i učenici muzičkih škola iz Visokog i Goražda, koje s ponosom nose ime Avde Smailovića.





## IZLOŽBA KALIGRAFSKIH RADOVA MIRZE MAMELEDŽIJE

I zložba kaligrafskih radova pod nazivom „Kaligrafija“, akademskog slikara Mirze Mameledžije, održana je u prostorijama Kulturnog centra Altındağ-Visoko. Tom prilikom predstavljeno je 20 radova, koji su po riječima Mameledžije rezultat trogodišnjeg rada i izučavanja umjetnosti lijepog pisanja.

Na izložbi su predstavljeni radovi koji su kombinacija slikarstva i kaligrafije. To je, kako je Mameledžija pojasnio, moderno izdanje kaligrafije.

Mirza Mameledžija, akademski slikar, rođen je u Sarajevu, a živi u Visokom. Osnovnu školu završio je u Visokom, dok je Srednju školu primijenjenih umjetnosti i Akademiju likovnih umjetnosti završio u Sarajevu.

Član je Udruženja likovnih umjetnika Bosne i Hercegovine, Udruženja „Likum '76“ i Udruženja likovnih umjetnika Zeničko-dobojskog kantona. Do sada je imao više grupnih izložbi u Bosni i Hercegovini, kao i izvan njenih granica.

## MEĐUNARODNI SAJAM MINERALA, STIJENA, FOSILA, DRAGOG I POLUDRAGOG KAMENJA

U organizaciji Udruženja istraživača i ljubitelja minera „Gorski kristal“ iz Visokog, 30. i 31. maja u Kulturnom centru Altındağ-Visoko, održan je Međunarodni sajam minerala, stijena, fosila, dragog i poludragog kamenja. Skupina zaljubljenika u prirodu i prirodna bogatstva veći dio svog slobodnog vremena

posvećuje traženju i izučavanju raznih minerala i kristala na području centralne Bosne. Iz tih aktivnosti stvorila se ideja o osnivanju Udruženja istraživača i ljubitelja „Gorski kristal“, koji su na ovom sajmu prezentirali ljepotu izloženih eksponata, njihovu priču i priču o vremenu iz kojeg potječu.





## POVODOM RAMAZANSKOG BAJRAMA ODRŽAN KONCERT „BAJRAMSKO VEĆE“

**U** organizaciji Medžlisa Islamske zajednice Visoko i Općine Visoko, u Kulturnom centru Altındağ Visoko, povodom ramazanskog Bajrama održan je koncert pod nazivom „Bajramsko veće“.

Na koncertu su nastupali: hfz. Burhan Šaban, hfz. Sulejman Bugari, hfz. Aziz Alili, Armin Muzaferija, Orhan Čakmak (Turska), Hor „Preporod“ Ilijaš, Tessavvufski Ansambl i Hor Tekijje „Mesudijja“.

Na prethodno održanoj konferenciji za medije u Općini Visoko, općinska načelnica Amra Babić, glavni imam Medžlisa IZ Visoko Ibrahim ef. Hadžić, te Armin Muzaferija kojem je povjerena organizacija ovog koncerta, istakli su da se nadaju će ovakvi koncerti preći u tradiciju.





## ODRŽANA MANIFESTACIJA „VISOČKO LJETO 2015“

**O**pćina Visoko je i 2015. godine organizovala tradicionalnu privredno-kulturalnu manifestaciju „Dani trgovine, kulture i sporta – Visočko ljeto 2015”, koja je počela 21. jula kulturnim i sportskim dešavanjima, a nastavljena 27. jula danima trgovine.

Manifestacija je svečano otvorena na ljetnoj pozornici Kulturnog centra Altındağ-Visoko, gdje su posjetiocu uživali u bogatom kulturno-sportskom programu u izvedbi članova klubova ritmičke gimnastike „Pirueta“ i „Visoko“, Plesne škole „Zumba“, djece iz JU „Predškolski odgoj i obrazovanje“ Visoko, te članova KUD „Visoko“.

Tople ljetne noći tokom manifestacije svojim muzičkim izvedbama su uljepšali solisti Hanka Paldum, Ilma Karahmet, Nejra Musić, Amir Zolj i Armin Muzaferija.

U Gradskom kinu u izvedbi teatra „Total“ Visoko izvedena je Komedija „Policajci“, a najmlađi su uživali uz predstavu za djecu „Čarolija“ (BNP Zenica), te uz film

za djecu Malci 3D MINIONS. Upriličena je i „Zabava za djecu“ gdje su se mališani družili uz crtanje, muziku i ples.

Dodijeljene su nagrade po konkursu za izbor najljepšeg dvorišta, nastup su imala tri kulturno-umjetnička društva, Arabeske sa solistima, a upriličena je i izložba slika sa motivima iz BiH u organizaciji Asocijacije „Mostovi prijateljstva BiH“ Zenica.

U organizaciji Udruženja „Likum '76“ održana je Likovna kolonija „ADA“ i izložba radova, a posjetoci su mogli uživati u izložbi rukotvorina žena iz Udruženja „Mozaik“ Veliko Čajno, te smotri folklora.

U okviru sportskog dijela manifestacije „Visočko ljeto 2015“ održana su brojna takmičenja: turnir u šahu za slijepce i slabovidne osobe, turnir u stonom tenisu, šahovski turnir, noć karatea i taekwondo, noć boksa, te Memorijalni malonogometni turnir „Jusuf Skopljak - Sesa - Lazo“ i nogometni turnir za pionire „Jusuf ef. Trgo“.





## ODRŽANA MANIFESTACIJA „DANI ZAIMA MUZAFERIJE 2015“

**U** visokom je od 26. novembra do 3. decembra 2015. godine održana manifestacija „Dani Zaima Muzaferije 2015“, čiji je glavni cilj očuvanje uspomene na ovog velikog glumca. Jedan od sponzora manifestacije bila je i Općina Visoko.

Tradicionalna, 12. po redu, manifestacija je otvorena izložbom slika Gabriela Jurkića. Posjetioci su imati priliku vidjeti 21 Jurkićevu djelo. Najčešći motivi ovog poznatog bh. slikara su motivi iz livanjskog kraja, kao i portreti žena iz njužeg kruga njegove porodice. Četiri Jurkićeva kapitalna djela prvi su put predstavljena javnosti na jednom mjestu – „Visoravan u cvatu“, (Umjetnička galerija BiH), „Zimska idila“ (Franjevački samostan Gorica Livno), „Ratna žetva“ (Franjevački samostan Sveti Anto) te „Vila naroda moga“ (Umjetnička galerija BiH).

„Visoko je večeras prijestolnica kulture, jedinstvenog događaja koji se ponavlja 12 godina. Ovom manifestacijom dajemo mogućnost i poticaj mladim naraštajima da napreduju i rade“, istakao je predsjednik UG „Ars tragovi“ i organizator manifestacije, Rasim Kadić.

„Dani Zaima Muzaferije 2015“ ponudili su i niz sadržaja iz različitih oblasti umjetničkog stvaralaštva. Premijerno je izvedena predstava „Hasanaginica“, Teatra Total iz Visokog, zatim predstava „Tamo gdje sunce zalazi“, teatra „Fedra“ iz Bugojna, a predstavljeni su i kratki filmovi sa Sarajevo Film Festivala, kao i crtani film za djecu.



## Načelnica Babić upriličila prijem za pionire RK „Bosna“ Visoko

**O**pćinska načelnica Amra Babić upriličila je prijem u Maloj sali Općine Visoko za pionire RK „Bosna“ Visoko, koji su na završnici državnog prvenstva u Ljubuškom ostvarili uspjeh upisavši pet pobjeda, čime su postali prvaci pionirskog prvenstva BiH u rukometu i to uzrasta 2002. i mlađi.

Predstavnici RK „Bosna“ Visoko informisali su načelnicu o trenutnim aktivnostima, te budućim nastupima. Načelnica Babić je istakla da je strategija Općine u oblasti sporta omasovljavanje i rad sa mladim selekcijama, te da će i u narednom periodu intenzivno raditi na tome.



## Komesar policije MUP-a ZDK posjetio načelnicu Babić

**O**pćinsku načelnici Amru Babić posjetili su policijski komesar MUP-a ZDK Semir Šut, komandir Policijske stanice Visoko, Fahrudin Pušina i Vehid Birdahić iz Operativnog centra MUP ZDK. Tokom ove posjete razgovaralo se o bezbjednosnoj situaciji na području Zeničko-dobojskog kantona, posebno na području općine Visoko, te o planiranim aktivnostima u narednom periodu.

Na sastanku je usaglašeno da policija i lokalna zajednica imaju ostvaren visok stepen saradnje i da će u budućnosti nastojati ostvariti još bolju koordinaciju rada, a sve s ciljem veće bezbjednosti građana i sigurnosti materijalnih dobara.



## Sedamdesetero djece predškolskog uzrasta posjetilo Općinu Visoko

**U**pratnji odgajateljica i asistentica iz JU „Predškolski odgoj i obrazovanje“ Visoko i Predškolske ustanove „Behar“, oko 70 djece posjetilo je Općinu Visoko.

Predstavnice Općine, Edina Ferizović i Dinka Omanović djeci su poželjele dobrodošlicu, te su im uz prigodne poklone čestitali Dan nezavisnosti.

Ova posjeta je upriličena u sklopu tradicionalnog „Defilea slobode“ koji Predškolska ustanova „Behar“ organizuje povodom Dana nezavisnosti Bosne i Hercegovine. Djeca su prethodno dostojanstveno i mirno prošetala gradom, noseći zastave BiH, te su posjetili i Policijsku upravu Visoko.





## Prijem za mladog hafiza Bukva Affana

**O**pćinska načelnica sa saradnicima je upriličila svečani prijem za mladog hafiza Affana Bukvu, njegovog oca i muhaffiza, hfz. Edin ef. Bukvu i glavnog imama Medžlisa IZ Visoko, Ibrahima ef. Hadžića. Povod za prijem je izuzetan uspjeh ovog mladog, 14-godišnjeg Visočanina koji je naučio Kur'an napamet (hifz) i stekao zvanje hafiza.

Načelnica je istakla ovaj primjer kao uzor mladim ljudima i napomenula da rad, zalaganje i upornost uvijek daju rezultate. Također, podcrtala je važnost njegovanja pobjedničkog duha kod mlađih ljudi kao pokretačke snage našeg društva.

Mladom hafizu je za izuzetne rezultate uručen i simboličan poklon.



### BIOGRAFIJA MLADOG HAFIZA AFFANA

**H**afiz Affan Bukva, sin hfz. Edina i Lejle, rođen je 16. 10. 2000. godine u Sarajevu. U prvi razred osnovne škole upisan je školske 2006/2007. sa nepunih 6 godina, a mektebsku nastavu počinje pohađati godinu ranije. Sa sedam godina počinje trenirati karate u karate klubu „Visoko“ iz Visokog.

Trenutno je učenik tursko-bosanskog koledža u Sarajevu. Bio je učesnik općinskog i kantonalnog takmičenja iz matematike. Kao izuzetno vedar i komunikativan, omiljen je kako kod svojih drugara tako i kod nastavnika. Pored odličnih rezultata u školi, u nastavnim i vannastavnim aktivnostima i u mektebu, kao jedan od najredovnijih polaznika mektebske nastave, postiže također odlične rezultate. Pobjeđuje na mektebskim takmičenjima iz kiraeta na nivou medžlisa i prije početka učenja hifza u mlađoj kategoriji, a kasnije i u starijoj. Na muftijskom takmičenju kao predstavnik medžlisa postiže zapažene rezultate.

Hifz počinje učiti po sistemu krugova 13.6.2011. godine pred muhaffizom, svojim muallimom i ocem, hfz Edin ef., a nakon što je prethodno na mektebskoj nastavi naučio napamet prvo suru *Ja-sin a onda i trideseti - amme džuz*, što je njegovom muallimu bio išaret da bi mogao biti dobar kandidat za učenje hifza. U narednom periodu budući hafiz Affan kreće sa redovnim i siste-

matičnim učenjem tokom tri godine da bi uspješno okončao učenje hifza 4.7.2014. godine sa svojih nepunih četrnaest godina. Nakon šest mjeseci intenzivnog ponavljanja i utvrđivanja, izlazi pred hafisku komisiju Rijaseta IZ u BiH, te u periodu od 5. do 19. januara 2015. godine polaže hifz proučivši cijeli Kur'an.

Uz navedene rezultate u školi, mektebu, učenju i završetku hifza, hafiz Affan postiže i izvanredne sportske uspjehe u karateu. Od 2011. godine je reprezentativac BiH u tradicionalnom karateu. Majstor karatea i nosilac crnog pojasa 1. dan postaje sa navršenih dvanaest godina, u decembru 2012. godine. Osvojio je brojne medalje na takmičenjima u BiH i inostranstvu. Najveći uspjeh postigao je na Svjetskom prvenstvu u karateu u Češkoj 2013. godine, osvojivši treće mjesto u konkurenciji 72 takmičara. Za postignute izuzetne rezultate na različitim domaćim i međunarodnim takmičenjima u 2013. godini, Sportski savez općine Visoko mu je dodijelio posebno priznanje „Sportska nada općine Visoko za 2013. godinu“.

Za postignute rezultate u karateu posebnu zahvalnost duguje svome treneru, majstoru karatea Građan Redžepu, osnivaču i treneru karate kluba „Visoko“, inače predsjedniku BH federalnog i državnog tradicionalnog karate saveza.

Ima trojicu ponosne braće. Starijeg Tahira, te dvojicu mlađih Jusufa i Aliju.



## Načelnica ugostila učesnike fudbalskog trening kampa

**A**kademija Fudbalskog kluba „Sarajevo“ je organizirala prvi selektivni trening kamp u Visokom koji se održao na terenima NK „Bosna“ Visoko, a tim povodom načelnica Općine Visoko, Amra Babić je upriličila prijem i poželjela dobrodošlicu za učesnike ovog kampa.

Trening kamp u organizaciji Fudbalskog kluba „Sarajevo“, u saradnji sa partnerskim klubom NK „Bosna“ Visoko, trajao je od 28. februara do 1. marta 2015. godine, a cilj mu je bio da polaznici, koji su u pretho-

dnom periodu skautirani i kontaktirani, dobiju mogućnost da pokažu svoje znanje i vještine, te da u budućnosti postanu dio prve profesionalne Akademije na tlu Bosne i Hercegovine, Akademije Fudbalskog kluba „Sarajevo“.

Učesnici kampa su bili dječaci rođeni 2002. i 2003. godine, a Nogometni klub „Bosna“ Visoko, kao domaćin, ustupio je mlađim igračima terene za treniranje i odigravanje utakmica.



## Upriličen prijem za Lamiju Hadžimehmedagić, dobitnicu nagrade za literarni rad



**U**rednu općinsku načelnice Amre Babić upriličen je prijem za Lamiju Hadžimehmedagić, učenicu petog razreda OŠ „Kulin Ban“ Visoko koja je na održanom prestižnom IX Međunarodnom takmičenju u poeziji i teatru "Castello di duino", koje se tradicionalno održava u Trstu u Italiji, osvojila nagradu za literarni rad u jakoj međunarodnoj konkurenciji.

Načelnica je Lamiji uputila čestitku za sjajan rezultat, a potom se razgovaralo o njenim planovima za budući period, te naglasila spremnost da Općina Visoko, u skladu sa svojim mogućnostima, pomogne Lamiji u ostvarenju njenih ambicija po ovom pitanju.

„Skromna nagrada koju ti u ime Općine uručujem neka bude pokazatelj da Općina Visoko prati sve uspjehe naše mladeži“, naglasila je načelnica Babić.

Hadžimehmedagić se zahvalila i rekla da će dostoјno predstavljati Visoko i svoju školu na svim takmičenjima.

## Načelnica Babić ugostila članice Ženske alternativne vlade BiH

**N**a sastanku je bilo govora o ravnopravnom učešću žena u političkom životu naše zemlje.

Jedna od članica Vlade, Kada Delić Selimović, rekla je da je cilj ove vlade osnaživanje žena iz političkih stranaka i organizacija civilnog društva u ravnopravnom učešću u procesu odlučivanja i afirmacije koncepta rodne ravnopravnosti u BiH.

Načelnici Babić su predstavljene aktivnosti koje provodi Ženska alternativna vlada BiH, poput sačinjavanja Alternativnog izvještaja o napretku BiH ka EU, te da Vlada ima izrađenu bazu podataka ženskog stručnjačkog potencijala koja će objediniti podatke o ženama koje imaju impresivno profesionalno znanje u različitim oblastima i da su biografije dostupne donatorima, poslodavcima, vladinim institucijama ili kompanijama.



## Načelnica Babić ugostila predstavnike Udruženja „EKO VIKING“ i PVJ „Visoko“

**N**a ovom sastanku načelnica Babić je zahvalila članovima Udruženja za zaštitu rijeka, riječnih slivova i ekstremne sportove „EKO VIKING“ Visoko, kao i predstvincima Profesionalne vatrogasne jedinice Visoko, za hitno djelovanje i aktivno učešće pri akcijama spašavanja i pronalaska unesrećenih.



## Prijem za volontere koji su stekli prvo radno iskustvo u Općini Visoko

**N**ačelnica Amra Babić sa saradnicima, upriličila je prijem za volontere pripravnike koji su u protekljoj godini dana na osnovu Ugovora o volonterskom radu sticali radno iskustvo, s ciljem osposobljavanja za samostalan rad u okviru svoje struke.

Načelnica je pohvalila volontere pripravnike za njihov uspješan rad i zalaganje, te poželjela mnogo sreće u nastavku karijere.

Volonteri su izrazili svoju zahvalnost i sreću što su imali priliku da svoje prvo radno iskustvo steknu radeći u Općini, te se na taj način uspiju osposobiti za izlazak na tržište rada.





## Načelnica Babić upriličila prijem za hafiza Mimić Hasiba

Općinska načelnica je sa saradnicima upriličila svečani prijem za mladog hafiza Hasiba Mimića, njegovog muhafizza, prof. Zijada Dervića i glavnog imama medžlisa IZ Visoko, Ibrahim ef. Hadžića, a u povodu održane hafiske dove 17.05. 2015. godine u Bijeloj džamiji.

Načelnica je uputila čestitke hafizu, njegovoj porodici i medžlisu IZ Visoko, te uručila simboličnu nagradu vrijednom hafizu Hasibu Mimiću, maturantu Medrese „Osman ef. Redžović.“.



### BIOGRAFIJA MLADOG HAFIZA HASIBA MIMIĆA

**H**asib Mimić rođen je 14.11.1995. godine u Zenici, od oca Senada i majke Atife. Osnovnu školu "Kulin ban" u Visokom završio je školske 2009/2010. godine sa odličnim uspjehom.

Medresu „Osman ef. Redžović“ upisao je 2010. godine. Školovanje u medresi završio je školske 2013/14. godine sa vrlodobrim uspjehom. Tokom školovanja postigao je izuzetne rezultate iz nastavnih predmeta kiraet i hadis, a posebno se istakao u društvenim naukama.

Još od najranijih dana pokazao je interes za učenje Kur'ana napamet. Učestvovao je na takmičenjima na nivou medžlisa Visoko. Kao učenik medrese učestvovao je na takmičenjima iz

kiraeta u Sarajevu i Zagrebu u kategoriji hifz i postigao zapažene rezultate.

U septembru 2014. godine obavio je hadždž zajedno sa svojim ocem Senadom.

Učenje hifza započeo je u martu 2011. godine, a hifz je završio u novembru 2013. godine. Zvanje hafiza časnog Kur'ana stekao je pred komisijom Rijaseta Islamske zajednice u BiH, u Sarajevu 24.04.2015. godine.

Rukometom se počeo baviti još kao učenik prvog razreda osnovne škole. I na ovom planu postigao je izuzetne rezultate, a vrhunac je nagrada za najboljeg malodobnog golmana koju je osvojio na međunarodnom turniru u Barceloni, Španija. Namjerava studirati islamske nauke u nekoj od islamskih zemalja.

## Prijem za maturanta Meša Našida, pripadnika porodice šehida i poginulih boraca općine Visoko

Općinska načelnica Amra Babić upriličila je prijem za maturanta školske 2014/2015. godine, Meša Našida, pripadnika porodice šehida i poginulih boraca općine Visoko. To je tradicionalni prijem koji organizuje Općina u saradnji sa Asocijacijom „Fatma“ i Organizacijom porodica šehida i poginulih boraca „Visoko '92“. Meša Našid bio je maturant Perzijsko-bosanskog koledža. Rođen je 1995. godine i sa njegovim maturiranjem su sva djeca pripadnika šehida i poginulih boraca sa područja općine Visoko završila srednje obrazovanje. Načelnica je Našidu zaželjela uspjeh u daljem školovanju uručivši mu simboličan novčani poklon.





## Prijem za učenike generacije visočkih osnovnih i srednjih škola

**O**pćinska načelnica Amra Babić u Maloj sali Općine Visoko je upriličila prijem za učenike generacije svih osnovnih i srednjih škola sa područja visočke općine za školsku 2014/2015. godinu.

Učenici generacije su: Naida Dedić (Gimnazija „Visoko“ Visoko), Azra Bešić (MSŠ „Hazim Šabanović“ Visoko), Blaž Protudžer (Franjevačka gimnazija Visoko), Amina Fejzić i Rifat Bilčević (Medresa „Osman ef. Redžović“), Veronika Bundić (ŠOMO „Avdo Smajlović“ Visoko), Faris Matoruga (OŠ „Kulin Ban“ Visoko), Hana Fejzić (OŠ „Safvet beg Bašagić“ Visoko), Melina Dlakić (OŠ „Mula Mustafa Bašeskija“ Donje Moštare), Ajla Zukić (OŠ „Alija Nametak“ Buci), Muastaf Hajrić (OŠ „Mehmedalija Mak Dizdar“ Dobrinje), Azra Mehmedagić (OŠ „Musa Čazim Ćatic“ Veliko Čajno).

Pored učenika generacije prisutni su bili i direktori osnovnih i srednjih škola. Svim gostima Načelnica je

uputila čestitke za uspjeh, naglašavajući da uvijek sami sebi postavljaju visoke ciljeve, te da čovjeku mogu oduzeti sve, ali znanje i obrazovanje nikad. Učenicima generacije Načelnica je uručila novčane nagrade.



## Prijem za Gorana Vojnovića, slovenskog pisca visočkih korijena

**U**kabinetu Načelnice je upriličen prijem za Gorana Vojnovića, mladog slovenskog pisca visočkih korijena. Ovom prilikom načelnica Babić i Goran su razmjenili poklone. Promocija romana „Čefuri raus“ i „Jugoslavija, moja dežela“, održala se 29. maja u Velikoj sali Općine Visoko.



## Upriličen prijem učenika i studenata iz Koblenza

**U**Maloj sali Općine Visoko upriličen je prijem za učenike i studente iz Koblenza koji su boravili u posjeti Franjevačkoj klasičnoj gimnaziji u Visokom, a u sklopu projekta „Latin Bridge“, čiji je osnovni cilj međusobno upoznavanje i izbjegavanje predrasuda.

Načelnica Babić je predstavila kulturno-historijsku baštinu Visokog, te istakla kako je ovo lijep projekt s obzirom na to da Visoko ima dugu tradiciju suživota i obrazovanja.

Općina Visoko će i dalje podržavati projekt prijatelja iz Franjevačke klasične gimnazije, zajedno raditi na razbijanju predrasuda, pružanja ruke prijateljstva, te gradnji boljeg svijeta, što i jeste zadaća svih nas.





## Prijem za Naidu Dedić, učesnicu na 46. Međunarodnoj olimpijadi iz fizike



**U**kabinetu općinske Načelnice upriličen je prijem za Naidu Dedić, učesnicu na 46. Međunarodnoj olimpijadi iz fizike, koja se održala od 05. do 12. jula 2015. godine u Indiji. Ovom prilikom načelnica je istakla da joj je dragو što ponovo imamo iz Visokog učesnika na Međunarodnoj olimpijadi, poželjela je Naidi mnogo uspjeha u budućnosti, te istakla da Općina Visoko daje podršku i priznanje za rezultate mladih, te dodala da je ovo i svojevrsna motivacija za mlade ljudi kako bi ostali ovdje da grade BiH i prosperitet i bolji život za sve nas.

Naida Dedić se zahvalila načelnici na prijemu i podršci, te su razgovarali o daljim planovima za budućnost. Ovom prilikom načelnica je uručila novčanu nagradu Naidi za još bolje rezultate u narednom periodu.



## „PRIPREMA, RECIKLIRAJ, SAD“ - Prijem za najuspješnije

**N**ačelnica Babić upriličila je prijem za predstavnike najuspješnijih škola koje su se prijavile na Javni Poziv svim osnovnim i srednjim školama na području općine Visoko za učešće u nagradnom takmičenju prikupljanja starog papira, čepova i limenki pod sloganom „PRIPREMA, RECIKLIRAJ, SAD“.

Na poziv se prijavilo osam škola i to: OŠ „Alija Name-tak“ Buci, MSŠ „Hazim Šabanović“ Visoko, OŠ „Mula Mustafa Bašeskija“ Donje Moštare, OŠ „Mehmedalija Mak Dizdar“ Dobrinje, OŠ „Kulin Ban“ Visoko, OŠ „Safet-beg Bašagić“ Visoko, Gimnazija „Visoko“ Visoko, i OŠ „Musa Čazim Ćatić“ Gračanica.

Najuspješnije škole su bile: OŠ „Mehmedalija Mak Dizdar“ Dobrinje (za prikupljeni papir), OŠ „Kulin Ban“ Visoko (za prikupljene čepove) i OŠ „Mula Mustafa Bašeskija“ Donje Moštare (za prikupljene limenke).

Načelnica Babić je istakla da je zadovoljna odzivu i učešću u ovoj akciji, te da je Općina Visoko otvorena za nove ideje iz oblasti ekologije i da treba težiti projektima koji će imati kontinuitet, a da je također bitno da postoji volja. Najuspješnijim školama uručene su zahvalnice za doprinos pri razvoju općine, novčana nagrada, a u suradnji sa JKP „Visoko“ školama su uručeni kontejneri za otpad.



## Upriličen prijem povodom ramazanskog Bajrama

**U**kabinetu Općinske načelnice upriličen je tradicionalni bajramski prijem za predstavnike Medžlisa IZ Visoko, Medžlisa IZ Gračanica, predsjednika MIZ Gračanica, dopredsjedavajuću Općinskog vijeća i predsjednika Komisije za odnose sa vjerskim zajednicama. Na prijemu se razgovaralo o planovima i aktivnostima, radu Medžlisa i daljoj saradnji, kao i o manifestaciji „Bajramska veče“.



## Proglašeni najuspješniji likovni i literarni radovi učenika

**O**pćina Visoko u suradnji sa Organizacijom porodica šehida i pginulih boraca „Visoko '92“ već dugi niz godina raspisuje konkurs za izbor najuspješnijih literarnih i likovnih radova, a u povodu dana Šehida.

Nakon objavljenog Javnog Poziva za izbor najuspješnijih likovnih i literarnih radova pod nazivom „Sjećanje na šehide“ za učenike osnovnih i srednjih škola općine Visoko, u Maloj sali Općine Visoko proglašeni su najuspješniji:

Literarni radovi - osnovna škola: Kadić Emina, Bajrić Ajla, Salošević Hatidža, Pajt Medina (OŠ „Musa Čazim Ćatić“ Veliko Čajno) i Čaušević Ajla (OŠ „Safvet-beg Bašagić“ Visoko).

Likovni radovi - osnovna škola: Muslić Nedžmina (OŠ „Mehmedalija Mak Dizdar“ Dobrinje), Šećerović Nedžla (OŠ „Kulin Ban“ Visoko), Ohran Mesud (OŠ „Alija Nametak“ Buci).

Literarni radovi - srednje škole: Ibišević Amina, Emšo Emira, Imamović Amila i Javoraš Fahira (MSŠ „Hazim Šabanović“ Visoko).

Nagrađenim učenicima načelnica općine Amra Babić je čestitala na uspjehu naglasivši da je vrijednost ovih radova pod nazivom „Sjećanje na šehide“ u tome što kroz svoje likovne i literarne radove njeguju uspomenu na njih.



## Vatrogasci iz Kaštela posjetili PVJ Visoko

**P**rofesionalno-dobrovoljna vatrogasna jedinica iz Kaštela posjetila je Službu civilne zaštite - Profesionalnu vatrogasnu jedinicu „Visoko“. Tom prilikom gosti su domaćinima uručili materijalno-tehnička sredstva potrebna za rad PVJ „Visoko“.

Goste su primili načelnica Općine Amra Babić, pomoćnik Općinske načelnice za poslove Civilne zaštite Dragan Božićković i Fahrudin Bukić, starješina Profesionalne vatrogasne jedinice „Visoko“. Tom prilikom načelnica je istakla da se nada dobroj saradnji u budućnosti kroz razmjenu iskustava, pomoći u opremi ali i prekograničnoj saradnji kroz zajedničke napore za korištenje fondova EU za ove namjene.



## Posjeta 6-milijarditom stanovniku planete Zemlje

**S**aradnici Općinske načelnice Amre Babić posjetili su 6-milijarditog stanovnika planete Zemlje.

Naime, 1999. godine Ujedinjeni narodi odabrali su bebu koja će predstavljati porast populacije na 6 milijardi ljudi na Zemlji, a to je bio Visočanin Adnan Mević, dječak rođen u sarajevskoj bolnici četiri godine nakon rata u Bosni.

Povod posjete bio je Adnanov 16. rođendan. Adnan je otkrio da su mu se sve želje do sada ispunile, te da je zdravlje najbitnije. Ovom prilikom saradnici Općinske načelnice su mu uručili prigodan novčani poklon i tortu.





## Načelnica Babić upriličila prijem povodom Kurban Bajrama

Povodom Kurban Bajrama, u kabinetu Općinske načelnice upriličen je prijem za predstavnike Medžlisa IZ Visoko i Medžlisa IZ Gračanica.

Prijemu su prisustvovali: glavni imam Medžlisa IZ Visoko prof. Ibrahim ef. Hadžić, glavni imam Medžlisa IZ Gračanica Senahid-ef. Uzunović, dopredsjedavajuća Općinskog vijeća Aida Zerdo, predsjednik Komisije za odnose sa vjerskim zajednicama Vahid Ramić, te Mehmed Smajlović, predsjednik gračaničkog Medžlisa.

Na prijemu se razgovaralo o bajramskim aktivnostima na području dva medžlisa IZ, kao i o planovima i aktivnostima u narednom periodu, te saradnji između institucija IZ i Općine Visoko.



## Upriličen prijem povodom katoličkog Božića

Povodom katoličkog Božića, Općinska načelnica je upriličila tradicionalni prijem za fra Josipa Ikića, gvardijana Franjevačkog samostana Visoko i fra Franju Radmana.

Prijemu su prisustvovali i predsjedavajuća Općinskog vijeća Visoko Mirela Mateša-Bukva, predsjednik Komisije za odnose sa vjerskim zajednicama Vahid Ramić, te pomoćnici Načelnice.

Prijem je protekao u srdačnom razgovoru, a tom prilikom Općinska načelnica Amra Babić je uputila čestitku pripadnicima katoličke vjeroispovijesti uz želju da Božić provedu u zdravlju, sreći i zadovoljstvu.



## Upriličen prijem povodom pravoslavnog Božića

Povodom pravoslavnog Božića u Općini Visoko upriličen je tradicionalni božićni prijem koji su priredili načelnica Amra Babić, predsjedavajuća OV Visoko Mirela Mateša-Bukva, dopredsjedavajuća OV Visoko Aida Zerdo, te pomoćnici načelnice.

Prijemu su prisustvovali novi jereji, Marko Jakovljević i Darko Danilović, predstavnik Pravoslavne crkvene opštine Visoko Novica Manojlović i predsjednik Komisije za odnose sa vjerskim zajednicama Vahid Ramić.

Jereji visočke parohije vjernicima su čestitali Božić i pozvali ih da zajedno proslave ovaj veliki praznik, te su zahvalili načelnici i Općini Visoko na organizovanom prijemu, kao i na dosadašnjoj saradnji.



## Upriličen prijem za zlatnog studenta Hindija Haruna

**U**Općini Visoko je upriličen prijem za Haruna Hindiju, našeg sugrađanina i zlatnog studenta koji spada među najbolje studente prvog ciklusa studija na Univerzitetu u Sarajevu sa prosjekom ocjena 10.0.

Harun Hindija rođen je 22.03.1994. godine u Visokom, gdje je završio osnovnu školu, a tu je i započela njegova ljubav prema matematici. Završio je Tursko-bosanski koledž u Sarajevu, te završio PMF – Odsjek Matematika u Sarajevu. 2012. godine je donio srebrenu medalju s matematičke olimpijade u Argentini.

Načelnica je Harunu zaželjela uspjeh u daljem školovanju, uručivši mu simboličan novčani poklon.



## Majke Srebrenice posjetile „Trg žrtava Srebrenice sa šetnicom“

**M**ajke Srebrenice su posjetile "Trg žrtava Srebrenice sa šetnicom" u mjesecu septembru, dok su radovi na ovom Projektu bili pri kraju. Općinska načelnica Amra Babić je predstavila majkama Projekat koji čine Amfiteatar, spomen ploča, te fontana koja simbolično povezuje dva grada, Visoko i Srebrenicu.

Finalizacijom ovog projekta na jedan način biće odata počast svim žrtvama genocida u Srebrenici. Šetnica predstavlja simbol sjećanja kroz novi projekat umjetničkog kolektiva HAD, a realizirana je u samoj strukturi zida ručnim klesanjem, izbijanjem, rezanjem ili uz upotrebu električnih alata gdje zid to zahtjeva.



## Premijer ZDK i članovi Vlade u posjeti Visokom

**P**remijer Zeničko-dobojskog kantona Miralem Galijašević i ministri Vlade ZDK boravili su u radnoj posjeti Općini Visoko. Općinska načelnica Amra Babić predstavila je realizovane projekte, te projekte koji su u fazi implementacije, kao i planove za naredni period.

Na sastanku se razgovaralo o privrednom i ekonomskom razvoju općine Visoko. Načelnica Babić je sa Premijerom i članovima Vlade obišla gradsku šetnicu, te Kulturni centar Altındağ-Visoko, nakon čega su se uputili u obilazak visočkih privrednih subjekata: Secom, Frutti-Funghi i IM Semić.

Upriličen je i obilazak MZ Gračanica, naselje Smršnica, gdje je realizovan projekat izgradnje vodovoda.





## Bratunčani posjetili Visoko u okviru „Dana genocida – Bratunac“

**U** organizaciji Općine Visoko, a na inicijativu Medžlisa islamske zajednice Bratunac, u Visokom je organizirana posjeta preživjelih bratunačkih logoraša.

Posjeta visočkoj općini upriličena je u okviru obilježavanja dana sjećanja na žrtve zločina pod nazivom „Dani genocida - Bratunac 2015“, a Bratunčani predvođeni Ramizom Salkićem, potpredsjednikom bh. entiteta Republika Srpska, došli su u Visoko, grad koji je prije 23 godine pružio utočište premlaćenim i izmučenim Bratunčanima.

Nakon razmjene za oficire nekadašnje JNA, 16. maja 1992. godine u visočku dvoranu KSC „Mladost“ pristigla je grupa od 400 ljudi koji su preživjeli torturu u rodnom Bratuncu.

Posjeta općini Visoko organizirana je u znak zahvalnosti za pruženu pomoć preživjelim logorašima, a blizak susret sa građanima, predstavnicima visočke Općine, Doma zdravlja i Crvenog križa, nije mogao sakriti suze i emotivne uspomene, s obzirom da su visočke institucije u saradnji sa građanima pružili prijateljsku ruku pomoći u teškim vremenima početka agresije na BiH.

„Visoko je u periodu rata primilo preko 14.500 raseđenih lica, a Bratunčani su bili prva grupa logoraša koja je došla u Visoko. To su bila vremena u kojima smo dijelili ono što smo imali zajedno sa svojim prijateljima iz Bratunca“, kazala je Amra Babić, načelnica Općine Visoko



## Prijem za nadarene studente sa područja općine Visoko

**U** Maloj sali Općine Visoko upriličen je prijem za nadarene studente sa područja općine Visoko. Tom prilikom načelnica Babić je istakla:

„Želim da vas kroz život prati sreća, da budete zdravi i ovakvi kakvi ste bili do sada. Vama ne treba govoriti da je učenje jedan cjeloživotni proces, vi to dobro znate i vi ste to pokazali. Samo ću reći da mi je veliko zadovoljstvo, i da su ovakvi prijemi sa omladinom, sa učenicima generacije, sa takmičarima, i evo sa vama, nadarenim studentima jer ste postigli izvrsne rezultate u svom dosadašnjem školovanju, nešto što radim od srca. Drago mi je što Visoko i BiH ima ovakvu omladinu, jer to je jedan znak da idemo dobrim putem.“.



## Čestitka prvačićima za sretan početak školovanja

**N**ačelnica Amra Babić je i ove školske godine, kao i prethodnih godina, obezbijedila čestitke i prigodne slatkiše za 460 prvačića sa područja općine Visoko, te im poželjela sretan početak nastave i prvi susret sa školom.

Obzirom da su skoro sve škole svečani prijem organizovale u isto vrijeme, načelnica Babić je ove godine posjetila Osnovnu školu „Kulin Ban“ Visoko, te svim đacima prvacima poželjela sretan početak obrazovanja, a ostalim učenicima, nastavnom osobljju i roditeljima sretan početak nove školske godine.





## NAČELNICA AMRA BABIĆ DOBITNICA PRIZNANJA EVROPSKOG POKRETA U BIH

**U** organizaciji Evropskog pokreta u BiH održana je svečana akademija pod nazivom „Vrijeme je za Evropu i regionalno partnerstvo“.

U sklopu akademije dodijeljena su priznanja pojedincima i institucijama zaslužnim za promociju evropskih vrijednosti i nastojanja da BiH ubrzano krene putem evropskih integracija. Među dobitnicima priznanja bila je načelnica Općine Visoko, Amra Babić, koja je primila priznanje za aktivno društveno i političko učešće žena.



## UČENICI VISOČKIH OSNOVNIH ŠKOLA POSJETILI SREBRENICU

**U** organizaciji Općine Visoko učenici devetih razreda iz šest osnovnih škola sa područja općine Visoko posjetili su Memorijalni centar Srebrenica-Potočari, realizirajući na taj način inicijativu vijećnika Izeta Smajevića.

Učenici i nastavnici su obišli Spomen sobu, prisustvovali historijskom času kustosa Memorijalnog centra, te pogledali film o genocidu u Srebrenici. Načelnica Babić je istakla važnost ovih posjeta Memorijalnom centru Potočari te naglasila da bi ubuduće trebale prerasti u tradiciju.

Nermina Kadrić, profesorica bosanskog jezika i književnosti u OŠ „Safvet-beg Bašagić“ kazala je da je ova posjeta ostavila kako na nastavnike tako i na učenike dubok trag, te da bi nas ove posjete trebale učiti ljubavi, ravnopravnosti i slobodi, da se nikad i nikom ne ponovi „Srebrenica“.


Emina Handžić, učenica devetog razreda OŠ „Safvet-beg Bašagić, prenijela je svoje utiske o posjeti: „Osjećala sam se veoma tužno i ne želim da se ikada više ponovi genocid. Mi ne smijemo zaboraviti Srebrenicu, jer sve što se zaboravi sigurno se i ponovi. Moja poruka mladim ljudima je da trebaju ići vidjeti i osjetiti taj bol, tugu, a obilasci trebaju preći u tradiciju“.

## ODRŽANA TRIBINA NA TEMU „ŠTA ZNAČI BITI POLITIČARKA U BIH“

**N**a Filozofskom fakultetu Sveučilišta u Mostaru održana je javna tribina i diskusija na temu „Šta znači biti političarka danas u BiH“, a u organizaciji Westminster fondacije za demokratiju u BiH.

Westminster fondacija za demokratiju je vodeća britanska fondacija za podršku stvaranju funkcionalne demokratije. WFD je neovisno javno tijelo, osnovano 1992. godine koje finansira Ured za vanjsku politiku i Ured Commonwealtha Velike Britanije. WFD predstavništvo u Bosni i Hercegovini je osnovano 2014. godine i trenutno radi na projektu „Promocija žena u politici u BiH“ čija je svrha postizanje veće zastupljenosti žena, prije svega na lokalnim izborima 2016. godine.

Četiri aktivne političarke govorile su o svom političkom angažmanu, među kojima je i načelnica Općine Visoko Amra Babić, koja je tom prilikom istakla sljedeće: „Može se biti političarka u BiH i to je posao koji se radi u kontinuitetu. Ima mnogo predrasuda o politici, a posebno o ženama u politici. Za mene, biti političarka u BiH znači aktivno učestvovati u procesima građenja države, društva, te stvaranja boljeg ambijenta u kojem svi zajedno živimo. Dakle, osnovna poruka je da svi budemo aktivni. Ne dozvolimo da procesi prolaze pored nas, budimo aktivni sudionici koji će kreirati ne samo svoju sudbinu i živote, već stvoriti bolji ambijent za našu djecu, porodice i prijatelje.“



### KANCELARIJA ZA PRIVREDNIKE



Pružanje pomoći privrednim društvima i poduzetnicima iz oblasti obrta, ugostiteljstva, trgovine i drugih djelatnosti u rješavanju postupaka i upućenih zahtjeva općinskim službama.



Saradnja sa udruženjima privrednika, poljoprivrednika i drugim udruženjima koja se bave privredno-razvojnim aktivnostima, a u cilju podrške privrednom razvoju na području općine Visoko.



Ušteda vremena privrednim subjektima i otklanjanje administrativnih barijera u određenim upravnim i administrativnim postupcima u organu uprave.



Stvaranje više različitih baza podataka u cilju promovisanja privrednog razvoja na području općine visoko.

### KONTAKTIRAJTE NAS:

Stojimo Vam na raspolaganju svakim radnim danom.

Obratite nam se, a mi ćemo Vam odgovoriti u najkraćem mogućem roku.



Alije Izetbegovića 12A  
Kancelarija 28, III sprat



032/ 732 - 546



e-salter@visoko.gov.ba



visoko.gov.ba





# OPĆINA VISOKO

